

কাজী আনোয়ার হোসেন

# মাসুদ রানা

ক্যাপ্তানতর্ক



# ক্ষাপা নর্তক

প্রথম প্রকাশ: জুলাই, ১৯৭১

## এক

‘বৈঁচে থাকো। শতবর্ষ পূর্ণ হোক তোমার।’ মনে মনে মেজর জেনারেল রাহাত খানকে আশীর্বাদ করল রানা।

তেহরানের অভিযান শেষ করে করাচী, ওখান থেকে সরাসরি ব্যাঙ্কক, সেখান থেকে ঢাকায় ফিরে রিপোর্ট করার পরদিনই দুরূহ দুরূহ বুকে ছুটির দরখাস্ত করেছিল রানা। একটি কথাও বলেননি রাহাত খান। মুখ তুলে তাকিয়েছিলেন একবার ভুরু কুঁচকে। তারপর অ্যাশট্রে থেকে চুরুটটা বাঁ হাতের দু’আঙুলে তুলে ডান হাত দিয়ে কলমটা উঠিয়ে সই করে দিলেন খস্ খস্ করে। খস্ খস্ শব্দটা রানার সারা শরীরে ঠাণ্ডা নরম পরশ বুলিয়ে দিল যেন। হাঁপ ছেড়ে আশীর্বাদ করে বসল ও।

দরজার কাছে এসে নবে হাত দিতেই বিনা মেঘে বজ্রপাতের মত অপ্রত্যাশিত শব্দটা কানে ঢুকল, এবং ধড়াস করে লাফিয়ে উঠল বুকের ভিতর হৃৎপিণ্ডটা।

‘শোনো।’

ধীর পায়ে ফিরে এল রানা ডেস্কের কাছে। শুকিয়ে গেছে মুখ। যেন মস্ত কোন অপরাধ করে ধরা পড়ে গেছে হাতেনাতে।

‘ছুটি নিচ্ছ বিশ্রামের জন্যে?’

‘জী, স্যার।’ উত্তর নিয়ে বিস্ময়বোধক চিহ্নের মত একই জায়গায় দাঁড়িয়ে রইল রানা।

‘আচ্ছা, যাও।’ টাইপ করা কাগজগুলোর ওপর থেকে চোখ না সরিয়ে বিদায় দিলেন রাহাত খান।

বড়সড় একটা প্রশ্নবোধক চিহ্ন বুকের ভিতর নিয়ে বেরিয়ে এল রানা। এমন তো হয় না। পিছু ডেকে ও-কথা জানতে চাওয়ার মানে? প্রশ্নটা করে উপদেশই বিতরণ করেছে বুড়ো: ‘ছুটি নিচ্ছ, বিশ্রাম নিয়ো।’ কেন? তবে কি...

রক্ত ছলকে উঠল বুকের ভিতর। গাড়ির রিয়ার ভিউয়ে কঠোর দেখাল নিজের মুখটা। উত্তেজনার আমেজ ছড়িয়ে পড়ল সারা দেহে। দশ জোড়া চোখ ওঁর, কোনও কিছু ফাঁকি দিয়ে বেরিয়ে যেতে পারে না। কোথাও না কোথাও বিপদ সঙ্কেত দেখেছেন। তাই ইঙ্গিতে সতর্ক করে দিয়েছেন। তার মানে আবার অ্যাসাইনমেন্ট।

কুছ পরোয়া নেই। একটা দিন হেসে খেলে শ্রুতি করে কাটানো যাক। তারপর মৃত্যুর মুখোমুখি দাঁড়িয়ে ওয়ালাইকুম সালাম বলে মৃত্যুকে ফেরত

পাঠানো যাবে আরও একবার। মৃত্যুর সামনে গিয়ে দাঁড়ানো—সে তো ওর প্রিয় গন্তব্যস্থল। ভয় হয়, কিন্তু কেমন একটা নেশাও আছে।

বাড়িটা খাঁ খাঁ করছে। রাঙার মা গেছে মীরপুর মাজারে সিম্নি দিতে। বিদেশ থেকে রানা ফিরলেই ছোট্টে রাঙার মা মোখলেসকে নিয়ে। রানাকে বহাল তব্বিতে রাখার প্রার্থনা মঞ্জুর হয় দেখে মীরপুরের মাজারের প্রতি একনিষ্ঠ বিশ্বাস রাঙার মার।

গরম পানিতে শাওয়ার সেরে সুটেড বুটেড হয়ে বেরিয়ে এল রানা বাথরুম থেকে। রিস্টওয়াচ পরতে পরতে সময় দেখল: পাঁচটা পঁয়তাল্লিশ। শীতকাল। সন্ধ্যা ঝাঁপিয়ে পড়েছে ঢাকার বুকে। রুম বন্ধ করে গাড়িতে এসে উঠল রানা। মনের ভিতর সারাক্ষণ এধার থেকে ওধার দুলছে পেভুলামের মত মেজর জেনারেল রাহাত খানের কথাটা।

বিলিয়ার্ড খেলার প্রোগ্রাম আজ সন্ধ্যায় ক্লাবে। মেজাজটা বিগড়ে গেল হঠাৎ রানার। এই মেটাল টরচারের কোনও মানে হয় না। কথাটা না বললে কি মহাভারত অশুদ্ধ হয়ে যেত?

গাড়ি ছেড়ে দিল রানা। ওর রাগের কোন মানে হয় না একথা ভাল করেই জানে রানা। যেটা যতটুকু বলা প্রয়োজন ততটুকুই বলবে বুড়ো।

আজ গাঢ় কুয়াশা নেমেছে শীতকালীন সন্ধ্যায় ঢাকার বুকে। আরে—এ কি! আনন্দে বিশ্বাসে এদিক ওদিক তাকাল রানা। ঝেয়াল হয়নি এতক্ষণ ওর। কিন্তু কখন হলো এই অকাল বৃষ্টি! রাস্তা ভিজে। দু'পাশের উঁচু গাছগুলোর পাতা চিকচিক করছে নিওনের ধবধবে সাদা আলো লেগে। এক পশলা বৃষ্টি হয়ে গেছে। রানার সাথে একই সময়ে প্র্যান করে নিয়েছে রূপসী ঢাকা শহর।

রমনা পার্কের পাশ ঘেঁষে চলেছে গাড়ি। অলস ভঙ্গিতে ড্রাইভ করছে রানা। চোখের সামনে ভাসছে বিয়ারের ফেনা। গা গরম করে নিয়ে খেলা শুরু করবে ও। সোহানাকে অফিস থেকে আধ ঘণ্টা আগে ছুটির ব্যবস্থা করে দিয়েছে আজ রানা। অপেক্ষা করছে সে ক্লাবে। দুটো গেম শেষ করেই ডিনার খাবে পূর্বাণীতে। কাল থেকে ছুটি রানার। দশ দিনের সময় কাটাবার হুক তৈরি করার চেষ্টা করল রানা। পকেট থেকে চেস্টারফিল্ডের প্যাকেট বের করল।

গাড়ি ঘোড়া রাস্তায় একটাও নেই। ডাইনে পার্ক। বাঁয়ে রেসকোর্স। কুয়াশায় দৃষ্টি চলে না মাঠের দিকে। এদিককার স্ট্রীট নিওনগুলো জ্বলছে না। দূরের চৌমাথায় কুয়াশাবৃত টুকরো টুকরো আলো। রাস্তার দু'পাশে প্রায় অন্ধকার। হঠাৎ কথাটা মনে পড়ল রানার। শহরে অসামাজিক কার্যকলাপ উত্তরোত্তর বেড়েই চলেছে। নির্জন রাস্তায় একা পেলো আর কথা নেই। ঝাঁপিয়ে পড়ছে গুণ্ডাদল। পেশাদারীরা তো চিরকাল আছেই। অপেশাদার গুণ্ডাদলও মাথা চাড়া দিয়ে উঠেছে অসংখ্য। এদের মধ্যে শিক্ষানবীশ ভদ্র পরিবারের ছেলে ছোকরারাও আছে। ঘড়ি, কলম, টাকা ছিনিয়ে নিচ্ছে সুযোগ পেলেই। কিলঘুসি জুটেছে নিরীহ পথিকদের পেটে-কপালে, একটু বাধা দেবার চেষ্টা করলে প্রাণ নিয়ে টানাটানি হচ্ছে। কিন্তু কেন এমন হয়?

আসল কারণ অর্থনীতি। শোষণ, দুর্নীতি ইত্যাদি বন্ধ না হলে এসব বাড়তেই থাকবে। জনসংখ্যা হু হু করে বাড়ছে। অথচ অর্থের সুষম বণ্টন হচ্ছে না। ওয়েলফেয়ার স্টেটের প্রচলন দরকার দেশে। চিন্তার কিছু নেই। মনকে প্রবোধ দিল রানা। দেশ সেদিকেই এগোচ্ছে। জাতীয়তাবাদ তারই প্রথম পদক্ষেপ। কিন্তু দিনী অনেক দূরন্ত।

জলন্ত সিগারেটটা তুলে এক সেকেন্ড দেরি করল ঠোটে ঠেকাতে রানা। সটু সমাজ কিভাবে গড়ে উঠবে সেই চিন্তায় মগ্ন ছিল বলে আগে থেকে গাড়িটা নজরে পড়েনি ওর। বিরাট একটা ওপেন রেকর্ড রেসকোর্সের কাঠের ঘেরের পাশে দাঁড়িয়ে রয়েছে। ড্রাইভিং সীটে কেউ আছে কিনা লক্ষ করার সময় পেল না রানা। ওপেলের পিছনে একটা বেবীট্যাক্সি। ট্যাক্সি ড্রাইভার মাটিতে নামতে উদ্যত। পাশেই একটি যুবতী দাঁড়িয়ে। কার্ডিগান আর শাড়ি দেখতে পেল শুধু রানা। রাস্তার মাঝখান দিয়ে গাড়ি নিয়ে ছাড়িয়ে এসেছে ওদেরকে ও। যুবতীকে আড়াল করে একজন লোককে দাঁড়িয়ে থাকতে দেখেছে রানা। খটকা লাগল। শাড়ি দেখে আর আকার-আকৃতি আন্দাজ করে যুবতীটিকে এ দেশীয় বলে ধরে নেয়া যায়। কিন্তু লোকটা নিখোঁ।

এদিকটা অন্ধকার আর ফাঁকা বলে দেহ ব্যবসার গোপন কাণ্ডকারখানা চলে। কিন্তু এ ব্যাপারটা বোধ হয় তা নয়। রিয়ার ভিউয়ে তাকাল রানা। দেখতে পাওয়া গেল না পরিষ্কার। স্নো করল গাড়ি ও। ঘাড় ফিরিয়ে পিছন দিকে তাকাবার একমুহূর্ত পরই ইতি-কর্তব্য স্থির করে ফেলল রানা। নিখোঁটা যুবতী মেয়েটিকে জিপটে ধরে খেলনা পুতুলের মত অনায়াসে তুলে নিয়েছে দুই হাতের উপর। শূন্য হাত পা ছুড়ে কৈ মাছের মত লাফাচ্ছে মেয়েটি।

ঘোড়ার মত লাফ মেরে উঠল গাড়িটা। ডান দিকে নাক ঘুরে গেল মুহূর্তে। রাস্তা ছেড়ে মাটিতে পড়ল সামনের দুটো চাকা। বিরতি না নিয়ে স্টিয়ারিং ঘোরাল রানা। তীর বেগে রিপারীতমুখী হলো গাড়ি। মাঝ রাস্তা ছেড়ে রঙ সাইডে চলে এল। ওপেনটার নাক বরাবর ছুটছে। মেয়েটিকে পরাস্ত করে ওপেলের ব্যাক সীটে তুলে নিয়েছে নিখোঁ। বেবীট্যাক্সির ড্রাইভার তার ত্রিচক্রযানের পাশে পড়ে রয়েছে মাটিতে মুখ খুবড়ে।

ওপেন স্টার্ট নিল। এক সেকেন্ড পরই রানার গাড়ি ওপেলের মুখোমুখি আধ হাত ব্যবধানে ঝাঁকুনি দিয়ে দাঁড়িয়ে পড়ল। ড্রাইভার মাথা বের করে চেষ্টা করে উঠল অশ্রাব্য ভাষায়। সামনে এগোবার রাস্তা বন্ধ করে দিয়েছে রানা তার। পিছনে বেবীট্যাক্সি।

এক ঝটকায় দরজা খুলে নেমে পড়ল রানা। গাড়ির হেড লাইটে চকচক করছে ড্রাইভারের হাতের ড্যাগারটা। লোকটা সীটের উপর থেকেই ড্যাগার তুলে ধরেছে ভয়ঙ্কর ভঙ্গিতে। ভয় দেখিয়ে ভাগাতে চায় রানাকে।

ওপেলের জানালাগুলোর কাঁচ তুলে দেয়া। দরজা চারটেই বন্ধ করে দিয়েছে। মেয়েটি ধস্তাধস্তি করছে ব্যাক সীটে। নিখোঁটা তার মুখে রুমাল চেপে ধরে সঁটে ধরেছে সীটের সাথে। দু'পা মাত্র এগোল রানা। তারপর

শান্ত, নিরীহ ভাব করে একটি আঙুল দু'দো হাঁপত করল ড্রাইভারকে। ওকে বোঝিয়ে আসতে বলছে ওপেল থেকে রানা। ব্যাপারটা যেন আদৌ বুঝে উঠতে পারেন না। ড্রাইভারকে ডাকছে প্রকৃত ঘটনা শোনার কৌতূহলে।

দাঁড়ের সাথে দাঁত ঘষে বাংলার ও-এর মত বিকৃত মুখ ভঙ্গি করে আবার গাল দিল ড্রাইভার। দরজা খোলার লক্ষণ নেই। ছোরাটা দিয়ে ইঙ্গিত করল: গাড়ি সারিয়ে না নিলে গেঁথে ফেলবে রানাকে।

মুখের নিরীহ ভাব একটুও বদলাল না রানার। ওর ভালমানুষী ড্রাইভার বুঝতে পারেনি বলে অসহায় বোধ করছে যেন ও। আস্তে আস্তে আরও দু'পা এগোল। তাৎপর্যই বিদ্যুৎ খেলে গেল সারা দেহে।

একটা পা বাড়িয়েই মুঠো পাকানো হাতটা প্রচণ্ড বেগে মারল জানালার কাঁচে। কাঁচ ভেঙে কনুই অবধি ঢুকে গেল হাত। ড্রাইভারের কানের নিচে পনেরো সের ওজনের ঘুসিটা টক্কর খেল। ব্যথায় দাঁতে দাঁত চাপল রানা। কাঁচের সাথে সংঘর্ষে হাতে চামড়া ছিঁড়ে গেছে। ভিতর থেকে হাতল টেনে দরজাটা খুলে ফেলল ও। দ্রুত বাঁকা হলো ড্রাইভার হাত থেকে খসে পড়া ছোরাটা পায়ের নিচে থেকে কুড়িয়ে নেবার জন্য। বাইরের থেকে রানার সবুট লাথি পেটে থেয়ে 'কোঁত' করে শব্দ করে কঁকড়ে গেল লোকটা সেই নুয়ে পড়া অবস্থায়। পিছনের সীট থেকে আত্ননাদটা উঠল তখনই। রিভলভারের বাঁটা পলকের জন্যে নিখোঁটার হাতে দেখতে পেল রানা।

বাঁটের ঘা দিয়ে মেয়েটিকে সাময়িকভাবে ঘুম পাড়িয়ে দিয়ে রিভলভারটা ঘুরিয়ে নিল নিখোঁ। চোখ দুটো চঞ্চল হয়ে উঠল। রানাকে দেখতে পাচ্ছে না সে আগের জায়গায়। পালিশ করা কালো জুতোর মত মুখটায় হিংস্র হাসি ফুটল একটু। যার অর্থ: রিভলভারের সাথে চালাকি করে পালাবে কোথায় বাহাদুর। মেয়েটির উপর ঝুঁকে পড়ে বাইরে তাকাল সে। বাঁয়ে নেই রানা। ডান দিকটা দেখল। নেই।

ঘর্মাতে মুখটা কদর্য হয়ে উঠল। নিরস্ত্র রবাহুতের ক্ষুদ্র চালাকির মর্ম বুঝতে না পেরে রাগে গায়ের চামড়া জ্বালা করছে। ছিঁড়ে খেয়ে ফেলবে সে রানাকে হাতের নাগালে পেলে। ড্রাইভিং সীটের দিকে তাকিয়ে সিদ্ধান্ত নেবার চেষ্টা করল লোকটা। বিপদটা টের পাচ্ছে ক্রমশ। সামনের গাড়ি না সরালে সামনে বাড়বার কোনও উপায় নেই। পিছনে বেবীটিয়াগ্নি। প্রকাণ্ড দেহ নিয়ে ব্যাক ডোর খুলে নিচে নামল সে। ট্রিগারে চেপে বসেছে আঙুল। আঙুন বেরুচ্ছে কুচকুচে কালো মুখের উপর বসানো টকটকে লাল চোখ জোড়া থেকে। তীক্ষ্ণ দৃষ্টি ফেলে খোঁজার চেষ্টা করল রানাকে। কান পেতে দেখল মুখোমুখি রানার গাড়িটার দিকে তাকিয়ে। মাথার পিছনে ঝট্ পট্ ঝট্ পট্ শব্দ হলো। সববেগে দেহ মুচড়ে ঘুরে দাঁড়াল লোকটা।

মাথার উপর দিয়ে উড়ে যেতে যেতে ডেকে উঠল একটা বাদুড়। জ্বলন্ত চোখ দুটো উপর পানে তুলে বাদুড়টাকে ভস্ম করে দিতে চাইল যেন লোকটা।

মাত্র এক সেকেন্ড সময় পেল রানা। রিভলভার দেখে বসে পড়ে হামাগুড়ি

দিয়ে ওপেলের পিছনে চলে এসেছে ও। জুতোর খাপ থেকে ছুরিটা হাতে নিয়ে রেখেছে আগেই। ছুঁড়ে দিল সেটা সবগে। উড়ন্ত ছুরিটা রিভলভার ধরা হাতটার কজির উপরে এসে বিধে গেল নিখোর। ডাইভ দিল রানা। ছুরিবিদ্ধ হবার বিষ্ময় কাটবার আগেই রানার উড়ন্ত দেহটা সজোরে এসে টঙ্কর খেল নিখোর বুকে। নিখো ভূপাতিত হলো রানাকে বুকে নিয়ে।

বাঁ কনুই ঠুকে গেল মাটির সাথে রানার। নিখো ফেলে দিল ওকে বুকের উপর থেকে। পেটা শরীর লোকটার। রিভলভার খুঁয়ে নার্সাস হয়নি একটুও। ঘুসি মারল সে রানার ডান চোখ লক্ষ্য করে। সবগে মাথা কাত করে চোখ বাঁচাল রানা। রানার বুকের উপর বুক চেপে ধরেছে নিখো। নিখোর কণ্ঠনালী চেপে ধরল ও। উভয়সংকটে পড়ল লোকটা। উপড় হয়ে পড়ে থাকার ফলে গলা বাঁচাবার জন্যে হাত ব্যবহার করা অসম্ভব। এই সুযোগে পা দুটো দিয়ে পাশ থেকে জোড়া লাখি মারল রানা।

নিখো বক্ষচ্যুত হলো। গলা ছেড়ে দিয়ে দুই পায়ের উপর ভর দিয়ে দাঁড়িয়েই ডান পা চালান রানা। চিবুকে লাখি খেয়ে মুখ হাঁ করে অবোধ্য ভাষায় যন্ত্রণাক্ত শব্দ বের করল নিখো। বুক ভরে শ্বাস নিয়ে দ্বিতীয় লাখি চালান রানা।

অপেক্ষাতেই ছিল লোকটা। লুফে নিল রানার পা। সেটা ধরে উঠে বসতে বসতে সজোরে ঠেলে দিল সামনে। চিৎ হয়ে পড়ল দূরে রানা। ডাইভ দিল নিখো। গড়িয়ে সরে গেল রানা। দেড় সেকেন্ড পর রয়েল বেঙ্গল টাইগার আর আফ্রিকান লায়ন মুখোমুখি দাঁড়াল মাঝখানে পাঁচ হাত ব্যবধান রেখে। ঘাড় নিচু করে সিংহের মতই ছুটে এল নিখো।

তৈরি ছিল রানা। চোখের পলকে পাশে সরে এগিয়ে আসা নিখোর মুখে ঘুসি মারল ও। দাঁড়িয়ে পড়ল, তারপর পিছিয়ে গেল এক পা লোকটা। ঝাঁপিয়ে পড়ল রানা। পরপর আরও দুটো ঘুসি যোগ করল নিখোর মুখে। মুখ রক্ষার চেষ্টা করল নিখো। নাক বরাবর মারল রানা। ঠোঁটের কষ বেয়ে রক্ত ঝরছে লোকটার। তলপেট বেছে নিল রানা। 'কোত' করে আওয়াজ বেরল। দ্বিতীয় লাখিটা উঠিয়ে ক্ষান্ত হলো রানা। পালাচ্ছে নিখো। পিছন থেকে কাঁধে কারাতের কোপ মারল। এতক্ষণে মুখ থুবড়ে পড়ল প্রকাণ্ড দেহ। এগিয়ে গিয়ে লাখি চালান রানা।

এক হালি সবুট লাখি খেয়ে জ্ঞান হারান আফ্রিকান লায়ন। হাত ঝাড়তে ঝাড়তে পিছিয়ে এল কয়েক পা রানা। ঘুরে দাঁড়াল ও। দুটো নরম বাহু জড়িয়ে ধরল ওকে। বুকের কাছে প্রায় মুখ ঠেকিয়ে কঁদে উঠল মেয়েটি। ওপেল থেকে কখন বেরিয়ে এসে পিছনে দাঁড়িয়েছিল।

অস্বস্তিবোধ করল রানা। ছাড়াবার চেষ্টা করল নিজেকে ও। বেশ আঁট করে আঁকড়ে ধরেছে মেয়েটি। দিক ওদিক তাকাল রানা। কিছু বলার চেষ্টা করল। কিন্তু কি বলবে ভেবে না পেয়ে চুপ করে রইল ও। থরথর করে কাঁপছে মেয়েটি রানার গায়ের সাথে গা ঠেকিয়ে। দুর্বল, অসহায় একটি যুবতীর সারা শরীরের কাঁপন অনুভব করছে রানা।

‘মাসুদ ভাই...মাসুদ ভাই,’—মেয়েটি ফুঁপিয়ে উঠল আবার। তারপর আবার বলল, ‘আপনি না এসে পড়লে কুকুরটা আমার সর্বনাশ...’

চোখ পিট পিট করে তাকাল মেয়েটির মাথার দিকে রানা। চেনা মেয়ে নাক।

‘দোখ,’ জোর করে হাত দুটো ধরে মৃদুভাবে টেনে আনল রানা পিছন থেকে। তারপর পিছিয়ে এল একটু। মুখ তুলল মেয়েটি। চেনা চেনা ঠেকল মুখের আদলটা। স্মৃতির পাতা উল্টে যেতে লাগল রানা। বলে উঠল, ‘তুমি! তুমি না ডক্টর সাদেকের ছোট বোন?’ সবিস্ময়ে তাকিয়ে রইল রানা। মাথা নেড়ে সায় দিল মেয়েটি। রানা বলল, ‘চলো, গাড়িতে উঠি।’ রিভলভারটা কুড়িয়ে নিল ওপেলের পাশ থেকে রানা। একটি লুগার।

গাড়ি ছেড়ে দিয়ে কমালটা বাড়িয়ে দিল ফিরোজার দিকে রানা, ‘কোথায় যাবিছলে তুমি? কার সাথে এসেছ ঢাকায়?’

‘মহম্মদপুরে মামার বাড়ি। সবাই এসেছি আমরা। শপিং করতে বেরিয়েছিলাম ভাইদের সাথে। ওরা সিনেমায় গেল ইভনিঙ শোয়ে। আমার মাথাটা ধরেছিল বলে বাড়ি কিরছিলাম।’ ভাঙা গলায় বলে চলল ফিরোজা, ‘দশ বারোদিন হলো এসেছি আমরা। বাইরে বের হলেই পিছু নিত ওই গাড়িটা। আমি...’

‘নিথোটাকে চেনো?’

‘না। তবে...’

‘তবে?’

‘বড়দার সাথে ক’বার আমাদের টেক্সি বাড়িতে দেখা করেছে লোকটা। শেষ দিকে এলে আমরা বলতাম বড়দা বাড়ি নেই। বড়দাই শিখিয়ে দিয়েছিল আমাদেরকে। লোকটার কথা জানতে চাইলে কোনও উত্তর না দিয়ে শুধু গম্ভীর হয়ে যেত বড়দা।’

‘কোথায় এখন ও?’

একটু ইতস্তত করে ফিরোজা বলল, ‘করাচী গেছে। এসে পড়বে আগামীকাল। কিন্তু কথাটা কেউ জানে না। বড়দা কেন জানি সবার কাছে চেপে রাখতে বলেছে ওর যাবার কথাটা। আমার মনে হয় সে ওই নিথো লোকটার ভয়েই।’

রানা কথা বলল না সাথে সাথে। চিন্তা করছিল ও। ডক্টর সাদেকের চরিত্র সম্পর্কে অজ্ঞ নয় ও। নিরীহ, সাংসারিক, বিজ্ঞান সাধক সে। তার সাথে নিথোটার সম্পর্ক কি?

রানা জিজ্ঞেস করল, ‘আগামীকালই ফিরবে ও?’

মাথা কাত করে ফিরোজা বলল, ‘ফিরবে। কাল যে আমাদের...’ কলেজে পড়ুয়া মেয়ে ফিরোজার গাল লাল হয়ে উঠল।

রানা বলল, ‘কাল বুঝি তোমাকে দেখতে আসবে বরপক্ষ?’

‘জী।’ ফিরোজা ঘাড় নিচু করে বলল, ‘আপনাকে থাকতে হলে কিন্তু, মাসুদ ভাই।’

হাসি হাসি মুখ করে গাড়ি চালাতে লাগল নিঃশব্দে রানা।

চার বোন ঘিরে ধরল রানাকে। ফিরোজা রুগ্মা মার বুকে মুখ গুঁজে কান্না জুড়ে দিয়েছে গাড়ি থেকে নেমে বাড়িতে ঢুকেই। ভাইগুলো আর ওদের বড় বোনটি ছাড়া পরিবারের সবাই উপস্থিত। বড়টির বিয়ে দেয়া হয়েছে গত বছর। মামা-মামীও রয়েছে ওদের চার বোনের সাথে। পাঁচটি মিনিট অস্বস্তিকর ভাবে কাটল। তারপর ধীরে ধীরে সব কথা বলল ফিরোজা। শুনতে শুনতে আঁতকে উঠল সবাই। চার বোন চোখ বড় বড় করে দেখছে রানাকে। বৃদ্ধা মায়ের চোখে পানি। মামার চোখে প্রশংসা আর বিস্ময়। মামী ব্যস্তসমস্ত হয়ে পড়েছে রানাকে বসতে দেবার জায়গা বাছতে।

চোখের পানি শাড়ির আঁচলে মুছতে মুছতে ডক্টর সাদেকের আশ্রয় রানার সামনে এসে দাঁড়িয়ে কাপা হাতে ওর একটা হাত ধরে বলে উঠল, 'এসো বাবা, বসো। তুমিও আমার নিজের ছেলে। যে উপকার করলে আজ আমাদের তা খোঁদা ছাড়া আর কেউ বুঝবে না। কালকে ওকে দেখতে আসবে। একটা কিছু ঘটে গেলে কি করে মুখ দেখাতাম!' শিউরে উঠল বৃদ্ধা।

রানা বলল, 'কিন্তু লোকটা সম্পর্কে জানা গেল না কিছু।'

'কি জানি বাবা—আমার সাদেক যেন কেমন গুম মেরে গেছে। জিজ্ঞেস করলে চুপ করে থাকে। কাল ফিরবে ও। তুমিই জিজ্ঞেস করে দেখো। বউমাকে নিয়ে কাল বিকেলে তোমাকে আসতে হবে বাবা একবার।'

রানা চমকাল না। সব কথা মনে আছে ওর। ডক্টর সাদেকের টঙ্গীর বাড়িতে অনীতাকে স্ত্রীর পরিচয় দিয়ে নিয়ে গিয়েছিল একবার ও। যুক্তি দেখাল ও একটু ভেবে নিয়ে, 'আপনার বউমা বাপের বাড়ি গেছে।'

মেক্স বোনটি এই প্রথম কথা বলে উঠল সবার আগে, 'কেন তো। আপনি তো আর ভাবীর সাথে স্বত্তর বাড়ি যাননি। আপনাকে আসতে হবে, মাসুদ ভাই।'

'কিন্তু—'

রানা কথা শেষ করতে পারল না। ফিরোজা সামনে এগিয়ে এসে বলল, 'আচ্ছা সে দেখা যাবে। আপনাকে আনবার ব্যবস্থা আমরা করব। এখন চলুন মুখ হাত ধুয়ে নেবেন, মাসুদ ভাই।'

ক্রমে গিয়ে বিনিয়ার্ড খেলা চুলায় গেল। পরবর্তী দেড়ঘন্টা জোর করে আটকে রাখল ওরা রানাকে। শেষ পর্যন্ত রাত্রির খাওয়াটা না খাইয়ে ছাড়ল না।

যাবার কথা বলে দিয়েছিল পাঁচটায়। যাবে কিনা ভাবছিল রানা। কিন্তু সিদ্ধান্ত নেবার আগেই, চারটির সময়, গেট দিয়ে হৈ হৈ করে ঢুকে পড়ল চার বোন

\* নীল আতঙ্ক দেখুন।

তিন ভাই। মোখলেস ওদেরকে ভিতরে নিয়ে এসে বসাল। খিলখিল করে হেসেই সারা সবাই। সেজটি বুকে হাত বেঁধে বলে উঠল, 'ইউ আর আভার অ্যারেস্ট, মাসুদ রানা দি গ্রেট। পাঁচ মিনিট সময় দেয়া হলো কাপড় পরতে। দেরি হলে আষ্টেপৃষ্ঠে বেঁধে নিয়ে যেতে বাধ্য হব।'

অজুহাত এখানে অচল বুঝতে পারল রানা। ওদের উচ্ছল আনন্দে যোগ না দিয়ে উপায় নেই দেখে বেরিয়ে এল ও। গ্যারেজ থেকে গাড়ি বের করা হয়ে গেছে দেখে প্রশ্নবোধক চোখে তাকাল রানা। মোখলেস বলল, 'দিদিমণিরা বললেন কিনা।'

খিলখিল করে হেসে উঠল চার বোন তিন ভাই। সে হাসিতে যোগ দিল রানাও। নিজেই ওদের মাঝে হারিয়ে ফেলে কেমন যেন পরম আনন্দ পেল হঠাৎ রানা। পুরানো অভাবটা তখনই বিধল ঋ করে বুকে। এ জীবনের স্বাদ পায়নি সে কোনদিন।

বড় অদ্ভুত লাগে এই পরিবারটিকে রানার। পরকে আপন করে নেবার আশ্চর্য মানসিকতা আছে ওদের। মেঝে ছেলেটি ইঞ্জিনিয়ারিং পাস করে বেরিয়েছে। সংসারে স্বচ্ছলতা না এলেও স্বাভাবিকতা এসেছে এখন। ডক্টর সাদেকের মাথার বোঝা হালকা হয়েছে খানিকটা। মারীতে হাওয়া বদলাতে পাঠিয়েও বৃদ্ধা মার অসুস্থতা কার্টেনি পুরোপুরি। সংগ্রামী পরিবার। দুই ভাই, চার বোন পড়ে, কলেজ-ইউনিভার্সিটিতে। প্রচুর খরচ। স্বচ্ছলতা নেই, কিন্তু হেসে খেলে সরাগরম করে রেখেছে পুরানো ধাঁচের চুন বালি খসা বাড়টাকে সবাই মিলে।

মেহমানরা এসে পড়ল ওরা পৌছবার খানিক পরই। ডক্টর সাদেক সেই শিশুসুলভ হাসি দিয়ে আপ্যায়ন করল সবাইকে। ফিরোজার কথা তুলে কৃতজ্ঞতা প্রকাশ করতেও ভুলল না রানাকে। কিন্তু তার চোখে মুখে মানসিক দ্বন্দ্বের চিহ্ন দৃষ্টি এড়ান না রানার। নিগ্রোটোর কথা জিজ্ঞেস করার জন্যে সুযোগের অপেক্ষায় রইল ও।

ভিতরের একটা রুমে বসানো হলো মেহমানদেরকে। পাত্র নিজে আসেনি। দুই বোন, দুই ভাবী, মামা, গোটা তিনেক ছেলেমেয়ে নিয়ে পাত্রের বাবা-মা এসেছে মেয়ে দেখতে। চায়ের প্রস্তাব তুলতেই পাত্রের মামা বলল, 'এখুনি কেন? আগে মেয়ে দেখি তার পর না হয়...' পাত্রের ভাবীরা সায় দিল মামা-শ্বশুরের কথায়। অগত্যা ফিরোজাকে আনতে গেল বোনেরা। পাত্রের এক ভাই রানার দিকে চোখ তুলে ডক্টর সাদেককে প্রশ্ন করল, 'ওকে তো চিনলাম না?'

ছোট বোন হাসিনা উত্তর দিল, 'আমাদের আর এক ভাই উনি।'

পাত্রের মামা মাথা নাড়লেন, 'তাই নাকি! বেশ বেশ। কিন্তু আমি যেন শুনেছিলাম তোমরা বাবারা চার ভাই।'

'জী, ঠিকই শুনেছিলেন।' উত্তর দিল ডক্টর সাদেক, 'ও আমাদের খালাতো ভাই। লভনে ছিল।'

ফিরোজাকে সাজিয়ে গুজিয়ে আনা হলো। পাত্রের মামা ফিরোজার মুখ

পরখ করতে করতে সহাস্যে বললেন, 'এসো মা।'

জুতোর শব্দ শুনে দরজার দিকে তাকান ডক্টর সাদেক। ফিরোজার গতিবিধির উপর চোখ কান পড়ে আছে সকলের। পাত্রে দুই ভাবী উঠে দাঁড়িয়ে ধরল নতমুখী ফিরোজাকে। ওকে সিন্স একটা সোফায় বসিয়ে দিয়ে নিজেদের আসনে বসল ওরা। পাত্রে বাবা সিগারেট বের করে ম্যাচ জ্বাললেন ফশ করে। জুতোর শব্দ এসে থামল দোরগোড়ায়।

রুমের ভিতর নিস্তব্ধতা ছিল। হঠাৎ আঁতকে উঠে অশ্রুট শব্দ করে উঠল একসাথে কয়েকজন। ঝট করে মাথা তুলে তাকান ফিরোজা। ভীত গলায় চিৎকার করে উঠেই থেমে গেল ও। তারপর আবার অটুট নিস্তব্ধতা।

দোরগোড়ায় প্রকাণ্ড নিখোঁটা রিভলভার উঁচিয়ে আছে।

ফিরোজার তিন ভাইয়ের সাথে দরজার মুখোমুখি বসেছিল একটা সোফায় রানা। হতবাক হয়ে সবাই মিস্পন্দ হয়ে গেলেও আলগোছে ডান হাতটা নেমে যাচ্ছে ওর জুতোর দিকে। নিখোর চোখের দৃষ্টি আর হাতের রিভলভারের নল সরাসরি তাকিয়ে আছে ডক্টর সাদেকের মুখের দিকে।

জুতোয় হাত ঠেকতেই কাঁধে স্পর্শ অনুভব করল রানা। স্থির হয়ে গেল হাত। খোঁচা লাগছে কাঁধে। ঠাণ্ডা স্পর্শ।

'খবরদার।' কর্কশ গলা এল পিছন থেকে। ঘাড়ের চামড়া ভেদ করে সামান্য একটু ঢুকে গেছে ছোরার নখ। ঘাড় ফিরিয়ে তাকান না রানা। পিছন থেকে দ্বিতীয় গলা শোনা গেল, 'হাত তোলো।'

কোনও চালাকি চলবে না বুঝতে পারল রানা। মাথার উপর হাত তুলল ও। কে যেন গলা চিরে চিৎকার করে উঠল। পাত্রপক্ষের কে যেন গলা চেষ্টিয়ে বলে উঠল, 'বাঁচাও বাঁচাও! ডাকাত...বাঁচাও!'

গুলির শব্দ শোনা গেল তারপর। নিঃশব্দ হয়ে উঠল রুম আবার। রশির বাঁধন এঁটে বসল হাত দুটোয় রানার। নিখোঁটা রুমের ভিতর ঢুকে ডক্টর সাদেককে রিভলভারের নল দিয়ে ইঙ্গিত করল। আড় চোখে তাকান ডক্টর সাদেক মায়ের দিকে। সাদা কাগজের মত হয়ে গেছে মুখ বৃদ্ধার, 'এসব...বাবা মাসুদ... কে ও।' বৃদ্ধা জ্ঞান হারিয়ে ঢলে পড়ল হাসিনার কোলে।

আবার গুলি করল নিখোঁটা। এবারও ডক্টর সাদেকের মাথার এক ইঞ্চি উপর দিয়ে গুলি ছুটে গিয়ে বিঁধল দেয়ালে। রানাকে ছেড়ে দিয়ে লোক দু'জন ডক্টর সাদেকের দু'পাশে গিয়ে দাঁড়াল। সকলের অজান্তে দ্বিতীয় দরজাটা দিয়ে রুমে ঢুকেছে।

কোনও কথা হলো না। ডক্টর সাদেককে নিয়ে বেরিয়ে গেল ওরা। সবার পিছনে নিখোঁটা। বাইরে থেকে দরজার শিকল তুলে দেবার সময় রানার দিকে তাকিয়ে কুৎসিতভাবে চোখ টিপল সে।

আর্তনাদ, চিৎকার, কান্না, প্রলাপ আর হটোপুটি শুরু হয়ে গেল সাথে সাথে রুমের ভিতর।

বাঁধন খুলে রানা যখন তিন ভাইকে নিয়ে বাড়ির বাইরে এসে দাঁড়াল তখন কেউ নেই আশপাশে। গাড়িতে চড়ার আগেই রানা বলে উঠল, 'কাঁচা

শোক নয় ওরা। পাড়ির ঢাকার বাতাস ছেড়ে দিয়ে গেছে।’

গট গট করে পা ফেলে অফিসে ঢুকল রানা। তাকাল না কারও দিকে চোখ তুলে। সোজা ঢুকল নিজের রুমে। রিসেপশনিস্ট মেয়েটির সাথে গল্প করছিল সোহানা। মুখ তুলে যেতে দেখল ও রানাকে। রুমের বন্ধ হয়ে যাওয়া দরজাটার দিকে হতবাক হয়ে তাকিয়ে রইল ও।

সোহানা ভিতর ভিতর রাগে ফুলে আছে বেলুনের মত। রাগ ঝাড়ার দিন আজ ভেবেছিল ও। ও জানে রানার ছুটি শেষ হয়ে গেছে কাল। ছুটি নেবার দিন রানার ব্যবহারের কোনও সংগত কারণ আজ পর্যন্ত খুঁজে পায়নি সোহানা। ক্রাবে অপেক্ষা করছিল সে। রানার পৌছুবার কথা ছিল ছটার মধ্যে। অথচ রাত সাতটা অবধি অপেক্ষা করেও দেখা পায়নি ও রানার। পরদিন সকালে বাড়িতে গিয়েছিল জবাবদিহি চাইতে। পায়নি ও রানাকে সেদিন। তারপরও গেছে সোহানা। কিন্তু রানাকে গত দশ দিন একবারও বাড়িতে পায়নি ও। ভেবেছিল কথা বলবে না ও রানার সাথে। কিন্তু রাগের কথা ভুলে চিন্তিত হয়ে উঠল মনে মনে সোহানা। এমন অস্বাভাবিক ব্যবহার কখনও দেখেনি রানার। কি হয়েছে লোকটার?

দরজায় টোকা পড়ল। রেহানা ক’দিন থেকে ছুটি নিয়েছে। রানা ডাকল, ‘এসো।’

সোহানা দরজা খুলে দেখল টেবিলের উপর পা তুলে দিয়ে সিগারেট টানছে রানা সিলিঙের পানে চোখ তুলে। পাশে গিয়ে দাঁড়াল সোহানা। কেমন যেন অস্বাভাবিক ঠেকল রানার চোখের দৃষ্টি। জিজ্ঞেস করল সোহানা, ‘এতদিন কোথায় কোথায় ঘুরেছ তুমি, রানা? কি হয়েছে বলো তো তোমার?’

চোখ নামিয়ে সোহানার মুখপানে তাকিয়ে রইল রানা। তারপর বলল, ‘আমি দুঃখিত, সোহানা। সেদিন তোমাকে কথা দিয়ে রাখতে পারিনি। কিছু মনে করো না। একটা কাজে আটকা পড়ে গিয়েছিলাম হঠাৎ।’

অভিমান উথলে উঠল সোহানার নরম নরম কথা শুনে। ফাঁস করে উঠল ও, ‘কি এমন কাজ সেটা শুনি? জানো আমাকে একা দেখে ক্রাবের অন্য সব মেয়েরা কেমন করুণ চোখে তাকাচ্ছিল। সবাই এসেছিল সঙ্গী নিয়ে, আর আমি...’ মাকপথে খেমে গিয়ে গোমড়া মুখ করে তাকিয়ে রইল সোহানা। রানা বলে উঠল, ‘ক্ষমা করে দাও এবার আমাকে। কিন্তু সত্যি হঠাৎ একটা কাজে জড়িয়ে পড়েছিলাম আমি। এখনও কিছুই করতে পারিনি সেটার।’

‘আমাকে বলবে?’

‘কেন বলব না, কিন্তু...’ রানা ইন্টারকমের শেষ বোতামটা টিপে বলল, ‘কফি, দুটো।’

‘তোমার অর্ধাঙ্গিনী কই?’ রেহানার কথা জিজ্ঞেস করল সোহানা।

মুচকি হাসল রানা। বলল, ‘আমার সামনে বসে রয়েছে।’

পাল্টা রসিকতায় অপ্রতিভ হয়ে পড়ল সোহানা। কিন্তু উত্তর দেবার আগেই শব্দ উঠল ইন্টারকমে। মেজর জেনারেল রাহাত খানের যান্ত্রিক গলা

ভেসে এল, 'রানা, আমার রুমে এসো।'

রাহাত খানের ডেস্কের উপর খোলা ফাইল দেখতে না পেয়ে তীক্ষ্ণ হয়ে উঠল রানার অনুভূতি। তার মানে সব কাজ সରିয়ে রেখেছে রানার সাথে কথা বলবার জন্য।

'বসো।' নিভে যাওয়া চুরুটে অগ্নিসংযোগ করলেন রাহাত খান। কোন শব্দ না করে মুখোমুখি চেয়ারটায় বসল রানা।

'এদেরকে চেনো?' একটা কাগজের টুকরো বাড়িয়ে দিলেন রাহাত খান রানার দিকে। হাত বাড়িয়ে সেটা নিয়ে পড়ল রানা। বারোজন লোকের নাম। সবাই বিদেশী। নামগুলো পড়তে পড়তে শ্বাস-প্রশ্বাস দ্রুত হলো রানার। ব্যাপার কি! সবাইকে চেনে না রানা। কিন্তু পলো নারডনোচি, প্রফেসর অ্যান্টন নোভেনিক, হবার্ট ডনফিল, আলভারেজ সিনরোকে না চেনবার প্রবল ইচ্ছা উঠে না। জগদ্বিখ্যাত বিজ্ঞানী ওরা।

'সবাইকে চিনি না। নাম শুনেছি পলো নারডনোচির, রোমের রকেট ফুয়েল এক্সপার্ট। অ্যান্টন নোভেনিক, চেকোস্লোভাকিয়ার রসায়ন বিশেষজ্ঞ। আলভারেজ সিনরো, বাজিলের অ্যাটমিক পাওয়ার অর্গানাইজেশনের প্রেসিডেন্ট। হবার্ট ডনফিল, আমেরিকার লেসার গবেষক। সান জিয়াও—'

'ডক্টর সাদেককে মনে আছে তোমার?'

চমকে উঠে তাকাল রানা। তাকিয়ে আছেন রাহাত খান। রানা বলে উঠল, 'জী, আছে স্যার। মাইক্রোবায়োলজিক্যাল রিসার্চ সেন্টারের এক নম্বর ল্যাবে কাজ করত। পৃথিবীর অনেকগুলো এ্যাসট্রোনমিক্যাল এসোসিয়েশনের মেম্বর।'

'আজ থেকে দশদিন আগে কিডন্যাপ করা হয়েছে ডক্টর সাদেককে।'

রানা কথা বলে উঠতে চাইলে রাহাত খান হাত দেখিয়ে থামিয়ে দিলেন ওকে, 'লিস্টের বারোজন সাইন্টিস্টের মধ্যে এগারোজন গত দু'মাসে বিভিন্ন দিনে নিখোঁজ হয়েছে। প্রায় সব দেশের বড় বড় সাইন্টিস্ট এদের মধ্যে আছে। কেউ বলতে পারছে না কোথায় গেছে ওরা। পুলিশ, ইন্টেলিজেন্স বাধ্য হন্যে হয়ে খুঁজে বেড়িয়েছে। কিনারা করতে পারেনি।' চুরুট জ্বাললেন রাহাত খান, 'রিপোর্ট পাচ্ছিলাম আমরা গত মাস থেকে। সাহায্যের আবেদন ক্রমাগত আসছিল। সিরিয়াসলি নিইনি আমরা ব্যাপারটাকে আগে।'

রানা বলে উঠল, 'ডক্টর সাদেক কিডন্যাপড হবার পর?'

'হ্যাঁ,' রাহাত খান রানার কথার খেই ধরে বললেন, 'ডক্টর সাদেকের অন্তর্ধানের পর আমরা আর চুপ করে বসে থাকতে পারি না। অপারেশন শুরু হয়ে গেছে। কিন্তু রেজাল্ট পাওয়া যাচ্ছে না। যাবেও না। কোন সূত্র না পেলে কিভাবে এগোনো যায়। গত সপ্তাহের প্রথম দিকে খবর পেয়েছি হবার্ট ডনফিলের। আমেরিকা থেকে নিখোঁজ সে।'

SECRET লেখা একটা ফাইল বের করে বাড়িয়ে দিলেন রানার দিকে, 'এটা পড়তে পারো। বিশেষ সাহায্য পাবে না। বারোজন সাইন্টিস্টের জীবনী

পাবে শুধু। ফিউ ইয়র্ক, মস্কো, পিকিং, রোম, নয়াদিল্লী—সব জায়গা থেকে পাওয়া রিপোর্টের কপি আছে ওতে।’

‘ভারত থেকেও...?’

‘কয়েকজন। বুঝতেই পারছ শত্রুপক্ষ পরিচিত নয়। কেউ বা কোন দল প্রতিভাবান মাথা চুরি করেছে। এই অপারেশনে দ্রুত কাজ করতে হবে তোমাকে, রানা। অপেক্ষা করবার মত সময় নেই। চারদিকে লাল সিগন্যাল জ্বলে উঠেছে।’ রিপোর্ট করলেন মেজর জেনারেল শেষ শব্দটি।

রানা চুপ করে রইল।

‘ডক্টর সাদেককে ফিরে চাই আমরা। তোমার অনুসন্ধান শুরু হবে শেষ নিখোঁজ সিস্টেমের সূত্র ধরে। হুবার্ট ডনফিল। ফাইলে ওর সম্পর্কে সব কথা পাবে। ফাইলে যা নেই তা শোনো।’ রাহাত খান একমনে চুরুট টানলেন খানিকক্ষণ। তারপর বললেন, ‘সবার চেয়ে বিপজ্জনক ডনফিল। আলাবামার লেসার ল্যাবরেটরির গবেষক সে। কোনও পাগলের হাতে পড়ে সে যদি নিজের ব্লেন তার কাজে লাগায় তাহলে দুনিয়াকে চব্বিশ ঘণ্টার মধ্যে ছাই করে দিতে পারে সেই পাগল। ডনফিলকে মুক্ত করে আনতে না পারলে যা ভাল মনে হয় করবে তুমি।’

‘মানে!’ রানা নিজেই চুপ করে গেল। রাহাত খান চুরুটের ছাই ঝাড়তে ঝাড়তে বললেন, ‘মেরে রেখে এসো।’

## দুই

লন্ডন যাবার পথে ফাইলটা পড়ল রানা। হুবার্ট ডনফিলের সম্পর্কে সব তথ্য মুখস্থ হয়ে গেল ওর। ল্যাবরেটরিতে গিয়ে ফাইলটা কুটিকুটি করে আটলান্টিকের উপর উড়িয়ে দিল ও।

লন্ডনের টিকিট পেয়ে অবাক হয়েছিল রানা। পরে জানানো হয় ব্যাপারটা ওকে। ডনফিল আলাবামা থেকে লন্ডন, সেখান থেকে এডেনবার্গ, ওখান থেকে মিউনিক গিয়েছিল।

লন্ডনের রিসার্চ টেকনিশিয়ানদের সাথে আলাপ করে কিছুই অবগত হলো না রানা। এডেনবার্গে এসে গুজব শুনল মিউনিকে অ্যারেস্ট করা হয়েছে ডনফিলকে। কিন্তু এমন একজনকেও পাওয়া গেল না যে দেখেছে BEA জেটে ডনফিল চড়েছে মিউনিকে যাবার জন্যে। জার্মানীর দিকে মোড় নিল রানা।

হুবার্ট ডনফিলের জীবন বড় বেশি অপরিচ্ছন্ন। পূর্ব জার্মানে জন্ম ওর। কুড়ি বছর আগে নিষ্ঠুর একটা খুন করে দেশ থেকে পালায় সে। কুৎসিত জঘন্য একটা খুন সেটা। ডনফিল খুন করে নিজের ভাইকে। দেশ থেকে পালাবার সময় দু’বছরের মাতৃহীন মেয়েটাকেও সঙ্গে নিয়ে যায়নি সে। সে জানত না

মেয়েটি বেঁচে আছে কিনা। কিন্তু মাত্র কিছুদিন আগে সেই মেয়ে চিঠি পাঠায় বাপকে।

আমেরিকা সরকার সিটিজেন করে নিয়েছিল ডনফিলকে নিজের স্বার্থে। ডনফিল যে অফিশিয়ালি নাজী গিলটি তাও অজানা ছিল না কারও। কিন্তু গত কুড়ি বছর ধরে কেউ জানত না ডনফিলকে কোথায় রাখা হয়েছে।

অ্যাঙলো-আমেরিকান রিসার্চ কনফারেন্সে যোগ দেবার জন্যে লন্ডন আসে সে। লন্ডন থেকেই আমন্ত্রণ পায় এডেনবার্গ ইউনিভার্সিটিতে লেসারের উপর লেকচার দেবার। এডেনবার্গে লেকচার দেবার পর তার খবর কেউ বলতে পারেনি।

মিউনিকে নেমে এয়ারপোর্টে দেখা পেল রানা কাউন্টার ইন্টেলিজেন্স মিউনিক ব্রাঙ্কের অপারেটর ইউনুসের। খবর পাওয়া গেল তার কাছে। জার্মান ফেডারেল অথোরিটি হবার্ট ডনফিলকে ওয়ার ক্রিমিন্যাল হিসেবে অ্যারেস্ট করার একদিন পর জেল থেকে পালিয়েছে সে। তারপর তার আর কোন খবর নেই গোটা পশ্চিম জার্মানিতে।

এয়ারপোর্ট থেকেই বিদায় দিল ইউনুসকে রানা।

এক ঘণ্টার মধ্যেই ওকে অনুসরণ করা হচ্ছে বুঝতে পারল রানা। ওকে লক্ষ্য করতে যাতে অসুবিধে বোধ না করে মেয়েটি তার জন্যে সতর্ক রইল ও। এত তাড়াতাড়ি অনুসরণ করছে দেখে সন্তুষ্ট বোধ করছে রানা।

মেয়েটিকে বিপজ্জনক বলে মনে হলো না প্রথমে রানার। বাজে টেকনিক ফলো করছে। তা না হলে ওর চোখে ধরা পড়ে গেল কেন?

মিউনিকের বিলাসবহুল হোটেল প্লাজা ইন-এ উঠল রানা। সন্ধ্যা ঘনিয়ে না আসা অবধি বারে কাটাল সময়টা। রুমে গেল ছ'টার পর। মেয়েটি ঠিকই দেখে গেল রুমটা। রানার সঙ্গে সে-ও বারে সময় কাটাল।

সন্দেশটা হলো রানার ডিনার খেতে নিচে নামার পর। রানা টেবিলে বসতেই মেয়েটিকে ঢুকতে দেখা গেল হলে। কয়েকটা টেবিলের পর একটায় বসল সে। ভাল করে দেখে নিল রানা। একহারা গড়নের ইউরোপীয় মেয়ে। চোখে চশমা। গ্লোভ পরা হাত দুটো থেকে থেকে কচলায় পরস্পরকে। গায়ের রঙ পুড়ে তামাটে হয়ে গেছে। মিডল ইস্টের মরুভূমিতে অনেকদিন কাটিয়েছে হয়তো। এত সহজে ওকে ধরা গেল কেন? মনে মনে সন্দেশ জাগল রানার। ধরা পড়ার জন্যে ঐ ইচ্ছায় এমন অমনোযোগী নয়তো মেয়েটি?

ডিনার খেয়ে ব্যাভারিয়ান নাচ গানকে উপেক্ষা করে বাইরে বেরিয়ে পড়ল রানা। যা আশা করেছিল তাই। তাকে অনুসরণ করে পিছন পিছন এল মেয়েটি।

প্রাচীন ব্যাভারিয়া ডিউকদের বাসস্থান Alter Hof-এ চলে এল রানা হাঁটতে হাঁটতে। খানিকক্ষণ ঘোরাঘুরি করার পর উজ্জ্বল আলোয় ঝলমল করা Marienplatz-এর দিকে পা বাড়াল ধীরে ধীরে ও। জায়গাটা মিউনিকের কেন্দ্রস্থল। সত্যি তাক লাগাবার মত। এমন আলোক সজ্জা পৃথিবীর আর

কোথাও আছে কিনা সন্দেহ। ডেকোরেশন এখানে সবচেয়ে গুরুত্বপূর্ণ স্থান পেয়েছে। নানা কিরণমালার বর্ণচ্ছটা উপরে নিচে ডানে বাঁয়ে। ডিপার্টমেন্টাল স্টোরগুলো সংখ্যায় অগুণতি। স্টোরগুলোর চিত্তাকর্ষক হাজার হাজার আসবাব আর দ্রব্য অদ্ভুত রূপ পেয়েছে সাজানোর কৌশলে। একটি দোকানের শো কেসে একদল প্রমাণ সাইজের বাঁদর মাথা নেড়ে লেজ দুনিয়ে ধূমপান করছে। সবক'টা চেইন স্মোকার। ব্যাপারটা বিশেষ একটি সিগারেটের বিজ্ঞাপন। রাস্তা অতিক্রম করল রানা। মেয়েটি ইতোমধ্যে স্টোরগুলোর চাকচিক্যে ক'মুহূর্তের জন্যে নিজেকে হারিয়ে ফেলেছে। কিন্তু বেশিক্ষণ আনমনা রইল না সে।

রাস্তা টপকে একটা বারে ঢুকল রানা। পিছনের দরজা দিয়ে বেরিয়ে আবার সামনের দরজার সামনে এসে দাঁড়াল ও। শিকারীকে শিকারে পরিণত করার ইচ্ছা ওর।

মিডিয়াভ্যাল ডোরওয়ার ফাঁক দিয়ে রানা দেখল কালো রিমের চশমাটা খুলছে মেয়েটি বারের ভিতর দাঁড়িয়ে। ভিতরে রানাকে দেখতে না পেয়ে ড্যানিটি ব্যাগে চশমাটা ভরে রাখতে রাখতে বেরিয়ে এল সে বাইরে।

মেয়েটিকে অনুসরণ করা খুব সহজেই সম্ভব হলো। অন্য কোথাও গেল না সে। সিধে পৌছুল প্লাজা ইন-এ। মেয়েটি আবার সেই বারে বসল। রানা ব্যাক ডোর দিয়ে হাজির হলো ম্যানেজারের প্রাইভেট রুমে।

খুব বেশি কথা জানা গেল না মেয়েটি সম্পর্কে। নাম: মিস্ ক্যারল লিসিল। ব্রিটিশ পাসপোর্ট আছে সঙ্গে। প্লাজা ইন-এর থার্ড ফ্লোরের আড়াইশো নম্বর রুমে থাকছে গত দু'সপ্তাহ ধরে। সেই রাতেই হোটেল ত্যাগ করল রানা পিছন দরজা দিয়ে।

মিউনিকের বৃহত্তম হোটেল Bayerischer Hof-এ ঘুম ভাঙল পরদিন রানার। ব্রেকফাস্ট সেরে ইউনুসকে ফোন করল ও। তারপর ইন্টারকম টিপে লন্ডন টাইমস আর হেরাল্ড ট্রিবিউনের প্যারিস সংস্করণ পাঠাবার নির্দেশ দিল রুম সার্ভিসকে।

কাগজে খবর নেই। ডনফিলের আগমন, যেকতার, পলায়ন—সব খবরই উদ্বেজনা হারিয়ে ফেলেছে ইতোমধ্যে। প্রাক্তন নাজী অপরাধী প্রায়ই ধরা পড়ে। জার্মান ট্রাইবুনালে বিচার হয় তাদের। নতুনত্ব নেই কিছু।

রানা অপেক্ষা করছিল ওয়েস্ট জার্মান ফেডারেল ইন্টেলিজেন্স সার্ভিসের জেনারেল ইসপেক্টর বেলচার ফোনের। কিন্তু ফোন নিঃশব্দ।

ব্যাপারটা ভাল ঠেকল না রানার।

ইউনুস পৌছুল। মেয়েটির কথা শুনে বেরিয়ে গেল ও। ঘন্টাখানেক পর ফিরল আবার। বলল, 'ক্যারল লিসিল লন্ডন ইউনিভার্সিটির এম. এ.। ব্রিটিশ সিটিজেন। আরকিওলজিস্ট। মিডল ইস্টে প্রায়ই গিয়ে কিছুদিন করে থাকে। বসন্তের ছুটিতে বেড়াতে এসেছে এখানে। দু'সপ্তাহ হলো এসেছে মিউনিকে। তার মানে ড. ডনফিল পৌছুর আগাই। অর্থবহ, স্মার?'

'হয়তো। ব্রিটিশ M. I. 6 কি বলে? ওদের হয়ে কাজ করছে নাকি?'

রানা জানতে চাইল।

‘চেক করেছি। ওরা স্বীকার করেনি। কলা যায় না, কালই হয়তো স্বীকার করবে। ওরা এভাবেই কাজ করে। এক কাজ করব, স্যার? নিয়ে আসব ওকে? এনে জিজ্ঞেস করা যায় কেন ইন্টারেস্টেড সে আপনার প্রতি?’

ইউনুসকে আপাতত বেকার করে দিয়ে বলল রানা, ‘না। ও কাদের হয়ে কাজ করছে তাই শুধু জানতে চাই আমি।’

‘কারুরই কাজ করছে না, যত্ন মনে হয়।’

রানা বলল, ‘আরও ভাল করে খবর নাও, ইউনুস।’

ইউনুস চলে গেলে দেড়ঘণ্টা পর এগারোটা সাতাশে ফোন বাজল।

‘হের মাসুদ রানা?’

‘বলছি।’ জার্মান বলল রানা।

‘দেবির জন্যে ক্ষমা চাইছি, হের মাসুদ রানা। ব্যাপারটা বুঝবেন আশা করি। বড় ব্যস্ত এখন আমরা।’

‘ব্যস্ত আমরা সবাই। যাক। কথাবার্তা টেপ করছেন কি?’

‘ইট ইজ রুটিন, স্যার, যাতে আমাদের সহযোগিতা সম্পর্কে ভুল বোঝাবুঝি না হয় ভবিষ্যতে।’ বেলচা দম নিল, ‘আমরা মিথোজ প্রিজন গার্ডটাকে পেয়েছি যে মি. ডনফিলকে পালাতে সাহায্য করেছিল। কিন্তু দুঃখের বিষয় লোকটা মৃত।’

অবাক হলো রানা, ‘মার্ডার?’

‘না। সম্ভবত সুইসাইড।’

‘লাশ দেখতে চাই আমি।’

‘ন্যাচারেলি। আমি কয়েক মিনিটের মধ্যেই আসছি আপনার হোটেলে।’

ইমপেক্টর জেনারেল ফ্রাঙ্ক বেলচাকে কালো মার্সিডিজ সিডানে করে নিয়ে এল শোফার। সেন্টেম্বরের রৌদ্রকিরণে বিরক্ত দেখা গেল তাকে। রানা পাশে উঠে বসতে মিউনিকের অভিজাত এলাকার একটি ঠিকানা বলল সে শোফারকে।

সাধারণ উচ্চতা জেনারেল বেলচার। মাথাটা প্রকাণ্ড। কোমর আর পেট পাল্লা দিয়ে ফুলে উঠেছে। ছোট্ট নাক। লোকটার জডিস আছে কিনা সন্দেহ হলো রানার। চোখ দুটো হলুদ। গ্রে রংয়ের স্যুটের সাথে নীল ফুটকিঅলা টাই পরেছে। সব একটা ছড়ি হাতে। সব মিলিয়ে ভদ্রলোককে ফ্রেডারিক দ্য থার্ডের আমলের নাগরিক বলে মনে হয়।

ভারী গাড়িটা সাবলীল বেগে ছুটে চলেছে। জেনারেল বেলচা রিয়্যার সীটে আর ড্রাইভারের মাঝখানে স্লাইডিং গ্লাস তুলে দিয়ে বলল, ‘সম্পূর্ণ সাউন্ড প্রফ এদিকটা, হের রানা। মন খুলে কথা বলতে পারেন।’

দরজার ফ্লাওয়ার ভাস থেকে ফুলগুলো তুলে নিয়ে ভিতর থেকে একটা ক্ষুদ্রাকৃতি মাইক্রোফোন বের করে সেটা দেখতে দেখতে বলল রানা, ‘গাড়ির বুটে টেপ রেকর্ডারটা বুঝি?’

জেনারেল বেলচা হাসল। নীল ফুলগুলো নিয়ে কোলের উপর ফেলে

বলল, ‘আমাদেরকে সব আলোচনার অফিশিয়াল ডকুমেন্ট রাখতে হয়, মাই ডিয়ার হের মাসুদ রানা।’

‘কিন্তু এখানে অফিশিয়ালি আসিনি আমি। হুবার্ট ডনফিলকে খুঁজতে আর তাকে আলাবামায় ফিরিয়ে নিয়ে যেতে এসেছি।’

‘আপনার হাতে মি. ডনফিলকে তুলে দিতে পারলে যার পরনাই আনন্দিত হতাম, হের রানা।’ জেনারেল বেলচার চোখে কৌতুক, ‘কিন্তু ইউ.এস. সরকার একজন ওয়ার ক্রিমিন্যাল সম্পর্কে এতটা দয়াপরবশ কেন?’

‘ইউ.এস. সরকার হাতের কাছে যা পান তাই দিয়ে কাজ করে যাবার নীতিতে বিশ্বাসী। গত আঠারো বছর ধরে ডনফিল আলাবামায় কাজ করছিল একজন অপটিক্স এক্সপার্ট হিসেবে। এর বেশি কিছু জানে না ইউ.এস. সরকার। সে তার কাজে একনিষ্ঠ ছিল। কোনও রেকর্ড নেই তার মেয়ে এখানে বেঁচে আছে কি নেই।’

‘মি. ডনফিল নাকি রিমার্কেবল উন্নতি করেছেন লেসারের। তাঁকে ফাদার অভ দ্য ডেথ রে বলা হয়।’

রানা কথা বলল না। জেনারেল বেলচা বলে চলল, ‘আমরা তুল একটা ধারণা করে ঘুমোচ্ছিলাম এতদিন। রাশিয়া মি. ডনফিলকে লুকিয়ে রেখেছে মনে করে ওঁর ফাইলটা ক্রোজ করে দিয়েছিলাম। ধাঁধাটা হচ্ছে এই যে জার্মানীতে এলেই আমরা তাঁকে যুদ্ধ অপরাধী হিসেবে গ্রেফতার করব একথা জানার পরও তিনি এলেন কেন! ওরকম নিষ্ঠুর লোক শুধু মাত্র মেয়ের খাতিরে এতবড় রিস্ক নেবেন তা আশা করতে পারিনি।’

‘ইউ.এস. সরকারের ধারণা ডনফিলের কোন অপরাধ নেই। তার মেয়ে বেঁচে আছে একথারও কোন রেকর্ড নেই ওদের কাছে। ডনফিল যদি অপরাধী হত তাহলে, কুড়ি বছর আগেই নাম বদলে নিত।’

‘কিন্তু তার নিজের মেয়েই অভিযোগ করেছে, মাই ডিয়ার ফেলো! আমরা জানি ডনফিল মেয়ের কাছে গিয়ে দেখা করেছিলেন। বাপের মুখের ওপর মেয়ে বলেছে তুমি আমার বাবা নও। যে লোক পোল্যান্ডের প্রিজন-ক্যাম্প ইলেকট্রনিক এক্সপেরিমেন্ট চালাতে পারে সে আমার জনক হতে পারে না।’

‘এই অভিযোগের রেকর্ড আছে আপনাদের হাতে?’

‘নিশ্চয়। কিন্তু আমরা ভেবেছিলাম হয় তিনি মরে গেছেন নয়তো রাশিয়ায় আছেন।’ জেনারেল বেলচা সিগারেট বের করে ধরল নিকোটিনের দাগঅলা আঙুলে, ‘তার মেয়ে বাপকে ও কথা বলেই থামেনি। হেডকোয়ার্টারে ফোন করে পুলিশকে জানায় বাপের উপস্থিতি। সাংবাদিকদেরকেও ডাকে। অ্যারেস্ট না করে কি করি বলুন?’

‘হু,’—রানাকে চিন্তিত দেখাল, ‘জৈলে একদিন কাটাবার পর হ্যানস্ ডর্পলার নামে একজন গার্ডের সাহায্যে পালায় ডনফিল, তাই না? ডর্পলার প্রাক্তন SS সার্জেন্ট। সেও লাপাত্তা হয়?’

‘হ্যাঁ, হের রানা।’

‘ডনফিলের কোনও খবর নেই তারপর থেকে?’

‘না। তবে আজ সকালে হ্যান্স ডর্পলারকে পেয়েছি। যার নাম উল্লেখ করলেন আপনি।’

‘এই ডর্পলার সুইসাইড করেছে? শিওর?’

‘ইয়েস, হের রানা।’

## তিন

জেনারেল বেলচা ডনফিলের ফাইল ক্রোজ করে রেখেছিল। কিন্তু বাপের সব কথা জানল কিভাবে ডনফিলের মেয়ে? ডনফিল যখন দেশ ছেড়ে পালায় তখন সে একেবারে শিশু। কেউ নিশ্চয় সরবরাহ করেছে সব খবর তাকে। বেলচা?

জেনারেল বেলচা কি জানত সব কথা? জানলে জার্মান ইন্টেলিজেন্স সার্ভিস চোখকান বুজে ছিল কেন এতদিন? ডনফিলের কথা ভাবতে গিয়ে আবার বিস্ময়বোধ করল রানা। লোকটা দোষী হলে জার্মানী এল কেন! নামই বা বদলায়নি কেন এতদিনে?

রানা দেখল ডনফিলের জার্মানী আগমন, কার্যকলাপ, গ্রেফতার আর পরিকল্পিত পলায়ন—সবই জটিল। এর পিছনে কেউ কলকাঠি নাড়ছে। অন্যান্যরাও নিরুদ্দেশ হয়েছে ব্যক্তিগত সমস্যায় জড়িয়ে পড়ার পরবর্তী সময়ে। কিন্তু—কোথায় যাচ্ছে সবাই নিখোঁজ হয়ে?

কোনও ধারণা নেই রানার। জেনারেল বেলচা সম্পর্কে সন্দিহান হয়ে রইল রানা। লোকটা হয়তো অনেক কিছু জানে।

Deutsches Science Museum ডানে রেখে গাড়ি মোড় নেবার সময় পিছনে তাকাল রানা। একটা লাল VW অনুসরণ করে আসছে মাঝ শহর থেকে। শহরতলির দিকে ছুটে চলেছে সিডান। একটা ইন্টার ব্রিজ অতিক্রম করে মোড় নিল দু’পাশে উঁচু উঁচু গাছালা অপেক্ষাকৃত সরু রাস্তায়। খানিকপর জলাভূমি পড়ল দু’পাশে। তারপর বন এলাকা। বনের মাঝখানে মিডিয়াভাল গেট দেখা গেল প্রকাণ্ড একটা বাড়ির। বেলজিয়ান কেবল দিয়ে ঘেরা গোটা বাড়িটা। সরু লম্বা জানালাগুলোর কাছে রোদ প্রতিফলিত হচ্ছে। গাড়ি দাঁড়িয়ে পড়তে জিজ্ঞেস করল রানা, ‘এটা কোন্ জায়গা?’

‘হাসপাতাল একটা। যাদের ডিফেক্ট আছে তাদেরকে রাখা হয় এখানে।’ গাড়ি থেকে নামতে নামতে বলল জেনারেল বেলচা। লেদার গ্যাপ্রন পরা একজন লোক আর একজন পুলিশ অফিসার সেন্ট্রাল ডোর খুলে বেরিয়ে এল। জেনারেল বেলচা রানার দিকে ফিরে বলল, ‘কনসেনট্রেশন ক্যাম্পের ভিকটিমদের জন্যে তৈরি করা হয়েছিল এটা। তারপর তাদের আর তাদের প্রতি নির্ভরশীলদের জন্যে হাসপাতাল হিসেবে চালু করা হয়েছে এটাকে।’

‘ডর্পলারকে পাওয়া গেছে এখানে?’ রানা প্রাপ্ত রিপোর্টগুলো স্মরণ করতে করতে বলল, ‘মিস বনবন ডনফিল জড়িত এই হাসপাতালের সাথে?’

‘হ্যাঁ, কাগজগুলোয় উল্লেখ ছিল বটে। আজ সকাল ছ’টায় হ্যান্স হর্পলার মিস বনবনের অ্যাপার্টমেন্ট থেকে লাফিয়ে পড়ে। এই এস্টেট বনবনের প্রপিতামহের ছিল আসলে। এখানকার চীফ মেডিক্যাল অ্যাডমিনিস্ট্রেটরের সাথে কাজ করত ও। খুব ভাল মেয়ে। সন্তায় সন্তায় বাড়িতে থাকত ছুটি কাটাবার জন্যে। কিন্তু বাড়িটা সরকার তাল্লা-বন্ধ করেছে ক’দিন আগে। ডনফিলের সেটা।’ কাঁধে টাই উড়িয়ে, ছড়ি দোলাতে দোলাতে বিরাট বপু উঁচিয়ে ভিক্টোরিয়ান ড্যাভিদের চালে এগিয়ে চলল জেনারেল বেলচা। দরজা দিয়ে হলরুমে পা দিতে একজন সার্জেন্ট নেমে এল তরতর করে সিঁড়ি বেয়ে।

‘ছ’টায় ডর্পলার ঝাঁপ মারে মিস বনবনের টাওয়ার অ্যাপার্টমেন্ট থেকে, হের ইন্সপেক্টর জেনারেল। মিস বনবনের সাহায্য চেয়েছিল সে। মি. ডনফিলকে পালাতে সাহায্য করে তাকে কোর্ট মার্শাল থেকে আর নাজী আদর্শকে অপমানিত হতে দেয়া থেকে বাঁচিয়েছে বলে দাবি করে সে। মিস বনবন তাকে সাহায্য করবে না একথা বোঝাবার পর, আর পুলিশে খবর দেয়া হবে জানতে পেরে টাওয়ার উইন্ডো থেকে লাফিয়ে পড়ে সে—মিস বনবন জানায়।’

‘দুঃখজনক।’ বিড়বিড় করে উঠল জেনারেল বেলচা। রানা জিজ্ঞেস করে, ‘মিস বনবন জানতে পারেনি কোথায় আছে তার বাবা?’

‘না, স্যার।’

‘ওর সাথে কথা বলতে চাই আমি।’

‘আমি দুঃখিত, স্যার। ওর এক সহকারীকে কথাগুলো বলে নিজের রুম থেকে নিচে নেমে আসে সে। সবাই তখন লাশের কাছে। নিজের গাড়ি নিয়ে চলে যায় মিস বনবন। মি. ডনফিলের মত সে-ও কমপ্লিট ভ্যানিশড।’

যেখানে পড়েছে সেখানেই সাদা কাপড় দিয়ে ঢেকে রাখা হয়েছে লাশটাকে। কাপড় সরানো হলে রক্ত দেখল রানা। কিন্তু মুখটা অক্ষত রয়েছে। ঠোঁট বেয়ে রক্ত বেরিয়ে জমাট বেঁধে গেছে শুধু। ডর্পলারের পরনে এখনও প্রিজনগার্ড ইউনিফর্ম। বসে পড়ল রানা মৃতদেহের পাশে। ঘ্রাণ নিল ও জোরে। বলল, ‘হ্যাশিন?’

‘সম্ভবত।’ ডর্পলারের পকেটে হাত ঢোকাল জেনারেল বেলচা। একটা কাগজের প্যাকেট পাওয়া গেল। আরবী লেখা প্যাকেটটায়। পকেট থেকে সামান্য কিছু টাকা ছাড়া কিছুই পাওয়া গেল না আর। উপর পানে চোখ তুলে টাওয়ারটা দেখতে দেখতে বলল রানা, ‘ডর্পলারের অ্যারাবিয়ান বন্ধু ছিল কিনা জানেন?’

‘চেক করব আমরা। বোঝা যাচ্ছে লাফিয়ে পড়ার সময় নেশাগ্রস্ত ছিল ও।’ জেনারেল বেলচা রানাকে সঙ্গে নিয়ে মিস বনবনের টাওয়ার রুমে উঠে এল। সিঁড়ির মুখে গার্ড। আর একজন মিস বনবনের রুমের দরজার সামনে।

রুমটা বড় নয় খুব। লম্বা, সরু সরু জানালা। বাইরের দিকের একটা জানালা এখনও খোলা। উঁকি মেরে লাশটা দেখল রানা নিচে। হ্যাশিসের গন্ধ এখনও ভেসে বেড়াচ্ছে রুমের ভিতর। জেনারেল বেলচা আধপোড়া

সিগারেটের একটা টুকরো মেঝে থেকে দু'আঙুলে ধরে তুলল। রানার দিকে বাড়িয়ে দিল সেটা। দেখল রানা। ঘাণ নিল জেনারেল টুকরোটায়। মাথা নাড়ল সবজাত্যার মত।

কিন্তু খুঁত খুঁত করতে লাগল রানার মন। ও অনুভব করল সব কিছুই যেন অত্যন্ত বেশি সহজ সরল। সবাই যেন ওকে সম্ভ্রষ্ট করার জন্যে অতিরিক্ত তৎপর।

লাঞ্ছের আগেই জেনারেল বেলচা হোটেলের নামিয়ে দিয়ে গেল রানাকে।

হোটেল ডেস্কে কোম মেসেজ নেই দেখল রানা। লাঞ্ছ করার সময় অনুসন্ধানী চোখ বুলিয়ে নিতে দেখল একজন লোককে রানা। কয়েকটা টেবিলের পরে বসেছে সে। জেনারেল বেলচার লোক। গুরুত্ব দিল না রানা। লাঞ্ছ শেষ করে পাবলিক বুদ থেকে ইউনুসের অটো এক্সপোর্ট এজেন্সিতে ফোন করল ও। ইউনুসকে সব জানিয়ে রানা বলল, 'মিস বনবন উত্তর দিতে পারে সব কথা। জেনারেল বেলচার আগে পেতে চাই ওকে আমি। আমার ধারণা ভয়ে পালিয়েছে সে।' ইউনুসকে কি কি করতে হবে বুঝিয়ে দিয়ে রিসিভার রাখল রানা।

কুড়ি মিনিট ধরে মিউনিকের পথে-ঘাটে হাঁটল রানা। কেউ অনুসরণ করছে না ওকে। প্লাজা ইন-এর বিপরীত ফুটপাথে এসে দাঁড়াল ও। ইউনুস শুরু করে দিয়েছে ইতোমধ্যে কাজ। ক্যারল লিসিল বেরিয়ে আসবে কিছুক্ষণের মধ্যে। ইউনুসের কাজ লিসিলকে গ্রেফতার করবার ভয় দেখানো।

তিন মিনিটের মধ্যে বেরিয়ে আসতে দেখা গেল লিসিলকে। গেটের বাইরে এসে রাস্তার দুদিক দেখল সে চঞ্চল চোখে। একটা ট্যাক্সি যাচ্ছিল। হাত নেড়ে সেটাকে দাঁড় করিয়ে দ্রুত চড়ে বসল সে।

পিছন পিছন ট্যাক্সি নিয়ে ইংলিশ গার্ডেন অবধি অনুসরণ করল ওকে রানা। মিনিট দশেক বসল লিসিল পার্কের একটা বেঞ্চিতে। তারপর হঠাৎ লাফ দিয়ে উঠে দাঁড়িয়ে বেরিয়ে এল বাইরে। ট্যাক্সি স্ট্যান্ড থেকে ট্যাক্সি নিল আবার। নদীর কিনারায় মধ্যবিশুদ্ধের অ্যাপার্টমেন্টগুলোর কাছে নামল লিসিল। দ্রুত রোকে ট্যাক্সি দাঁড় করাল রানা। ভাড়া মিটিয়ে দিয়ে দ্রুত পায়ে সরু একটা গলিতে ঢুকে অনুসরণ করে চলল লিসিলকে ও। বাঁ দিকের একটা বাড়ির ভিতর ঢুকে পড়ল লিসিল। পনেরো সেকেন্ড পর ভিতরে ঢুকল রানা।

লিসিলের হাই হিলের শব্দ হচ্ছে সিঁড়িতে। সিঁড়ি টপকাতে শুরু করল রানা। করিডরে উঠে লিসিলকে দেখতে পেল না রানা। কিন্তু একটা রুমের দরজা বন্ধ হয়ে যেতে দেখল ও।

রুমটার গায়ে কোনও নেম প্লেট নেই। বেল টিপে দাঁড়িয়ে রইল রানা।

বেশ খানিকটা সময় কেটে গেল। তারপর জুতোর শব্দ এল। খুঁট করে শব্দ হলো। সামান্য একটু ফাঁক হলো দরজা। মিস বনবন।

মেয়েটি রানাকে দেখেই দরজা বন্ধ করে দেবার উপক্রম করল। রানা বলে উঠল, 'মিস বনবন, লেট মি ইন।' হাত দিয়ে ঠেলে ধরল দরজার পাল্লা

রানা। নিঃশ্বাস বন্ধ করে দরজা বন্ধ করে দেবার চেষ্টা করছে বনবন। জোর দিয়ে কবাট দুটো খুলে ফেলে ভিতরে পা রাখল রানা, ‘ভয়ের কিছু নেই। তুমি আমাকে আশা করেছিলে, তাই না?’

‘তোমাকে আমি চিনি না।’ চাপা উৎকণ্ঠা প্রকাশ পেল বনবনের গলায়।

দরজা বন্ধ করে দিয়ে রানা বলল, ‘মিস লিসিলকে ডাকো। তাড়াতাড়ি। আমার কথা বলেনি ও তোমাকে কিছু?’

‘তুমি...মাসুদ রানা। তুমি?’

‘সন্দেহ কোরো না। ভয় পাবারও নেই কিছু। জেনারেল বেলচা এসব জানে না।’ বনবনের ডরাট মুখাবয়ব খুটিয়ে খুটিয়ে নিরীখ করছে রানা, ‘তুমি ভালই করেছ ওখান থেকে পালিয়ে এসে। বিপদ ঘটত কপালে ওখানে থাকলে। লোকটা খুন হবার পর ব্যাপারটা জটিল হয়ে পড়েছে। ব্যক্তিগতভাবে এখন কথা বলতে পারব আমরা তোমার বাবার বিষয়ে।’

‘কিন্তু আমি খুন করিনি ডর্পলারকে...’

‘বেশ তো; ভয় পাচ্ছ কেন? বসো। কথা বলতেই তো এসেছি। সব শুনব আমি। কিন্তু তার আগ কফি।’

প্রায় বাতিল একটা কাউচের উপর নানা রকম আসবাবের সাথে ট্রে রয়েছে একটা। কাপড়, ব্যাগ, জুতো, ফ্লাস্ক বিশৃঙ্খলভাবে রাখা হয়েছে। বনবনের লাবণ্যমাখা চেহারার সাথে বেমানান পরিবেশ। গোল কপাল বনবনের। সুন্দর করে কাটা চুল। লাল ঠোঁট দুটো উত্তেজনায় মৃদু কাঁপছে। সোনার চেইনের রিস্ট ওয়াচটা চোখে পড়ে ফর্সা গোলগাল হাতে। কফি বানাতে বানাতে দমকা নিঃশ্বাস ফেলছে ও শুনতে পেল রানা।

‘কিছু মনে কোরো না, প্লীজ,—কফির পেয়ালা সামনে ধরে ফ্যানফ্যান চোখ মেলে তাকাল বনবন, কটা দিন বড় আতঙ্কের মধ্যে দিয়ে গেছে। ডর্পলার লোকটা আজ সকালে ভয় পাইয়ে মেরে ফেলেছিল প্রায় আমাকে। তাই এখানে চলে আসি আমি। আমার এক বান্ধবীর অ্যাপার্টমেন্ট—সুইজারল্যান্ডে ছুটি কাটাতে গেছে সে। লিসিল সম্পর্কে...’

বন্ধ বেডরুমের দরজার দিকে না তাকিয়ে রানা বলল, ‘ওর কথা পরে হবে। আমার ধারণা লিসিলই তোমাকে প্রথম প্রস্তাব দেয় মি. ডনফিলের এখানে আগমনের ব্যাপারে?’

বনবন মাথা নাড়ল। রানা কাপে চুমুক দিয়ে একটা কাঠের চেয়ারে বসল। ‘ডর্পলার সম্পর্কে সব কথা জানতে চাই আমি। আজ সকালের ব্যাপারটাও পরিষ্কার করে বলো।’

‘ভয়ঙ্কর লোক ডর্পলার,—মৃদু গলায় বলল বনবন, ‘বাবাকে ওয়ার ক্রিমিন্যাল ট্রাইব্যুনাল থেকে বাঁচাবার জন্যে পালাতে সাহায্য করেছে বলে আমার কাছ থেকে প্রতিদান চায় সে। অস্বীকার যাই আমি। বলি, বাবা দোষী, সে উচিত শাস্তি পাবে। খেপে উঠতে থাকে সে। পাগল বলে ভুল হচ্ছিল ওকে আমার। বারবার বলে ওর সঙ্গে বিশ্বাসঘাতকতা করা হয়েছে।’

‘কে বিশ্বাসঘাতকতা করেছে?’

‘পরিষ্কার করে বলেনি সে। “ওরা” ঠাকিয়েছে আমাকে একথাই বলছিল বারবার।’

‘মিডল ইস্ট বা সাউথ আমেরিকায় যে-সব অভিযুক্ত নাজীরা আত্মগোপন করে আছে ওপলার তাদের হয়ে কাজ করছিল কিনা জানো?’

‘কেউ কেউ বলে ওরকম লোকদের কয়েকটা অর্গানাইজেশন আছে। ওপলার আগে নাকি তাদের কাজ করত। কিন্তু তার কথা শুনে আমার ধারণা হয় জার্মানিতেই কেউ তাকে ধোঁকা দিয়েছে। নিষ্ঠুর প্রকৃতির লোক। ওকে লুকোবার জায়গা বা টাকা দিতে অস্বীকার যাই আমি।’

‘কেন? বাবাকে ভালবাস না তুমি? সে নিরাপদে আমেরিকায় ফিরে যাক এ তুমি চাও না?’

থমথমে দেখাল বনবনের মুখ, ‘বাবা বেঁচে আছে শুনে ঘৃণা হয় আমার। মিউনিকে আসার পর কথাটা জানতে পারি। আমার সাথে দেখা করে বলে, সে নাকি কেবল আমার টানেই বিপদ মাথায় করে ছুটে এসেছে। সে নাকি ভালবাসে আমাকে। কিন্তু কোন কথা শুনতে চাইনি আমি। মুখের ওপর তাকে বলি তুমি আমার বাবা নও। তুমি একটা পশু।’

‘তোমার বাবা অস্বীকার যায়নি তোমার অভিযোগ? নাকি বলবার সুযোগই দাওনি তাকে?’

‘বলবার আছেই বা কি। যুদ্ধ অপরাধীরা সবাই একই কথা বলে। তার কোন কথাই শুনতে চাইনি আমি।’ কাঁপা কাঁপা শোনাৎ বনবনের গলা। বাপের ওপর নিষ্ঠুরতা দেখিয়ে ভিতর ভিতর দন্ধে মরছে নিজেই।

‘ভুল করেছি কি? বলো তুমি, আর কি করার ছিল আমার। জানি, আমি তার মেয়ে, কিন্তু সে একটা খুনী।’ রানার দিকে তাকিয়ে চুপ করে গেল বনবন। তারপর হঠাৎ বলে উঠল, ‘চুপ করে থাকলে কেন? কিছু বলো তুমি। তুমি কি মনে করো বাবা নির্দোষ?’

সেন্টিমেন্টাল ব্যাপারটার ইতি করার জন্যে রানা বলল, ‘খোঁজ করে দেখব আমরা।’ প্রসঙ্গ বদলাল ও, ‘তোমার জানালা দিয়ে ওপলার পড়ল কিভাবে বলো।’

‘ফ্যাপা কুকুরের মত হয়ে উঠেছিল সে। আমার ওপর নানা অত্যাচার করে বাধ্য করতে চাইছিল সাহায্য করতে। পিস্তল বের করে হুমকি দিই আমি পুলিশে খবর দেবার। পিছিয়ে জানালার কাছে গিয়ে দাঁড়ায় ও। তারপর হঠাৎ লাফ দিয়ে পড়ে। আমি দৌড়ে ধরতে যাই। কিন্তু ছুঁতে পারলেও ধরে রাখতে পারিনি ওকে।’

‘পিস্তলটা কোথায়?’

‘ওকে ধরার জন্যে সামনে যেতেই সেটা ছিনিয়ে নেয় ও। ওটা বোধহয় ওর সঙ্গেই ছিল শেষ মুহূর্তে।’ বনবন হঠাৎ প্রসঙ্গ বদলাল, ‘আমাকে বোঝার চেষ্টা করো, প্লীজ। এছাড়া আর কিছু করার কথা ভাবতে পারিনি আমি। আমি জানতাম আমার বাবা বেঁচে নেই। আমি জানতাম আমার বাবা ছিল একটা খুনী। সে যদি হঠাৎ সশরীরে সামনে এসে দাঁড়ায় তাহলে...’

‘তোমার সন্ধান কিভাবে পেল মি. ডনফিল?’

‘আমি একটা চিঠি পাই প্রথমে তার কাছ থেকে। লিখেছিল, আমিই নাকি তাকে ঠিকানা জানিয়ে চিঠি পাঠিয়েছি। সুযোগ পেলেই দেখা করতে আসবে সে আমার সাথে।’

‘চিঠিটা তুমি লেখোনি বলতে চাইছ?’

‘না, আমার লেখবার প্রশ্নই ওঠে না। বাবা যে বেঁচে আছে তাই জানতাম না।’

‘মি. ডনফিল চিঠিটা দেখিয়েছে তোমাকে?’

‘না।’

‘তার মানে নকল চিঠির ধোঁকায় পড়ে তোমার বাবা মিউনিকে এসেছিল। তারপর ডার্পলার তাকে জেল থেকে পালাবার ব্যবস্থা করে দেয়। ডার্পলার সম্ভবত কোন একটা “ক্ষমতার” হয়ে কাজ করত। মি. ডনফিলকে অন্য কোথাও পাচার করার উদ্দেশ্য ছিল তার।’

‘সেরকমই মনে হয়।’

‘বনবন, তোমার বাবা তোমাকে ভালবাসে। তাই সে নিজের প্রাণের মায়া ত্যাগ করে এখানে আসে। আর তুমি তাকে অপমান করো, পুলিশ ডেকে থেকতার করাও। কিন্তু এসব আইডিয়া কে তোমার মাথায় ঢুকায়? তোমার বাবা দোষী একথা কে বুঝিয়েছিল তোমাকে? মিস ক্যারল লিসিল?’

‘কিন্তু লিসিলকে বিশ্বাস করি আমি...’ হঠাৎ মরিয়া হয়ে উঠল বনবন রানাকে বন্ধ বেডরুমের দরজার দিকে পা বাড়াতে দেখে। ওকে বাধা দেবার জন্যে এক পা এগিয়ে গিয়ে শ্রাগ করে দাঁড়িয়ে পড়ল সে। দরজায় করাঘাত করে রানা ডাকল, ‘মিস লিসিল, দরজা খোলো।’

দরজাটা খুলে গেল রানার হাতের ধাক্কা লেগে। লিসিল তৈরি হয়ে অপেক্ষা করছে দরজার সামনেই।

রানার তলপেট লক্ষ্য করে ধরেছে লিসিল পিগুনটা।

## চার

লিসিলের ওয়রটাইম বেরেটার দিকে হাত পেতে বলে উঠল রানা, ‘সময় নষ্ট কোরো না, লিসিল। ওটা দাও। তোমাকে অনুসরণ করে এখানে পৌঁছাই আমি তাই চাইছিলে তুমি। আমরা সবাই সম্ভবত হবার্ট ডনফিলকে চাই। কাজের কথায় এসো তাড়াতাড়ি।’

ইতস্তত করল লিসিল। তারপর বেরেটার নল নিচু করল ঠোঁটের কোণে দ্রুত হাসি ফুটিয়ে তুলে। বলল, ‘হ্যাঁ, ঠিকই বলেছ তুমি। প্রথমে মি. ডনফিলকে চাই আমরা। আর তাকে পেতে হলে তার পায়ের ছাপ খুঁজে বের করতে হবে আগে। হোক কাজের কথা।’

‘বনবনকে কতদিন থেকে জানো তুমি?’

‘দেড়-দু’মাস হবে বোধহয়।’

‘ডর্পলার আজ সকালে বনবনের কাছে সাহায্যের জন্যে গিয়েছিল। কোথায় ছিলে তখন?’

‘যেখানেই থাকি, বনবনের সাথে ছিলাম না। আমরা নিজেরা নিজেরদের হাতে চাই মি. ডনফিলকে। জীবিত। তার কাছ থেকে সবরকম ইনফরমেশন পেতে চাই আমরা। দুর্ভাগ্যের কথা—’ লিসিল বিরতি নিয়ে হাসল রানার চোখে চোখ রেখে। ‘এ সম্পর্কে বনবন আমাকে ফোন করলে আমি এখানে চলে আসতে বলি ওকে।’ একটু চুপ করে থেকে লিসিল আবার বলল, ‘ডর্পলার যা করেছে এটা তার ফল ভোগ, বলব আমি।’

‘আর হবার্ট ডনফিল?’

লিসিল একবার তাকাল বনবনের দিকে, ‘সে একটা ক্রিমিন্যাল। যোগ্য শাস্তি তার পাওয়া উচিত।’

‘বনবনের নাম চুরি করে মি. ডনফিলকে চিঠি লিখেছিলে কেন?’

উত্তর না দিয়ে কফি ঢালল লিসিল কাপে। ফিরে এসে বলল, ‘আমরা শত্রু নই পরস্পরের, মি. রানা। বনবনকে দুঃখ দেবার কোন ইচ্ছাও আমার ছিল না। কিন্তু ওকে ব্যবহার না করে উপায় ছিল না আমার। ওর বাবার বেন ওয়াশ করে নেসার টেকনিক সংগ্রহ করার উদ্দেশ্যে অনেকগুলো ইন্টারন্যাশনাল এজেন্সি ওত পেতে আছে। বিখ্যাত “ডেথ-রে”-এর মালিক হবার ইচ্ছা সকলের। আমিও কোন এজেন্সির হয়ে কাজ করছি তা মনে কোরো না। তবে আমাদের উদ্দেশ্য ছিল মি. ডনফিলকে হাতের কাছে প্রথমে আনা—এই মিউনিকে। তারপর তাকে বিশেষ একটি প্রতিষ্ঠানের স্বল্পরে ফেলে দেয়া তাদের অজ্ঞাতে।’

‘লিসিল! তুমি তা হলে চাইতে—’ বনবন বোকার মত চৈঁচিয়ে উঠল।

‘হ্যাঁ। অ্যারেস্ট হোক মি. ডনফিল তা চাইতাম কিন্তু বিচার হোক তা চাইতাম না। কেননা তাকে অনুসরণ করার উদ্দেশ্য ছিল আমাদের।’

‘তার মানে জেল থেকে বাবাকে পালাতে সাহায্য করেছে তোমরা।’

‘ডিমার বনবন, তোমার বাবার জেল থেকে পালানোটা অশ্রিহার্য ব্যাপার ছিল একটা। ডর্পলারের মত সহানুভূতিশীল লোক সব জায়গাতেই আছে। নিজেদের দলে ঢুকিয়ে কাজ করিয়ে নেবার ইচ্ছা ওদেরই থাকে।’

‘গোলমালটা হলো কোথায়?’ রানা প্রশ্ন করল।

‘আমরা চেয়েছিলাম মি. ডনফিলকে নির্দোষ ঘোষণা করে ছেড়ে দেয়া হবে। কিন্তু ঘটল অন্য রকম। আমরা চাইছিলাম ডর্পলারকে কে ভাড়া করেছিল তা জানতে। কিন্তু ডর্পলার নেই। নিজেকে দোষ দিয়ো না, বনবন। ডর্পলারকে মরতে হত তার এমপ্লয়ারের হাতে আগে বা পরে।’

‘তার মানে মি. ডনফিলকে তোমরা ব্যবহার করতে চাইছিলে একটি আভারগাউন্ড অর্গানাইজেশনের পরিচয় জানার জন্যে? এই অর্গানাইজেশনই বেন স্মাগল করছে জার্মানী থেকে?’

‘ওধু জার্মানী থেকে না। পৃথিবীর সব দেশ থেকে ব্রেন স্মাগল করছে ওরা।’

‘পরিচয় জানতে পেরেছ?’

‘বোধহয় পেরেছি।’ লিসিল চাপা গলায় বলল, ‘কমপক্ষে আমরা নামটা জানি। ওরা নিজেদেরকে কায়রো ড্যান্সার বলে।’

‘বলে যাও।’ রানা বলল।

‘এর বেশি কিছু জানি না এখনও আমরা।’

‘আমরা?’

লিসিল উত্তর দিল না। স্মৃতির পাতা উল্টে চলল রানা। কিন্তু নামটা শুনেছে বলে মনে পড়ল না। কায়রো ড্যান্সার—না, নতুন শুনল রানা। ওদেরকে বসে থাকার ইঙ্গিত করে ক্রাডল থেকে রিসিভার তুলে ডায়াল করল রানা, ‘মাসুদ রানা বলছি। কেউ শুনেছে আমাদের কথা?’

‘জেনারেল বেলচা হলে হতে পারে—আর কেউ না।’ ইউনুস বলল।

‘অলরাইট। ওর রিপোর্ট কি?’

‘জেনারেল সহযোগিতা করছেন। ডর্পলারের মেডিক্যাল রিপোর্টে বলা হয়েছে শরীরে কোনও আঘাতের চিহ্ন নেই। নেশাখন্ত ছিল শেষ মুহূর্তে।’

‘ডনফিল সম্পর্কে?’

‘জেনারেলের ধারণা সে মিউনিকেই আছে। প্রতিটি রাস্তা, ট্রেন, বাস, এয়ার লাইন চেক করা অব্যাহত আছে। জেনারেল খবরের কাগজগুলোকে জানিয়েছে ডর্পলার সুইসাইড করেছে। কিন্তু, স্যার, আমি বোধহয় কিছু খবর পাচ্ছি...’

‘বটল ইট আপ। একঘণ্টা অপেক্ষা করো। মিট মি এ্যাট লোকেশন ফোর।’ রিসিভার নামিয়ে রাখতে গিয়ে চোখ পড়ল রানার জানালার দিকে। বিচ্ছিন্ন সংঘর্ষের শব্দ উঠে কাঁচ ভেঙে পড়ল। ভারী পর্দাটা উড়ে এল রানার দিকে। বুলেটটা ভোমরার মত শব্দ করে টক্কর খেল দেয়ালে দেয়ালে। রিভলভার চলে এল রানার হাতে।

বনবন চৌচিয়ে উঠল তীক্ষ্ণ কণ্ঠে।

একই সময় সশব্দে ছিটকিনি ভেঙে খুলে গেল দরজাটা। ছায়াটা চোখে পড়তেই গুলি করল রানা। দুটো গুলি একই সময় ছুটে এল রুমের ভিতর ছায়াটার হাতের পিস্তল থেকে। কাঁচের টুকরোর উপর দিয়ে লাফ দিয়ে দোরগোড়ায় গিয়ে দাঁড়াল রানা। লোকটা পড়ে গেছে। দুটো গর্ত পাশাপাশি কপালের উপর। নিচের তলায় একটি লোক ‘হেলপ হেলপ’ করে চৌচিয়ে উঠল। দরজা বন্ধ করে দিয়ে ফিরল রানা ওদের দিকে, ‘ঠিক আছ তোমরা?’

বনবন মাথা নেড়ে দেখাল লিসিলকে। ম্লান হয়ে গেছে লিসিলের মুখ। বনবন ধরে ফেলল ওকে। লিসিল মুখ বাঁকাল যন্ত্রণায়, ‘গুলি খেয়েছি। প্রথম বুলেটটা, দেয়ালে ধাক্কা খেয়ে...’ যন্ত্রণায় কথা শেষ করতে পারল না লিসিল।

‘হাঁটতে পারবে?’

‘বোধহয়।’

‘এসো, বেরিয়ে যাই এখন থেকে।’ দরজা খুলে লাশটার পাশে বসে পড়ল রানা। জার্মানীতে এই মুখ ব্যতিক্রম। পিস্তলটা ছাড়া পকেট হাতড়ে পাওয়া গেল না কিছু। লিসিল দম বন্ধ করে জিজ্ঞেস করল যন্ত্রণার মধ্যেই, ‘কে ও?’

‘জানি না। আলজিরিয়ান? ড্যান্সারদের কেউ? ইজিপশিয়ান হতে পারে।’

অ্যাপার্টমেন্টের নিচ তলায় শোরগোল দানা বাঁধছে। পিছনের সিঁড়ি বেয়ে থাউন্ড ফ্লোরের নেমে এল ওরা। লোকজন নেই আশপাশে। রানা বলে উঠল, ‘আরও একজন আছে। সাবধান!’

কিন্তু সরু গলিটা দিয়ে আসার সময় কাউকে দেখা গেল না। বড় রাস্তায় পৌছে ট্যাক্সি নিল রানা। হোটেলের ঠিকানা বলল ড্রাইভারকে।

লবির কাছে বার থেকে ব্যান্ডি নিয়ে উপরে নিজের রুমে এল রানা। চাবি দিয়ে বনবন আর লিসিলকে পাঠিয়ে দিয়েছিল আগেই। লিসিলের দিকে গ্লাসটা এগিয়ে দিয়ে বলল, ‘সবটুকু পান করো। তারপর তোমার জখম দেখছি।’

আপত্তি করে লিসিল বলে উঠল, ‘না, সে আমি পারব না!’

‘শরমের সময় নয় এখন। বনবন, তুমি আমাকে সাহায্য করবে।’

বিছানায় শুইয়ে দিল বনবন লিসিলকে।

রানাকে বড় বড় চোখে দেখতে লাগল বনবন। চোখ বন্ধ করে যন্ত্রণা সহ্য করার চেষ্টা করছে লিসিল। রাউজ খুলে ফেলে জখম পরীক্ষা করছে রানা।

কাপটা রক্তে ভরে উঠল। বুলেটটা ভিতরে ঢুকতে পারেনি। সহজেই বেরিয়ে এল সেটা। ব্যান্ডেজ তৈরি করা হলো বেডশিট দিয়ে। রানা বলল, ‘পরে ডাক্তার দেখালে চলবে। পুলিশী ঝামেলা পোহাতে চাই না এত তাড়াতাড়ি।’

ইউনুসকে ফোন করে পেল না রানা। লিসিলের ব্যাগটা চোখে পড়ল ওর। সঙ্গে করে নিয়ে আসতে ভোলেনি দেখে বিস্মিত হলো ও। সেটা তুলে নিয়ে খুলতে যেতেই বিড়বিড় করে আপত্তি করল লিসিল।

মেয়েলী জিনিস ভিতরে। লিপস্টিক, টিসু, পাউডার কেস, ব্রিটিশ পাসপোর্ট, বিভিন্ন দেশের খুচরো পয়সা, তার মধ্যে ইসরাইলী পাউন্ড নোটও দেখল রানা। লিসিল ঠাণ্ডা গলায় বলে উঠল, ‘অ্যাসপিরিনও আছে। দয়া করে দাও একটা।’

রানা বলে উঠল, ‘এবার সময় হয়েছে তোমার সঙ্গীদের নাম বলার, লিসিল।’

‘না। এখন সেকথা বলতে পারব না আমি।’

ব্যাগটা সার্চ করল আবার রানা। ওয়ালেট দেখল। ইন্টারন্যাশনাল ড্রাইভিং লাইসেন্স দেখা গেল একটা। সাইড পাউচ থেকে বেরুল লং সাইজের ফটো একটা। ফটোটা মনোযোগ দিয়ে দেখতে লাগল রানা।

মরুভূমিতে তোলা হয়েছে ছবিটা। ভাঙা পাথরের খিলান, পিরামিড, তাঁবু দেখা যাচ্ছে দু'জন মানুষের পিছনে। একজন লিসিল। লোকটার গায়ে সাদা শার্ট।

লিসিল বিছানা থেকে সকৌতুকে বলে উঠল, 'চেনো ওকে?'

'ছবি দেখেছি ওর আগে।' রানা বলল, 'আমাদের কাউন্টার ইন্টেলিজেন্সের ফাইলে। হ্যাঁ জানি ওকে, আত্মহার হোসেন।'

'দ্যুটিস রাইট। হোসেন।' লিসিলের গলার স্বরে মাদকতা অনুভব করল রানা। মুখ তুলে তাকাল ও। আত্মহার হোসেন ডেঞ্জারাস লোক। আগুনের মত উত্তাপ লোকটার ভিতর। মিশরের দামী অপারেটর সে। মেজরের পোস্টে ছিল সে আর্মিতে। পনেরো দিন আগে রানা জানত আত্মহার আলজিরিয়ায় আছে।

ছবিটা ব্যাগে ভরে রেখে জানতে চাইল, 'কতদিন থেকে জানো তুমি আত্মহারকে?'

'গত জন্ম থেকে।' হাসল বিছানায় শুয়ে শুয়ে লিসিল। 'হোসেন চেয়েছিল আমি তোমাকে খুঁজে বের করে সব কথা জানাই। কিন্তু আমার পদ্ধতিটা জগাখিচুড়ি হয়ে গিয়েছিল।' বিছানায় উঠে বসে পা দুটো ঝুলিয়ে দিয়ে আলতোভাবে মেঝেতে ঠেকাল।

'জেনারেল বেলচাকে যা বলতে চাও না আমাকে তা বলে খালাস হও, লিসিল।'

হাসল লিসিল। রানা বলল, 'তোমার প্রেমিক কেন আমাকে খুঁজে বের করার নির্দেশ দিয়েছিল?'

উত্তর না দিয়ে চুপ করে তাকিয়ে রইল লিসিল। রানা বলল, 'কায়রো ড্যান্সারের সাথে এর সম্পর্ক আছে?'

'আছে। সর্বশেষ সংবাদও আমরা রেখেছি, সর্বপ্রথমও। আমরা না বলে আত্মহার বলাই ভাল। ওর সাথে কাজ করার সময় ঘনিষ্ঠতা হয় আমাদের। আরকিওলজিস্ট আমি। ওরও শখ আছে এতে। কয়েকবার স্ত্রী দেখা হয়েছে আমাদের আর্জেন্টিনায় প্রত্নতাত্ত্বিক বিষয়ে গবেষণা শেষ করার পর। কিন্তু নিয়মিত চিঠি আদান প্রদান হয় আমাদের মধ্যে। আত্মহার সব জানায় আমাকে। পৃথিবীর সব দেশ থেকেই পণ্ডিত বিজ্ঞানীরা স্বেচ্ছা নিরুদ্দেশ হয়ে যাচ্ছে।' রানার মুখের দিকে নিম্পলক চোখ রেখে আবার শুরু করল লিসিল, 'কেন, শোনোনি কর্নেল সেলিম আল-রশিদ-এর নাম? এটা তার কভার নেম, ধারণা করি। লোকটা কে বা কি এখনও আমরা জানি না। সিরিয়ান ন্যাশনালিস্ট, অরিজিনালি, তবে মিডল ইস্টের বহু রেভ্যুলেশনের জন্যে সে দায়ী। একবার সে নাসেরের বিরুদ্ধে কু করার চেষ্টাও চালিয়েছিল। আরাবিয়ান নাইটস-এর দানবের মত ভয়ঙ্কর সে। একটা মনস্টার। এবং বর্তমানে ছবার্ট ডনফিল্ড আল-রশিদের হাতে পড়েছে গিয়ে।'

'তার উদ্দেশ্য কি?'

'মি. ডনফিল্ডকে পাচার করা অন্যত্র। যেখানে সে আর তার ড্যান্সাররা

শাসন কায়েম করেছে। কোথায় জানি না। আমরা মি. ডনফিলকে ফিরে চাই নিশ্চয়। কিন্তু বিশ্ববাসীর কপালে দুর্ভাগ্যজনক কিছু ঘটার আগে চাই কায়রো ডাক্তারদেরকে ধ্বংস করতে।’

‘সেলিম আল-রশিদ এখন মিউনিকে?’

‘হোসেন তাই মনে করে।’

ওদেরকে বিশ্বাস করা যায় কিনা বুঝতে পারল না রানা। তবু বলল, ‘কেউ এলে যেন দরজা খোলা না হয়।’ ইউনুসের সাথে দেখা করা দরকার ওর। দরজার বাইরে অবধি এল বনবন ওর সাথে।

‘তোমার কথা ভুলব না কখনও, রানা। ওর কথায় বাবাকে দোষী ভাবা উচিত হয়নি। বোধহয় জীবনের সবচেয়ে বড় ভুলটি করে ফেলেছি। তুমি কি ভাব, রানা? আমার বাবা নাজী অপরাধী?’

‘ঠিক জানি না, বনবন। সব কথা জানাব আমরা সময় হলে।’ বেরিয়ে পড়বার জন্যে ব্যস্ত হয়ে উঠেছে রানা। কিন্তু বনবন ওর গালে তিনটে আঙুল ঠেকিয়ে বুলিয়ে দিচ্ছে আনমনে। মেয়েটির চোখের দৃষ্টি অসহায়। অশ্রুটে কথা বলে উঠল ও, ‘তোমার জীবন আমি বুঝতে পারিনি যেমন লিসিল বোঝে। তুমি হয়তো নিষ্ঠুর, কিন্তু আমার মনে হচ্ছে তুমি খুব ভাল লোক। আর তোমার ওপর খুব বিশ্বাস রাখতে ইচ্ছে হচ্ছে আমার। সাহায্য আর উপদেশ পাবার জন্যে একজন ভাল মানুষ দরকার আমার।’

‘লিসিলের সাথে থাকো।’ রানা বলল, ‘সব ঠিক হয়ে যাবে।’

‘আমার বাবাকে... আমি আর একবার দাঁড়াতে চাই আমার বাবার সামনে, জানো?’ বনবন ফিসফিস করে উঠল, ‘আমার অপরাধের জন্যে ক্ষমা চাইব আমি বাবার কাছে।’ গলা কঁাদ কঁাদ হয়ে উঠতে নিজেই সামলে নিল বনবন, ‘তুমি তো খুঁজছ বাবাকে, রানা। আমাকে সঙ্গে নেবে তোমার?’

‘পারব কিনা জানি না। চেষ্টা করব।’

‘ধন্যবাদ, রানা। ধন্যবাদ।’ হাতটা রানার গাল থেকে নামিয়ে নিয়ে ধীরে ধীরে ঘুরে দাঁড়াল বনবন।

‘শোনো।’ রানা ডাকল। দাঁড়িয়ে রইল বনবন পিছন ফিরেই। মেজর জেনারেল রাহাত খানের কথাটা মনে পড়ে গেল রানার—মেরে রেখে এসো।

বনবনের দুটো কাঁধ ধরে ঘুরিয়ে আনল ওকে মুখোমুখি রানা। বলল, ‘তুমি বড় ভাল মেয়ে, বনবন।’ বনবনের চোখের পানিতে ভিজ্জে গেল রানার গাল।

সময়মত পৌঁছল রানা। কিন্তু সাইন্স মিউজিয়ামের আলোকিত গেটের কাছে ইউনুসকে দেখা গেল না। পায়চারি করে বেড়াল খানিকক্ষণ। তবু দেখা নেই ইউনুসের। চিহ্নিত হবার সাধ হলো না রানার। হাঁটতে শুরু করল ও। পাঁচ মিনিট পর আবার এল গেটের কাছে। আকাশের দিকে তাকাল ও। মেঘ জমেছে। পার্কিং লটের দিকে তাকাল। অনেক গাড়ির ভীড়। ইউনুসের দেখা নেই। রানা আবার অন্ধকার দিকটা বেছে নিয়ে পা বাড়াল মিউজিয়ামটা চক্কর মারার জন্যে।

‘রানা!’ শান্ত গলা ভেসে এল অদূর থেকে।

দাঁড়িয়ে পড়ল ও। একই সাথে পকেটে ঢুকে গেছে হাতটা ওর। ঘুরে দাঁড়িয়ে দৃঢ় পায়ে এগিয়ে আসতে দেখল রানা মেজর আত্মহার হোসেনকে।

ছোট ছোট মাথার চুলগুলো বুরুশের দাঁড়ার মত খাড়া আত্মহারের। কালো স্থির চোখ দুটো বুদ্ধির ও কঠোরতার পরিচয় দেয়। মজবুত স্বাস্থ্যটো বোঝা যায় যেন কোটের বাইরে থেকেও। প্রায় চারকোনা হাতের পাঞ্জা বাড়িয়ে দিল আত্মহার রানার দিকে। করমর্দনে আন্তরিকতার ছোঁয়া পেল রানা। কিন্তু আত্মহারের চোখের দৃষ্টিতে অনুসন্ধান আর সামান্য চ্যালেঞ্জ দেখল ও। তারপর হাসি ফুটে উঠল সারা মুখে। হাসলে ছেলেমানুষ ছেলেমানুষ দেখায় ওকে।

‘ইউনুস একটা অ্যাক্সিডেন্টে পড়ে দেরি করে ফেলেছে। খানিক পর পৌঁছবে ও। আমাদের দেখা হওয়া উচিত ভেবে সুযোগটা নিলাম।’

‘ইউনুসের দেরির জন্যে তুমি দায়ী নও তো?’

‘না। আপাতত আমার কথা বিশ্বাস করতে হবে তোমাকে। আমার ধারণা আমরা কাজ করতে পারি একসাথে।’

‘দেখা যাবে। ইউনুস তোমাকে এই সাক্ষাৎকারের কথা বলতে পারে না।’

‘ওর ফোন ট্যাপ করেছি আমরা। তোমার সাথে এখানে দেখা করবে সে তা জানার পরই সম্ভব হলো। অবাক হলো না, মেজর মাসুদ রানা। আমি ইতিমধ্যে শুনেছি লিসিল ওলি খেয়েছে। তোমার সাহায্যের জন্য আমরা কৃতজ্ঞ। তোমার হোটেলে মেসেজ পাঠিয়েছি, যাতে লিসিল এখানে এসে পৌঁছোয়। ওকে আমার দরকার।’

‘ভুল করেছ।’ রানা বলল, ‘ওকে হত্যার চেষ্টা চলছে।’

‘আমাদের সবাইকে হত্যার চেষ্টা চলছে, তাই নয় কি?’

—আত্মহার হাসল আবার। ‘লিসিলকে আমি ভালবাসি। কিন্তু তুমি জানো আমাদের চরিত্রে ব্যক্তিগত বিষয় সব সময় দ্বিতীয়-তৃতীয় স্তরের গুরুত্ব পায়। তাছাড়া লিসিল বলল সে তোমাকে সব কথা জানায়নি। সেজন্যেই ওকে আমাদের সাথে মিলিত হতে বলেছি এখানে।’

‘কি ধরনের গাড়িতে আসছে ও?’ মাথার ভিতর ওয়ার্নিং সিগন্যাল বাজতে শুরু করেছে রানার।

‘কালো ক্যাডিলাক...’

‘চলো, দেখি আসছে কিনা।’

বৃষ্টি নেমেছে। ইলশেগুড়ি বৃষ্টি। গেটের ছাত ত্যাগ করে পার্কিংলটের দিকে পা বাড়াল রানা। পাশে আত্মহার। কয়েক পা এগিয়েই পার্কিংলটের বিপরীত দিকে আঙুল দেখিয়ে বলে উঠল ও, ‘ওই যে,—ওই যে লিসিল।’

লিসিলকে না, কালো ক্যাডিলাকটাকে দেখা যাচ্ছে। দাঁড়িয়ে আছে সেটা। কখন এসে পৌঁছেছে বুঝতে পারল না রানা। রানাকে ছাড়িয়ে দ্রুত পা বাড়াল সেদিকে আত্মহার।

‘দাঁড়াও।’ রানা বলে উঠল।

রানার কণ্ঠস্বরের কাঠিন্য অনুভব করে দাঁড়িয়ে পড়ল আত্‌হার, ‘হোয়াট ইজ ইট? হোয়াটস্ দ্য ম্যাটার?’

‘জানি না।’

‘লিসিল বসে আছে গাড়ির ভিতর।’

‘এখানে দাঁড়াও, আত্‌হার।’ তীক্ষ্ণ চোখে অল্প দূরের গাড়িটার ভিতরে কিছু দেখা যায় কিনা লক্ষ্য করার চেষ্টা করল রানা। আত্‌হার আবার পা বাড়াল। খপ করে ধরে ফেলল হাতটা রানা। বলল, ‘আমি আগে যাব।’

‘কিন্তু লিসিল—!’

‘আই অ্যাম সরি।’ রানা বলল। মাত্র কয়েক মিনিট আগে লিসিলকে বারবার সাবধান করে দিয়ে এসেছে ও রুমের দরজা না খুলতে! কিন্তু আত্‌হারের নির্দেশে দরজা খুলে বেরিয়ে এসেছে সে। ব্যাপারটা মনে প্রাণে বিশ্বাস করতে পারল না রানা।

লিসিল বসে আছে একেবারে শান্ত হয়ে। ক্যাডিলাকের হইলে এখনও ওর হাত দুটো। ওর ব্রাউন চোখ দুটো সামনের শূন্য বিস্টিংটার দেয়ালটার গায়ে নিবদ্ধ। কিন্তু অত্যন্ত নিবৃত্তভাবে জবাই করা হয়েছে ওকে।

গলাটা এক কান থেকে আর এক কান পর্যন্ত কাটা লিসিলের।

## পাঁচ

আত্‌হার হোসেন গাড়ির দিকে এগোল। রানা সামলাল ওকে। বলল, ‘পিছনে থাকো, মেজর। ওকে দেখার দরকার নেই তোমার।’

কেঁপে উঠল লোকটার গলা, ‘লিসিল?’

‘শি ইজ ডেড। ইটস্ এ মেস।’

‘লিসিল!’ দু’হাতে নিজের গাল চেপে ধরল আত্‌হার। গাড়ির দরজা বন্ধ করে দিয়ে সরিয়ে নিয়ে এল ওকে রানা। চোখের সামনে অন্ধকার দেখছে আত্‌হার। বিস্মিত পায়ে দূরে দাঁড়াল এসে রানার সাথে।

‘আমরা—আমরা বিয়ের প্ল্যান করেছিলাম—লিসিল...!’ ঘাড় ফিরিয়ে তাকাল আত্‌হার শোকাবহ কালো রঙের গাড়িটার দিকে। ঝির ঝির করে বৃষ্টি পড়ছে মাথায়। আত্‌হারের কাঁধে একটা হাত রাখল রানা।

আত্‌হার বলে উঠল, ‘ওর কোনও দোষ ছিল না। আমার জন্যে শুধু কাজ করছিল এটা ও। আমরা বিয়ের কথা ভাবছিলাম...’

‘একটু ধামো, আত্‌হার।’ রানা কাঁধে চাপ দিল আত্‌হারের।

‘কায়রো ড্যান্সাররা দায়ী—ওই ফ্যানাটিক ডেভিল বা—।’ ঝট করে তাকাল আত্‌হার রানার চোখের দিকে, ‘আমাকে সাহায্য করবে, রানা?’

‘করব। পারলে চেষ্টা করব।’

একটা মোটর সাইকেল সশব্দে এগিয়ে আসছে ওদের দিকে। ক্যাডিলাক্টার পাশে এসে থামল সেটা। ইউনুস মোটর সাইকেল থেকেই দেখতে পেল গাড়ির ভিতরটা। নেমে পড়ে দ্রুত এসে দাঁড়াল সে ওদের দু'জনার কাছে, 'আমাদের সাথে পূর্ণ সহযোগিতা করার নির্দেশ দেননি কেন আপনি মিস লিসিলকে?'

'শাট আপ,' ধমকে উঠল রানা, 'ওকে এখন কিছু বোলো না।'

'কিন্তু মিস লিসিল আপনার রুমে মি. আত্মহারের জন্যে কয়েকটা জিনিস লুকিয়ে রেখেছিল, স্যার!'

আত্মহার বলে উঠল, 'আমার দোষ। ভুল হয়ে গিয়েছিল অনুমানে। কিন্তু আমি জানতাম না ভোমরা আমাকে সাহায্য করবে কিংকরবে না। যদি ওকে শুধু আমি বলতাম যে...'

রানা ইউনুসকে বলল, 'এখন বেশি সময় নেই আমাদের। লিসিল কি লুকিয়ে রেখেছিল?'

'দুটো জিনিস আপনার বিছানার নিচে লুকিয়েছিল, স্যার। আপনি চলে আসার পর মিস বনবনকে কথাটা জানায় সে। আর আপনাকে অনুসরণ করার জন্যে বাইরে বেরুবার সিদ্ধান্ত নেয়। ও বেরুবার খানিক পর আমার অ্যাক্সিডেন্টের খবর দেবার জন্যে আপনার রুমে যাই আমি। মিস বনবন দেয় এগুলো আমাকে।' পকেট থেকে একটা পোস্টকার্ড আর অ্যাডমিশন টিকেটের মত দেখতে একটা জিনিস বের করে দেয় রানাকে ইউনুস।

দুটো জিনিসের পরস্পরের সাথে কোন যোগাযোগ পেল না রানা। পোস্টকার্ডটা সাধারণ মিউজিয়াম সুভেনির, কেনা হয়েছে মিউনিকের Alte Pinakothek থেকে। জিনিসটা বাইজেনটাইন মোজাইকের রিপ্রোডাকশন। গোল মাথা উঁচু করে একজন দেবতাকে আঁকা হয়েছে কার্ডের উপর। দেবতার এক পা উঁচু করে তোলা, বাহুদ্বয় সাদুনা দেবার ভঙ্গিতে ওঠানো শূন্যে। অদ্ভুত দেখাচ্ছে। দেবতা যেন নাচছেন।

দ্বিতীয় জিনিসটা একটা টিকিট। একজনের অ্যাডমিশন অক্টোবারফেস্ট জাভেরিয়ান ক্যালিডেস্কোপ থিয়েটারে। উলঙ্গ ফোক ড্যান্সের আন্ত্যানা অক্টোবারফেস্ট। দুটো জিনিসই পকেটস্থ করল রানা। ইউনুসের দিকে ফিরল ও, 'অ্যাক্সিডেন্ট?'

'একটা ট্রাক পাশ থেকে ধাক্কা মেরে ফেলে দেয় গাড়িটাকে রাস্তার পাশে। খাদে পড়ে গেছে গাড়ি। আগেই লাফিয়ে পড়ে জান বাঁচিয়েছি আমি।'

'ট্রাকটা?'

'লোকাল ট্রাক। অক্টোবারফেস্ট থিয়েটারের সাইন ছিল গায়ে।'

'ওড এনাক,' বলে উঠল রানা।

বৃষ্টি তেরছাভাবে ঝরতে শুরু করেছে। চারপাশে কোথাও লোকজন নেই। লিসিলের লাশ আর গাড়িটার একটা ব্যবস্থা করা দরকার। রানা বলল আত্মহারকে, 'জেনারেল বেলচাকে ডাকতে হবে। তোমার মতই খুব একটা আস্থা নেই ওর ওপর আমার। তবু।' ঘড়ি দেখল রানা, 'আমাকে যেতে

হচ্ছে। ওকে খবর পাঠিয়ে অপেক্ষা করো তোমরা।’

ইউনুস বলল, ‘কি ভাবছেন?’

‘একা একটা কাজ করতে চাই আমি।’

‘সঙ্গে যাচ্ছি আমি,’ ঘোষণা করল আত্‌হার, ‘তোমার যদি ধারণা থাকে কোথায় জানোয়ারগুলোকে পাওয়া...’

‘পরে, আত্‌হার। তুমি ওদেরকে নিজের হাতে সাজা দিতে চাও?’

‘চাই।’ অস্বাভাবিক কঠিন আত্‌হারের গলা, ‘চাই। লিসিলের খুনীকে হাতে পেতে চাই। ফেড়ে...’

‘তা হলে আমার নির্দেশ শোনো। আমরা সৌখিন কোন দলের সাথে যুদ্ধে নামিনি। বুঝতে পারছ না মানুষের এক কানাকড়িও দাম দেয় না ওরা! না নিজেদের না আমাদের। তুমি বনবনকে নিরাপদে রাখো। গুরুত্বপূর্ণ কাজ ওটা। আমার হোটেলে দেখা হবে তোমাদের সাথে—যদি ভাগ্যবান হই।’ কিন্তু ওদের সাথে দেখা করার কোন ইচ্ছা পোষণ করছিল না মনে মনে রানা। দুর্ধর্ষ গ্যাঙটার হেডকোয়ার্টারে পৌছতে চায় ও। সুযোগ পেলে হাতছাড়া করবে না রানা।

অক্টোবরফেস্ট গ্রাউন্ডের ব্যাভেরিয়ান লোকজনদের ম্লান করতে পারেনি বৃষ্টি। ছুটোছুটি আর শোরগোল, ব্যাভের চড়া আওয়াজ আর হাতছানি, চোড়ায় মুখ লাগিয়ে ঘোষণাচ্ছিলে চিৎকার করা আর নিওনের জ্বলা-নেভা সবই সমান তালে চলছে। এগজিভিশন বুথ থেকে হুন্নার তোড় সবচেয়ে বেশি আসছে। কি খুঁজছে তা নিজেই ভাল জানে না রানা। কিন্তু পাওয়া মাত্র চিনতে পারবে বলে বিশ্বাস ওর। প্রায় নয় পোস্টার দেখতে দেখতে ঘুরে বেড়াতে শুরু করল রানা।

চারপাশের লোকজন সবাই কোন না কোন চরম উত্তেজনার শিকার হতে চাইছে বলে মনে হলো রানার। আদিম আদিম গন্ধ গোটা পরিবেশটায়। ধীর পায়ে ঘুরতে লাগল ও।

কেউ অনুসরণ করছে কিনা বুঝতে পারল না রানা। কেউ চোখে গৈঁধে রাখলেও ধরা মুশকিল। কিন্তু হাস্যরত, চিৎকাররত নরনারীর মাঝখানে নিজেকে লুকিয়ে রাখারও চেষ্টা করছে না রানা। ধরা পড়তেই চাইছে ও। হুবার্ট ডমফিল যেখানে আছে সেখানে যাওয়াটাই উদ্দেশ্য।

কিন্তু ওকে বয়ে না নিয়ে গিয়ে লিসিলের মত গলা কেটে ফেলেও দিতে পারে লাশটা। ওদের পক্ষে সহজ আর নিরাপদ হবে সেটা। তার মানে ওদেরকে কৌশলে জানাতে হবে যে ওদেরই স্বার্থ অক্ষুণ্ণ রাখতে হলে ওকে বাঁচিয়ে রাখতে হবে।

বোঝানোটা সহজ কাজ নয়।

এমন কি ও সফল হলেও মেরে ধরে হাড়গোড় গুঁড়ো করে ছাড়বে।

যা খুঁজছিল তা পেয়ে গেল হঠাৎ রানা।

বিরিট প্যাভিলিয়ানে মোটা মোটা নিওন সাইনে বিজ্ঞাপিত হচ্ছে

অ্যারাবিক অক্ষরে : কায়রো ড্যান্সার ।

প্রথমবার হেঁটে যাওয়ার পর স্বাভাবিক চোখে একবার মাত্র তাকিয়েই দৃষ্টি ফিরিয়ে নিল ও । পাশাপাশি ড্যান্সারদের বিরাটাকৃতি বুক । দেহ নাম মাত্র, বুকগুলো ফুটিয়ে তোলা হয়েছে বিরাট আর নিখুঁতভাবে । রঙিন আলোর বন্যায় উজ্জীবিত হয়ে উঠেছে হবিগুলো । পরবর্তী প্রবেশ পথ দিয়ে ভেসে আসছে করতালি আর বাদ্যযন্ত্রের অবিরাম ধ্বনি । সংলগ্ন হলের ভিতর ঢুকে পড়ল রানা ভীড় ঠেলে । বেলী ড্যান্স হচ্ছে হলের স্টেজে । স্টেজে নজর ফেলার জন্যে আরও এগোতে হলো ওকে ভীড় ঠেলে । হল বিলম্বিত উল্লাস ধ্বনিতে মুগ্ধ । শিস দিচ্ছে কেউ কেউ । খানিকক্ষণ খোলা পেটের ঢেউ খেলা দেখে কর্নারের দরজা দিয়ে ড্যান্সার প্যাভেলিয়ানের ব্যাক এন্ট্রান্সের কাছে চলে এল রানা । ভিতরে ঢোকান ইচ্ছা ওর ।

‘এফেভি? পারফরম্যান্স দেখতে চান, এফেভি? মেইন ডোর আপনার বাঁ দিকের কর্নারে, এফেভি । এ থাউজেন্ট থ্যাক্স...’ ইংরেজী আরবী মিশিয়ে ব্যাক এন্ট্রান্সের ডোরম্যান মাথা নুইয়ে তসলিম করতে করতে একমুখ হাসির সাথে বলল রানাকে ।

ফ্রন্ট বিলবোর্ড এ্যাডভারটাইজিংয়ের একটি নর্তকীর নাম স্মরণ করল রানা । ডোরম্যানকে বলল, ‘মাদামোয়াজেল জুজুর সাথে আমার একটা ডেট আছে ।’ পকেটে হাত ভরল ও ।

‘ওহ্ ইয়েস, এফেভি । মেজাজ ভাল থাকলে খুব ভাল মেয়ে মাদামোয়াজেল জুজু । কিন্তু...’

‘বুঝেছি ।’ পকেট থেকে নোট বের করে আনল রানা । টাকাগুলো নিয়ে পকেটে ভরেই আবার একগাল হাসল ডোরম্যান, ‘মাদামোয়াজেল জুজু নাচছে এখন, এফেভি । ফাইভ, টেন মিনিটস, নো মোর । হলে অপেক্ষা করেন, ইয়েস, এফেভি?’

দরজা খুলে ভিতরে ঢুকিয়ে দিল ডোরম্যান রানাকে । পিছনে বন্ধ হয়ে গেল দরজা । স্কিন, ড্রাম, করতালি, অ্যারাবিয়ান ফুট ইত্যাদির শব্দ দূর থেকে ভেসে আসছে । চওড়া একটা হলওয়ার দেয়ালে দেখা যাচ্ছে সারি সারি দরজা । ড্রেসিং রুমের দরজাগুলো খোলা । থিয়েট্রিক্যাল ব্যাগেজ, স্টেজ ফুট গাদাগাদি করে রাখা হয়েছে । ড্রেসিংরুমের ভিতর থেকে মেয়েদের তীক্ষ্ণ বাঁশির মত নিচু হাসির আওয়াজ কানে বিধছে । একজন স্বর্ণকেশী রানাকে পাশ কেটে ছুটে গেল ভিতর দিকে শুধু কালো ব্রিফ আর ব্রা পরে । ঘুরে দাঁড়িয়ে জোর গলায় ডাকল রানা, ‘মাদামোয়াজেল জুজু?’

মেয়েটি ধমকে দাঁড়াল । তারপর ঘুরে তাকাল পিছন দিকে । মাথা নেড়ে ‘না’ বলার আগে তীব্র ভর্ৎসনার চোখে তাকাল সে । তারপর অদৃশ্য হয়ে গেল একটি ড্রেসিংরুমের দরজা টপকে । রানা পা বাড়াল ।

করিডরের শেষ প্রান্তে প্রকাণ্ড স্টেজ এরিয়া । লম্বা চওড়া পর্দা ঝুলছে পিছনে । মিউনিকবাসী দর্শকরা অকস্মাৎ হাজারো কণ্ঠে উল্লাস ধ্বনি করে

উঠল। অডিয়ান্স যেন ফেটে পড়েছে চরম উত্তেজনায়। অ্যারাবিয়ান ফুটের উচ্চকিত ধ্বনি দিশেহারা গতিতে বেজে উঠল নতুন সুরে। পর্দাগুলো দু'ফাক হয়ে গেল পাশ থেকে। সাথে সাথে অর্ধনগ্ন যুবতীরা বন্যার তোড়ের মত বেরিয়ে এল রানার সামনে।

মেয়েদেরকে এমন নির্লজ্জ হতে এই প্রথম দেখল রানা। দৌড়তে দৌড়তেই অনেকে সম্পূর্ণ নগ্ন হয়ে যাচ্ছে পরবর্তী ভূমিকায় নাচার প্রস্তুতি নেবার জন্যে। মেয়েদের দলটির পিছন পিছন এল পুরুষদের দল। রানা বাঁ দিকে ঘুরল সিঁড়ির দিকে যাবার জন্যে। সিন্ধু প্যান্ট আর লম্বা ভেন্ট পরনে নর্তকগুলোর। প্রত্যেকের কোমরে ঝুলছে একটা করে বেঁটে তলোয়ার। ইচ্ছা করেই একটা তলোয়ারের ব্লেড স্পর্শ করল রানা। আঙুলটা সামান্য কেটে গিয়ে রক্ত বেরিয়ে পড়ল। ধারাল জিনিস। লিসিলের কাটা গলাটা ভেসে উঠল চোখের সামনে। এদের মধ্যেই কেউ হয়তো কাণ্ডটা করে এসেছে।

বুপিনস্টাইপ স্যুট পরনে লোকটার দুটো হাত অলঙ্কারে ভর্তি। হাত তুলে বাধা দিল সে সিঁড়ির মুখে রানাকে, 'নো, নো। প্লীজ, পারমিশন নেই, এফেক্টিভ। বাইরে ওয়েট করতে হবে, এফেক্টিভ।'

'মাদামোয়াজেল জুজু। ওর সাথে অ্যাপয়েন্টমেন্ট আছে।'

লোকটা সবজাত্তার মত মাথা নাড়ল, 'খোদার কসম? কিন্তু আমাকে বলেনি সে।'

'সব কথা সে বলে তোমাকে?'

বুপিনস্টাইপ কি যেন বলতে গিয়ে দমন করল নিজেকে। তারপর আরবীতে চেঁচিয়ে উঠে ডাকল কাউকে। দূরের একটা জানালা থেকে সাড়া দিল কেউ। আরবীতে কথাবার্তা চলল কিছুক্ষণ ওদের। বুপিনস্টাইপ যে অপেক্ষাকৃত ক্ষমতাবান বুঝতে পারল রানা কথা বলার ধরন দেখে।

আলোচনা শেষ করে রানার দিকে তাকাল বুপিনস্টাইপ, 'আমি খবর না পেলে পারমিশন দিতে পারি না, মি....'

'মাসুদ রানা।'

'মাসুদ রানা?'

'দ্যাটস রাইট।'

কিন্তু কোন পরিবর্তন হলো না মুখের রেখায়। গলায় ঝাঁঝ এনে সে বলল, 'দুঃখিত, এফেক্টিভ। ডোরম্যান পয়সা নিয়ে থাকলে ফেরত নিন গিয়ে।'

টাকার ইঙ্গিত করেও লাভ হলো না। উপরে ওঠার জন্যে কড়াকড়ি নিয়ম লক্ষ করল রানা। বুপিনস্টাইপ সবার কার্ড দেখে তারপর যেতে দিচ্ছে। নিরাশ করেছে বেশিরভাগ লোককেই। দু'জন মেয়েকে তো চড় মেয়েরই বসল জেদ করেছিল বলে। অন্য একটি মেয়ে সসম্মানে অনুমতি পেল।

'আমি যদি মাদামোয়াজেল জুজুর সাথে দেখা করতে না পারি,' তৃতীয় কাউকে দেখতে না পেয়ে রানা পকেটে হাত ভরে বলে উঠল, 'তাহলে হের ডক্টর হবার্ট ডনফিলের সাথে দুটো কথা বলতে চাই।'

বুপিনস্টাইপের কালো চোখ দুটো এবার মুহূর্তের জন্যে বিস্ময়ে ভরে

উঠল। অস্ফুটে অবোধ্য একটা শব্দ করে তাকাল সে রানার দিকে, 'কি বলা হলো, এফেভি?'

পকেট থেকে অর্ধেকটা বের করে রিভলভার দেখিয়ে রানা বলল, 'পায়তারা ছাড়ো। পথ দেখিয়ে নিয়ে চলো সঠিক জায়গায়।'

'আমার মালিক....' রুপিনস্ট্রাইপ আতঙ্কিত।

'আল-রশিদ আছে এখানে?'

'হিজ হাইনেস অবস্থান করছেন। কিন্তু কেউ—সাধারণ কেউ তাঁকে দেখতে পায় না, এফেভি।'

'আমি অসাধারণ। পা বাড়ো।' রিভলভার বের করে লোকটার পাঁজরে খোঁচা মারল রানা। কাজ হলো।

'আমার জীবনের দাম খুব কম, এফেভি। কিন্তু আপনার নাম যদি মাসুদ রানা হয়...'

'ইট ইজ।'

'তাহলে বোধহয় মালিক আপনার জন্যে...'

লোকটার পিছন পিছন সিঁড়ির মাথায় উঠে এল রানা। ড্যান্সারদের একজন কোমরে তলোয়ার নিয়ে গার্ড দিচ্ছে মুখেই। রুপিনস্ট্রাইপ তাকে বলল, 'ঠিক আছে আবদুল্লা, যেতে দাও আমাদেরকে।'

'হিজ হাইনেস আশা করছেন ওকে?'

'আল্লা আশা করছেন।'

গার্ড পাশে সরে গেল। ড্যান্সিং মাস্টারকে অনুসরণ করে অডিয়ামের উপরকার করিডর অতিক্রম করল রানা। আবার গুরু হয়েছে ড্যান্স। উল্লাসধ্বনির সাথে ভেসে আসছে ফুটের, করতালির, শিশ দেয়ার মৃদু শব্দ। একটার পর একটা করিডর অতিক্রম করে চলেছে ওরা। একটার চেয়ে অপরাট অপেক্ষাকৃত অন্ধকার ঠেকল রানার। গোলক ধাঁধা বলে মনে হলো ওর বাড়িটাকে অগুণতি করিডর পেরোবার পর। একটা দরজার সামনে দাঁড়াল রুপিনস্ট্রাইপ।

'এখানে, এফেভি।'

'তুমি আগে।'

আতঙ্ক ফুটল মুখে লোকটার। রানা বলে উঠল, 'জীবনে অনেক পাপ করেছে, আর একটায় কিছু যাবে আসবে না।'

লোকটার হাত কাঁপছে দরজা খোলার সময় দেখল রানা। রুপিনস্ট্রাইপের পিঠে বাঁ হাতের থাবা মেরে ভিতরে ঢুকিয়ে দিয়ে অনুসরণ করল রানা। ডান দিকে এক পা সরে গিয়ে দেয়াল ঘেষে দাঁড়াল ও। কিন্তু অন্যান্যরা—কিংবা মাত্র একজনই—অপেক্ষা করছিল ভিতরে।

রুপিনস্ট্রাইপ মেয়েলী ধরনের আর্তনাদ করে উঠে হাঁটু মুড়ে বসে পড়ল। জ্ঞানাহীন, পোর্টেবল ক্রিনের পার্টিশন করা ছোট রুমটা আবছা ভাবে ফুটে উঠল চোখের সামনে রানার। বাল্ব জ্বলছে একটা। ধাক্কাটা খেল রানা বাঁ দিক থেকে। হুমড়ি খেয়ে পড়ল ও। মাথার পাশে ঘা লাগল ভারী একটা

কিছু। রিভলভারটা টেনে নিল কেউ জোর করে মুঠো থেকে। মাথাটা বনবন করে ঘুরছে রানার। কিন্তু এই আঘাত বেশিক্ষণ ভোগাবে বলে মনে হলো না ওর।

আন্তে আন্তে সামলে উঠছে রানা। সময় হয়েছে মনে হতেই মাথা ঝাকিয়ে উঠে বসল ও। সরাসরি তাকাল রানা বিছানার উপর শোয়া লোকটার দিকে। অনুমান মিথ্যা নয় ওর। বিছানায় শায়িত লোকটা দেখছে ওকে পিট পিট করে। হবার্ট ডনফিলকে চিনতে অসুবিধে হলো না রানার।

রানাকে দেখে যেন কৌতুকবোধ করছে ডনফিলের চোখ দুটো, 'তুমি কে, বাপু? আর একজন প্রিজনার?'

ব্যথায় মাথাটা খসে পড়তে চাইছে ঘাড় থেকে রানার। মাথা নেড়ে উত্তর দিল রানা। বলল, 'আপনি ডক্টর ডনফিল?'

'হ্যাঁ। চেনো দেখছি আমাকে। কিন্তু তুমি বাপু রাগিয়ে দিয়েছ ওদেরকে।' পাকা চুলওয়ালা মাথাটা নাড়ল ঘন ঘন বৃদ্ধ। 'তুমি আমেরিকান এজেন্ট, আমার জন্যে এসেছ? এরকম কিছু একটা ঘটায় আশা করছিলাম আমি।'

নিজের নাম ছাড়া বাকি পরিচয় গোপন রাখল রানা। একমাত্র দরজাটি বন্ধ হয়ে গেছে বাইরে থেকে। পার্টিশনের ওদিকে কিছু নেই জানা কথা। পালাবার প্রশ্ন নেই মনে। বেঁচে থাকতে পারলে উদ্দেশ্য পূর্ণ হয়।

'ওরা তোমাকে খামোকা সুইসাইড করতে পাঠিয়েছে। হোপলেন্স।' ডনফিল মন্তব্য করল। রানা অনুমান করল নিশ্চয় কোথাও লুকানো আছে লিসনিং ডিভাইস। সব কথা শুনেছে শত্রুপক্ষ। জোর গলায় কথা বলে উঠল রানা, 'কিন্তু যতটা হোপলেন্স ভাবছেন ততটা নয়। আমি পেয়েছি আপনাকে।'

মধ্যবয়স্ক, স্বাস্থ্যবান, ছোটখাট ডনফিল। মাথায় থেঁ রঙের চুলগুলো শেঁকে সাদা হয়ে গেছে। নীল চোখ জোড়া সবসময় ছলছল করছে। দাড়ি অগোছাল। ডবল-ব্রেস্টেড স্যুটটা ময়লা আর কোঁচকানো। গালে আঁচড়ের দাগ। নখের আঁচড় হওয়াও বিচিত্র নয়। মাথাটা একটু তুলে বৃদ্ধ কথা বলে উঠল, 'মাসুদ রানা, ইউ সে? তোমরা জানলে কিভাবে ড্যান্সারদের সম্পর্কে?'

'খুব সহজে জেনেছি।'

'কিন্তু কতটুকু আর জানো তোমরা এদের ব্যাপারে? এরা রিলিজিয়াস ফ্যানাটিসিজম আর পলিটিক্যাল অ্যামবিশনের মিস্ট্রার।' উঠে বসল ডনফিল বিছানার ওপর।

রানা বলল, 'সব জানি। সে মত গ্ল্যানও করেছি আমরা। সব ধসে পড়বে সময় হলে। চিন্তার কিছু নেই আপনার।'

মাথা মেড়ে ডনফিল বলল, 'তবে তো ভালই।' বৃদ্ধ মুখ বিকৃত করে ব্যথা সহ্য করার প্রয়াস পেলে বলে মনে হলো, 'কিন্তু দেরি যা হবার হয়ে গেছে।'

রানা মাথার ব্যথায় কপাল টিপে ধরে বলল, 'বোকামিটা আপনার।'

মেয়েকে জার্মানীতে দেখতে এসেই ভুল করেছেন। যাকগে, সব সমাধান করে দেব আমরা।’

মাথা উঁচু করে রানাকে দেখল ডনফিল, ‘তুমি—তুমি বনবনকে দেখেছ?’

‘খুব ভাল মেয়ে আপনার।’

‘আমাকে স্বীকার করেনি পাগলী।’ ডনফিল উদাস গলায় বিড়বিড় করে উঠল, ‘আমার নিজের মেয়ে, আমার ছোট বনবন—আমাকে খুনী বলে গাল দিল—’

‘আপনি অতীতে যা করেছেন...’

‘কিছুই করিনি আমি অতীতে! সব মিথ্যে!’ জোর দিয়ে বলল বৃদ্ধ, ‘ও আমাকে বলবারও সুযোগ দেয়নি।’

‘সবাই তাই বলে। মিলিটারি অর্ডার মেনে সব করেছেন—এই তো বলতে চান?’

‘না। ও ধরনের কোন কিছুই জীবনে করিনি আমি, ইয়ংম্যান। কিন্তু তোমাকে বুঝিয়ে লাভ কি আমার? বনবন কোন কথাই শুনল না আমার। পুলিশ ডেকে ধরিয়ে দিল খামোকা...’

‘সত্যি কথাটা বলা উচিত ছিল আপনার।’ আন্দাজে তীর ছুঁড়ল রানা।

‘তা কেমন করে সম্ভব হয়! তাহলে আরও জঘন্য দাঁড়াত ব্যাপারটা।’

‘জঘন্য, সে কেমন?’

ঘন ঘন মাথা নাড়ল ডনফিল, ‘সে কথা বলতে চাই না আমি।’

‘কিন্তু বলতে হবে। এখান থেকে বেরিয়ে।’

‘আমরা কোনদিন বেরোতে পারছি না ড্যান্সারদের মুঠো থেকে।’ তিক্ত গলায় বলল বৃদ্ধ।

‘কিন্তু আমাদের লোক জানে আমি এখানে এসেছি।’ আড়ালে দাঁড়িয়ে শ্রবণরত লোকগুলোর কথা শ্রবণ আছে রানার, ‘শুনুন, মি. ডনফিল। হাতে বেশি সময় নেই আমাদের। আপনি জানান কি চাই আমি। লভনে যাবার সময় লেসার বীম ডেভেলপমেন্টস্-এর ডাটা সঙ্গে নিয়ে গিয়েছিলেন আপনি। আমাদের কোন লোক সেগুলোর সন্ধান পায়নি।’

‘সঙ্গে করে নিয়ে গিয়েছিলাম, সত্যি,’ বৃদ্ধ হতাশ কণ্ঠে জানাল, ‘ওটা আমারই ভুল।’

‘কি ছিল কাগজগুলোয়?’

‘ফর্মুলা, নোট, নকশা। নকশাগুলো ঐকেছিলাম, লভনের বন্ধুদেরকে বোঝাবার জন্যে।’

‘ওগুলোর ব্যাখ্যা করতে আপনি ছাড়া আর কেউ...’

‘না। কেউ পারবে না।’

‘ড্যান্সাররা চাপ দিয়েছে আপনাকে? ব্যাখ্যা করার জন্যে?’

‘এখনও দেয়নি। কিন্তু সে সময় ঘনিয়ে আসছে। আমি জানি।’

‘ব্যাখ্যা করতে রাজি হবেন আপনি?’

এই প্রথমবার জ্বলজ্বল করে উঠল বৃদ্ধ বিজ্ঞানীর চোখ জোড়া, 'তাছাড়া উপায় কি! ওরা নিরাপত্তা, বন্ধুত্ব আর আশ্রয় দেবার প্রস্তাব দিয়েছে। এমন জায়গা দেবে যেখানে কেউ বিরক্ত করবে না আমাকে, যেখানে নিরলস সাধনা করে যেতে পারব...'

'কোথায়?'

'জানি না। ড্যান্সারদের সঙ্গেই বোধহয়।' বৃদ্ধ উপরের দিকে তাকাল, 'ভাবছ, নীতি নেই আমার, আদর্শ হারিয়ে ফেলেছি? ভাবতে পারো—কাজ ছাড়া জীবনে আর কোন জিনিস চিনি না আমি। এই শেষ বয়সে যদি কাজ করতে না পারি তাহলে বাঁচব না—'

বুড়োর ভীমরতি ধরছে বলে মনে হলো রানার। ও জানতে চাইল, 'কাগজগুলোয় আর কি আছে?'

'ব্যাখ্যা করে কোঝানো অসম্ভব। ভাঁজ করা নোট বইয়ের ভিতরই যা কিছু আছে। ইসপেক্টর জেনারেল বেলচা আমাকে অ্যারেস্ট করার সময় সেটা পকেটেই ছিল।'

'সে নিয়েছে ওটা?'

'না। ড্যান্সারদের হাতে পড়ার পর ওটা হারাই আমি। ওদের কাছেই আছে এখন!'

'তুনুন, আপনি আশায় বুক বাঁধুন। আমাকে অবিশ্বাস করবেন না। আমাদের লোক ড্যান্সারদের সম্পর্কে যথেষ্ট জানে। আমরা সম্পূর্ণ গ্যাঙটাকে ধ্বংস...'

এমন সময় গত কয়েক মিনিট থেকে যে বাধাটা প্রত্যাশা করছিল রানা তা এল। ওর জানা নেই ভাগ্য পরীক্ষায় ও হারবে না জিতবে। ড্যান্সারদেরকে ও বোঝাতে চেয়েছে ওদের সম্পর্কে অনেক কথা জানে ও। কথাগুলো বের করার জন্যে বাঁচিয়ে রাখতে পারে ওরা। কিন্তু ওর কথা যদি বিশ্বাস না করে থাকে তাহলে দৌরগোড়ার লোকটার সামান্য অঙ্গুলি হেলনে প্রাণ হারাতে হবে ওকে।

জোর করে মুখে হাসি নিয়ে ঘুরে তাকাল রানা।

রানা সেই মুহূর্তে বুঝতে পারল সেলিম আল-রশিদের মুখোমুখি হয়েছে ও।

লোকটার দু'ধারে আর্মড ড্যান্সার দু'জন কোমরে হাত দিয়ে দাঁড়িয়েছে। নিচের পাবলিক স্টেজের গার্ডগুলো এদের তুলনায় শিশু। এদের দু'জনার নিঃশব্দ হাবভাবে উগ্র মেজাজের উৎকট প্রকাশ লক্ষ করল রানা। সবচেয়ে আকর্ষণ করে ডিমের মত দু'জোড়া চোখ। চোখ দু'জোড়ার দিকে না তাকিয়ে রেহাই নেই কারও বুঝতে পারল রানা। তাকিয়ে থাকারও সাধ্য নেই। সারা শরীরে আতঙ্কের ঠাণ্ডা স্পর্শ খেলে গেল রানার চোখ দু'জোড়ার দিকে চাইতে। এক জোড়া হাউন্ড গার্ড দু'জন। ছোট সেলের ভিতর ভেসে বেড়াতে শুরু করেছে মৃত্যুর পদধ্বনি।

গার্ড দু'জনার চেয়ে আকারে বড়, রানার চেয়ে লম্বা, মাঝখানের

লোকটা। গার্ড দু'জনার পরনে গাঢ় রঙের ইউরোপীয়ান পোশাক। সেলিম আল-রশিদ পরেছে ঐতিহাসিক খলিফাদের বিলাসবহুল লম্বা পোশাক। পোশাক দেখে লোকটার বুদ্ধিমত্তাও প্রাচীন ধরনের মনে হতে পারে। কিন্তু পার্থক্যটা বলে দিতে হলো না রানা'কে। ওর বুঝতে অসুবিধে হলো না যে ওর সামনে চারকোনা মুখাকৃতি লম্বা স্বাস্থ্যবান দৃঢ়কায় লোকটা ইনটেলেকচুয়ালদের মধ্যমণি হবার যোগ্যতা রাখে।

উঠে দাঁড়াল রানা।

একজন গর্জন করে উঠল, 'হাটু মুড়ে বসো, বেয়াদব! আল্লার দ্বিতীয় পয়গম্বরের সামনে...'

রানা কান দিল না কথাটায়।

সেলিম আল-রশিদ একটা লম্বা শক্তিশালী অলঙ্কৃত হাত নাড়ল। বলল, 'দরকার নেই। এখনও জানে না ও। কুকুর কিনা। কথা বলব আগে, দেখি ভাষা বোঝে কি না।'

পিছিয়ে গেল গার্ডটা এক পা।

সেলিমের গলার স্বর মার্জিত, পরিশীলিত। রানার মুখোমুখি দাঁড়াল সে। 'মাসুদ রানা, অফকোর্স। কাউন্টার ইন্টেলিজেন্সের দুঃসাহসী অপারেটর, ইয়েস। বেচারী ডক্টর সাদেক নিখোঁজ হবার পর পাঠানো হয়েছে। বারোট্টা দেশের তরফ থেকে জেনারেল রাহাত খানের কাছে ইনফরমেশন পৌঁছেছিল তার আগেই। ইউ অ্যাডমিট ইওর আইডেনটিটি?'

কাঁধ ঝাঁকিয়ে রানা বলল, 'হোয়াই নট?'

'মেজর জেনারেল এবার ভুল করেছে। ভুল লোককে পাঠিয়েছে সে। ভুলের দাম দিতে হবে তাকে। তুমি ফিরে যেতে পারছ না বলে ভয় পাচ্ছ, মাসুদ রানা?'

'পাচ্ছি।' ফস করে বলল রানা, 'তোমার জন্যে ভয় পাচ্ছি। তোমাকে মারব না শুধু, হাতের সুখ মিটিয়ে তবে মারব।'

'তুমি সাহসী লোক। কিন্তু তার চেয়ে বেশি বোকা। তুমি জানো অফকোর্স, সব কথা তোমাদের ওনেছি আমি?'

হিসেব করে রিস্ক নিল রানা একটা, 'আমি সন্দেহ করেছিলাম মাইক্রোফোন লুকানো থাকতে পারে এখানে। জেনেভনেই রিস্কটা নিয়েছিলাম! কিন্তু তাতে কি? আমার বন্ধুরা তোমার কথা জানে। তারা মুভ করবে সময় হলেই।' রানা হাসল, 'দ্বিতীয় পয়গম্বর স্যাপারটার ব্যাখ্যা? তোমার ফেলোয়ারদের কাছে তুমি বুঝি অমর, সেলিম?'

দু'জন গার্ডই শূন্য লাফ মেরে উঠল। রশিদ হাত নেনড়ে দমন করল তাদেরকে। একটা অদ্ভুত জিনিস লক্ষ করল রানা। লোক দু'জন উপর দিকে লাফ দিয়ে একই জায়গায় পা নামিয়ে দাঁড়িয়ে রইল। কিন্তু মাত্র এক সেকেন্ডের মধ্যে ওদের ক্রোধ এমন চরম পর্যায়ে পৌঁছেছে যে হাপরের মত হাঁপাচ্ছে দু'জন ফৌস ফৌস করে। রানা বুঝতে পারল এদের হাতে পড়লে বিনা দ্বিধায় বিনা অস্ত্রে মাংস খাবলে তুলে মেরে ফেলবে ওকে আধ মিনিটের

মধ্যে।

‘আমি কি আছি আর কি হব সেটা নিয়ে গবেষণা করার সময় তোমার নেই। আমাকে বলতেই হচ্ছে, মৃত্যুর অত্যন্ত কাছে এসে পড়েছ তুমি।’

‘তুমিও।’ রানা দৃঢ় গলায় বলল, ‘আমি একা কাজ করছি না এখানে, তুমি জানো।’

‘যতটুকু ভাব তার চেয়েও বেশি নিঃসঙ্গ তুমি। আই অ্যাম সাস্পিশিয়াস, মাসুদ রানা। ডনফিলের সাথে তোমার কথা শুনেছি আমি। বিশ্বাস করিনি।’

ভাগ্য পরীক্ষায় হেরে গেছে বুঝতে পারল রানা। বৃকের ভিতর দ্রুত হাতুড়ির বাড়ি পড়ছে ওর। আল-রশিদকে বোকা বানানো সম্ভব হয়নি। সাধারণ লোক ভেবে বোকামি করে বসেছে ও।

‘এবং তোমার যোগ্যতায় কোনও সন্দেহ নেই আমার। তোমার সম্পর্কে রাহাত খানের চেয়ে কোন অংশে কম জানি না আমি। তুমি বোকা, কিন্তু বোকাদের লীডার হবার অযোগ্য নও। কি জানে তোমার বন্ধুরা ড্যান্সারদের সম্পর্কে?’

‘আমার মুখ থেকে কোন কথা জানার ভাগ্য করে আসেনি তুমি।’

‘আমি ভাগ্য করে এসেছি যা চাই তাই পাবার। সারান্ধ্র মনে রাখার চেষ্টা করো, আমি তোমাকে পাওনা শান্তি দিতে চাই। কাউপারকে বেদম মেরেছ তুমি ঢাকায়, বনবনের রুমে খুন করেছ বিন আকরামকে। জীবনভর মনে গেঁথে থাকবে আমার অত্যাচারের কথা—তারপর তোমার সুবিচার হবে—যদি আমার দয়া হয়।’

‘তার আগে আমাদের শান্তির শিকার হবে তুমি, সেলিম। লিসিলকে খুন করার কথা ভুলিনি আমরা।’

‘লিসিল আর আতহার দুই ইডিয়েট—তোমারই মত।’

হঠাৎ জানতে চাইল রানা, ‘কোন দেশে ঘাঁটি গেড়েছ আসলে তুমি?’

সেলিম আল-রশিদ হাসল একটু, ‘তুমি বোকা তাই আমাকে বোকার মত প্রশ্ন করছ। কিন্তু উত্তর দিতে আপত্তি নেই আমার। জীবন খুব মূল্যবান। সবাই বেঁচে থাকতে চায়। বোকারা চায় মরতে। বোকামির পরিচয় না দিতে উপদেশ দিচ্ছি। বুদ্ধিমান হবার চেষ্টা করো। হ্যাঁ, চেষ্টা করলেই হবে। তোমাকে আমার বুদ্ধি ধার দিতে পারব। দিতে চাই, যদি তুমি চেষ্টা করো। তোমাকে হয়তো কাজে লাগাতে পারব। না, কোন দেশের, কোন মানুষের হয়ে কোন কাজ করি না আমি কখনও। আল্লা আর আল্লার সৃষ্টির স্বার্থে কাজ করি আমি। আমি তাঁর সত্যিকার পয়গম্বর, এ সেকেন্ড সান অভ আল্লা—জগতে আলো আর শান্তি কায়ম করার উদ্দেশ্যে প্রেরিত। আল্লা এবং তাঁর ফেরেস্টাদের মহান উদ্দেশ্য পূর্ণ হবে।’ সেলিম একটু থেমে আবার হাসল, ‘দেখতে পাচ্ছি তুমি আমাকে পাগল ভাবতে শুরু করে দিয়েছ। তোমার ধারণার মধ্যে কোন সত্যতা নেই। বোকামি ত্যাগ করো, মাসুদ রানা...’

এবার সময় হয়েছে বোঝাবার, রানা সিদ্ধান্ত নিল। নিজের ভূমিকায় অবতীর্ণ হলো ও।

ধারাল ক্ষুরের উপর দিয়ে হেঁটে যাবার সময়ের মত কাটাল পরবর্তী মুহূর্তগুলো। আর কোন উপায় ছিল না রানার। প্রাণ ছাড়া হারাবার নৈইও কিছু।

দুটো হাউন্ডের কথা ভাবতে হলো রানাকে। ওদের হাত থেকে এক মুহূর্তের সময় নেয়া দরকার। ডনফিলকেই বেছে নিতে হলো ওকে।

ওরা ভুলেও আশঙ্কা করেনি। সেলিম আল-রশিদ তাই মুখোমুখি দাঁড়িয়েছিল। অকস্মাৎ বিদ্যুৎ গতিতে ঘুসি মেরে বসল সেলিমের নাক লক্ষ্য করে রানা। সামনে এগোল না ও। পিছিয়ে এল দুই লাফে ডনফিলের বিছানার কাছে। লাফিয়ে উঠেছে গার্ড দুটো। কোলে তুলে নিল ডনফিলকে রানা দুই হাত দিয়ে। ডনফিলের ক্ষতি করবার ইচ্ছে ওদের নৈই একথা জানা আছে ওর। শূন্যে তুলে ছুঁড়ে দিল ডনফিলকে ও গার্ড দু'জনার দিকে। সাঁ করে বাঁ দিকে সরে গেল তারপরই।

ডনফিল গিয়ে ঠেকল গার্ড দু'জনার বুকের কাছে। লুফে নিল ওরা। বাধ্য হলো আসলে বৃদ্ধকে চারটে হাত বাড়িয়ে ধরে ফেলতে। শূন্য থেকে মেঝেতে পড়লে অক্লা পাবে সাথে সাথে তা বোঝার মত মাথা ওদের আছে। আল-রশিদ নাক চেপে ধরে গর্জন করে উঠল, 'মাহমুদ!'

ডনফিলকে ধরে ফেলেই মেঝেতে নামিয়ে রাখল গার্ড দু'জন। রানাকে তখন দেখা যাচ্ছে দোরগোড়ায়। ঘুরে দাঁড়িয়ে পিছু ধাওয়া করল একজন গার্ড। সেলিম আল-রশিদের গুপ্তস্বাক্ষর জেনো রয়ে গেল একজন সেলের ভিতর। দরজার বাইরে বেরিয়ে গার্ড দেখল করিডরে মোড় নিয়ে চোখের আড়ালে চলে গেল রানা।

কয়েকটা সিঁড়ি বাকি থাকতেই থমকে দাঁড়িয়ে পড়ল রানা। পিছনে ভারী পদশব্দ ছুটে আসছে দ্রুত। ড্যানিং অ্যাক্ট শেষ হয়েছে আবার। এবার চারগুণ যুবতী। হলের ভিতর ইতস্তত চরে বেড়াচ্ছে কেন ওরা বুঝতে পারল না রানা। ছুটন্ত শব্দ এসে পড়েছে। দেরি করা বোকামি। লাফ দিয়ে প্রায় নয় যুবতী ড্যান্সারদের মাঝখানে পড়ল রানা।

তীক্ষ্ণ বাঁশির মত গলায় কয়েকজন চৈচিয়ে উঠল। বিভিন্ন ভাষা সজীব হয়ে উঠল মুহূর্তে। উর্দু, ইংরেজী, আরবী, জার্মান, চীনা ইত্যাদি ভাষা এক সাথে শোনার ভাগ্য এই প্রথম হলো রানার। দু'হাত দিয়ে মেয়েগুলোকে দু'পাশে সরাতে সরাতে ছুটল রানা। হলের ভিতর শুকুনিদের চিংকারে লঙ্কাকাণ্ড বেধে গেছে।

স্টেজ এরিয়ার দিকটা ফাঁকা দেখে সেদিকেই দৌড়ল রানা। ভাঁজ করা পর্দার পাশ দিয়ে ছুটতে ছুটতে করিডরের শেষ প্রান্তে এসে মোড় নিল রানা। কোন দিকে চলেছে সে সম্পর্কে কোনও ধারণা নৈই ওর। কিন্তু বেশিদূর যেতে চায় না ও।

গার্ডের পায়ের আওয়াজ আবার এগিয়ে আসছে। একটা দরজা বন্ধ হয়ে যাচ্ছে দূরে দেখতে পেল রানা। একটা বাহর অলঙ্কার ঝলসে উঠল রুমের

উজ্জ্বল আলোয়। বন্ধ হয়ে গেল দরজাটা। সেদিকেই ছুটল রানা। কাছাকাছি পৌঁছুবার আগেই দরজাটা আবার ফাঁক হলো একটু। ফর্সা এক যুবতীর মুখ বেরিয়ে এল বাইরে। রানাকে প্রাণপণে ছুটে আসতে দেখে বড় বড় চোখ জোড়ায় বিস্ময় কুটে উঠল। তারপর দরজাটা আরও ফাঁক করে হাত-ইশারায় আহ্বান করল রানাকে। চিনতে পারল রানা। ড্রেসিংরুমের কাছে মেয়েটিকে ডেকেছিল ও।

দৌড় না থামিয়ে সোজা রুমের ভিতর ঢুকে দরজা বন্ধ করে দিল রানা। তারপর অকস্মাৎ সবেগে ঘুরে দাঁড়িয়ে চেপে ধরল যুবতীর মুখ। তার ঘাড়ের রানার হাতের চাপ লাগল। গার্ডের পায়ের শব্দ কাছে সরে এল। তারপর মিলিয়ে গেল দূরে। যুবতীর মুখ থেকে হাত সরিয়ে নিয়ে রানা বলল, 'থ্যাঙ্কস।'

'রেহাই পাবে না তুমি।' ফিসফিস করে বলল মেয়েটি। রানা ওকে ছেড়ে দিলেও সরে গেল না ও, 'যাই হোক, আমিই মাদামোয়াজেল জুজু, যাকে তুমি খুঁজছিলে। তখন স্বীকার করতে ভয় পেয়েছিলাম আমি, কারণ তোমার সাথে ডেট ছিল না আমার।'

'এখন?'

'এখনকার কথা আলাদা।'

'এখান থেকে বেরুবার রাস্তা আছে?' রুমের চারটে দরজা লক্ষ করে বলল রানা।

'না, নেই। কপালে খারাবি আছে তোমার।' সরে গেল জুজু। রানাকে নিরীক্ষ করতে করতে বলল, 'ওরা তোমার পিছনে লাগল কেন? মাহমুদ আর হারাকিম ভয়ঙ্কর...তোমার কপালে...আমাকেও ছাড়বে না ওরা।'

'আল্লার দ্বিতীয় পরগম্বর হাত করতে চায় আমাকে। তোমার বিপদ ঘটবে জেনেও ডাকলে কেন?'

ট্রাঙ্ক, কস্টাম, সিঙ্গল চেয়ার, দাগ পড়া আয়না, মেক-আপের নানা কৌটো রুমটার ভিতর। একটি মাত্র জানালা। সেদিকে এগিয়ে যাবার উপক্রম করতে জুজু বলে উঠল, 'জানি না। ওদেরকে আমি সহ্য করতে পারি না আর। রোজ আসে হারাকিম আমার ঘরে—আমাকে ছিঁড়ে খায় সবাই মিলে...ওদের বিরুদ্ধে কিছু করার সুযোগ পেলো ছাড়ি না আমি...'

জামালার কাছে গিয়ে সেটা সামান্য খুলে বাইরে তাকাল রানা। করিডরের শেষ প্রান্ত অবধি দেখা যাচ্ছে। কয়েকজন ড্যান্সার হাত নেড়ে তর্ক করছে উত্তেজিতভাবে। হঠাৎ দু'ভাগে ভাগ হয়ে গিয়ে হাঁটা দিল ওরা। একটা দল এদিক পানে আসছে। খোলা তলোয়ার ওদের হাতে। ওদের গতিবিধি দেখতে লাগল রানা আড়ালে থেকে।

'মাসুদ রানা?'

খানিক পর জুজুর গলা শুনে সবিস্ময়ে ফিরে তাকাল রানা। ওর নাম জানল কিভাবে মেয়েটি? জুজুর ঠোটে রহস্যময় হাসি দেখে সতর্ক হয়ে উঠল রানা। কিন্তু দেরি হয়ে গেছে তখন। কিছু একটা বাড়ি খেল ওর মাথার সাথে।

বালব্‌টা সহস্র টুকরো হয়ে জুলতে লাগল চোখের সামনে। পায়ের নিচের মাটি কাঁপছে অবিরাম। কিন্তু এটুকুই সব নয়।

ঢলে পড়ে যাবার সময় জুজুর নরম দুটো হাত ওকে আঁকড়ে ধরল স্পষ্ট অনুভব করল রানা। জানালার কাছ থেকে সরিয়ে আনল জুজু ওকে। মৃদু গলায় কাকে যেন কি বলল। সেলিম আল-রশিদের নামটা শুধু ধরতে পারল রানা। তারপর একটা ছুটন্ত পদশব্দ দূরে মিলিয়ে গেল।

রানার মনে পড়ল ট্রয় ধ্বংসের জন্যে দায়ী ছিল এই মেয়ে জাতেরই নামকরা একজন। রানার দেহের সাথে শরীর ঠেকিয়ে রেখেছে জুজু। পায়ের শব্দ আবার দূর থেকে কাছে এসে থামল। রানা অনুভব করল ওর পেশীবহুল বাহুতে সূঁচের মত কিছু ঢুকছে। চোখ মেলার চেষ্টা করল ও। আলোয় ঝলসে উঠল চোখ। তারপরই বন্ধ হয়ে গেল চোখের পাতা।

অন্ধকারে সম্পূর্ণ হারিয়ে ফেলল রানা নিজেকে।

## ছয়

সময় আর স্থানের কোনও অস্তিত্ব নেই। ওর দেহের সাথে হাড়ের, মাংসের, মাংসপেশীর, রক্তের, পারিপার্শ্বিকতার কোনও সম্পর্ক খুঁজে পাচ্ছে না ও। অনুভব করছে কি যেন কাঁপছে সর্বক্ষণ। কিন্তু নিজে কাঁপছে কিনা বুঝতে পারছে না। ওজনহীন বলে মনে হয় নিজেকে। কিছুই দেখতে পাওয়া যায় না। মাঝে মাঝে হঠাৎ এক ঝলক আলো যেন খেলে যায়। কত দূর কত কাছে বোঝা যায় না। অর্থহীন মনে হয় সব। ও জানে বেঁচে আছে এখনও, কোথাও নিয়ে যাওয়া হচ্ছে ওকে—এর বেশি কিছু না।

এর বেশি কিছু চায়ওনি রানা।

এরপর লম্বা একটা সময় সম্পর্কে কোন ধারণা করতে পারল না রানা। চিন্তাশক্তি ফিরে আসার পর অকারণ একটা জীতিবোধ কাঁপিয়ে তুলল ওর অস্তিত্ব।

ঘাড়ের ব্যথা। মাথার ভিতর বিদ্রোহ করেছে শিরাগুলো। নড়াচড়ার চেষ্টা করে এক-আধ ইঞ্চির বেশি সরাতে পারল না মাথাটাও। গালে হাত দেবার জন্যে হাত দুটো টানার চেষ্টা করল এবার। আসছে হাত দুটো উঠে গালের দিকে। তার মানে বাঁধা নেই।

খোঁচা খোঁচা দাড়িতে ঠেকল হাত দুটো। পিঠ পেতে শুয়ে আছে ও। কত দিন কেটে গেছে কে জানে। এটা পৃথিবী তাতে কোন সন্দেহ নেই রানার। শব্দ মাটির স্পর্শ পিঠে। বেঁচে আছে, কারণ অক্সিজেন পাচ্ছে ও। কিন্তু বৃষ্টি গরম। মাথার ব্যথাটা ভীষণ ঝাঁপ করে দিচ্ছে মেজাজ। গতকাল বরফের মতো ঠাণ্ডার মধ্যে কাটিয়ে এখন গরমের হাতে পড়েছে

দেহটা।

খিদে পেয়েছে রানার। তার চেয়ে বেশি তৃষ্ণায় কষ্ট পাচ্ছে। কেউ খেতে দিতে আসছে না। কিছু যান্ত্রিক আর কিছু পশুর শব্দ ছাড়া আর কিছুই শোনেনি ও।

‘হের মাসুদ রানা?’

ঠাণ্ডা ভূতের গলা যেন নিরবচ্ছিন্ন অন্ধকারে ফিসফিস করে উঠল।

‘হের মাসুদ? জেগেছ...তুমি জেগেছ? হের মাসুদ?’

প্রথমবার চোখ মেনে দূরে বাঁ দিকে বিশ্বয়বোধক চিহ্নের মত সাদা আলো দেখতে পেল আবছা ভাবে রানা। এছাড়া অন্ধকার অটুট হয়ে রইল সর্বত্র।

‘রানা—ওহ হের রানা! তুমি বেঁচে আছ...ওহ, তুমি বাঁচবে।’

বিশ্বয়বোধক চিহ্নের মত দেখতে আলোটা ক্রমশ পরিষ্কার হয়ে উঠছে। কাছে এগিয়ে আসছে আরও। অন্ধকার দূর হয়ে যাচ্ছে দু’পাশের। এবার দেখতে পেল রানা। ঠোট নড়ছে ওর। বিড়বিড় করে ওর নাম ধরে বারবার ডাকছে বনবন।

এই প্রথমবার চেষ্টা করল রানা দ্রুত শক্তি ফিরে পেতে। জোরে ঝাঁকাল মাথাটা। হাত মুঠো করে আস্তে আস্তে ঘুসি মারল মাটিতে। হাত দুটোর উপর ভর দিয়ে উঠে বসতে চেষ্টা করল সে।

রানা বসতে পেরে বুঝতে পারল যতটা দুর্বল ভেবেছিল নিজেকে ততটা দুর্বল সে নয়।

‘বনবন।’

‘এই যে আমি...’

‘কোথায় তুমি?’

‘এই তো। তোমার পাশে।’

রানা হাত বাড়াতেই নরম তুলতুলে মাংসের স্পর্শ পেল। ওর হাতটা ধরে রইল বনবন গালের উপর দু’মুহূর্ত। ‘কেমন আছ এখন তুমি, রানা?’

‘কোথায় আছি আমরা?’

‘একটা ঘরে। কোথায় জানি না। আস্তে কথা বলো, প্রীজ। ওরা বাইরে ব্যস্ত রয়েছে। ওহ থ্যাঙ্ক গড, ইউ আর অ্যালাইভ! সারাক্ষণ লক্ষ্য করেছি তোমাকে আর ভেবেছি এই বুঝি নিঃশ্বাস বেরুনো বন্ধ হয়ে গেল। আর শিউরে উঠেছি থেকে থেকে তোমার লাশ নিয়ে এই অন্ধকার ঘরে একা ঘন্টার পর ঘন্টা দিনের পর দিন কাটাতে হবে ভেবে—’ রানার উরু দুটো ধরে ফেনল বনবন হঠাৎ, ‘পারবে না তুমি দাঁড়িয়ে থাকতে, রানা—প্রীজ।’

পায়ের জোর পরীক্ষা করার জন্যে উঠে দাঁড়িয়েছিল রানা। কিন্তু দাঁড়াতে না পেরে বসে পড়ল।

মলিন হয়ে গেছে বনবনের মুখের লাক্ষ্য। গরমের দাপটে খুলে ফেলেছে ও জ্যাকেটটা। জ্যাকেটটা দিয়ে মাংসল উরু দুটো ঢেকে রাখার চেষ্টা করল ও রানার চোখ পড়তে।

‘পানি।’ ফিস্ ফিস্ করে বলল রানা।

রানার জন্যে কিছু করার জন্যে উদগ্রীব হয়ে আছে বনবন। দ্রুত মাথা নেড়ে বলল, ‘তোমার জন্যে খানিকটা বাঁচিয়ে রেখেছি। খেতে খারাপ লাগবে তোমার, কিন্তু ফেলে দিয়ো না। খুব কম আছে।’ হাত বাড়িয়ে অঙ্ককার থেকে একটা এলুমিনিয়ামের বাটি টেনে নিয়ে বনবন ঠোটে ঠেকাল। দু’টোক পানি খেয়ে সেটা বাড়িয়ে দিল রানার দিকে। আস্তে আস্তে খানিকটা পানি খেল রানা।

‘কতক্ষণ ধরে এখানে আছি আমরা?’

‘দু’দিন, আমার মনে হয়।’

‘দু’দিন? পানি কখন পেয়েছি তাহলে?’

‘দিনে একবার। ফরগিভ মি, এই অবস্থায় আমাকে দেখে তুমি কি ভাবছ...’ জ্যাকেটটা গায়ে চড়াতে আরম্ভ করল ও। রানা সেটা ধরে বলল, ‘না। গরমে সৈন্ধ হয়ে যাবে।’

‘তুমি এত বেশি সময় অজ্ঞান ছিলে যে আমি ভাবছিলাম মরেই যাবে বুঝি...’

‘ওষুধটা সাইন্টিফিক নয় সম্ভবত। ঠিক হয়ে যাবে এবার আস্তে আস্তে। চিন্তা কোরো না।’ শুয়ে পড়ল রানা ক্লান্তিতে। হাঁপিয়ে উঠেছে ও খানিকক্ষণ বসে থাকায়। জানালাহীন ঘরটার দিকে মনোযোগ দিল ও। চারকোনা ঘরটা। আট ফুটের মত হবে। পুরানো মোটা কাঠের দরজার উপরের সামান্য লম্বা একটা ফাঁক আলো আসার একমাত্র উৎস। ঘরের ভিতরে মূলমুদ্রের দুর্গন্ধ।

উঠে দাঁড়িয়ে দরজার সামনে গেল রানা বনবনের কাঁধ ধরে। পুরানো কাঠ, স্টীলের মত মজবুত। বাইরে থেকে ঝিল আঁটা। কীহোল বলে কিছু নেই কপাটের কোথাও। ধাক্কা দিয়ে হেলানো গেল না একচুলও। ধানের সমান লম্বা একটু ফাঁক দেখতে পেয়ে রানাকে দেখাল বনবন। কপাটের গায়ে নাক ঠেকিয়ে বাইরেটা দেখার চেষ্টা করল রানা।

যা দেখল তাতে পরিষ্কার কিছুই বুঝতে পারল না ও। নীল রঙের খানিকটা টুকরো, আর ব্রাউন রঙের খানিকটা টুকরো ছাড়া কিছুই দেখা গেল না। একবার মনে হলো উটের ডাক শুনতে পেয়েছে ও। তারপর পরিষ্কার বুঝতে পারল জীপ স্টার্ট নেবার শব্দ শুনছে। কণ্ঠস্বরও কানে এল। নিশ্চিত বোধ করল খানিকটা রানা। আরবী ভাষা, কিন্তু বুঝতে পারা গেল না পরিষ্কার শব্দগুলো।

ঘরের দেয়ালগুলো মাটি দিয়ে কোন জামানায় খাড়া করা হয়েছিল কে জানে। সূর্যের উত্তাপ আর শিশিরের জল খেয়ে কংক্রিটের চেয়েও কঠিন হয়ে গেছে। কোনও গর্ত নেই কোথাও।

দাঁড়িয়ে পড়ে কোট আর শার্ট খুলে ফেলল রানা। দরদর করে ঘামছে সারা শরীর।

‘চিড়িয়াখানার জানোয়ার দুটোকে ক’বার খেতে দেয় ওরা, বনবন?’

‘খিদে পেয়েছে তোমার?’ উদ্বিগ্ন শোনাৎ বনবনের গলা, ‘কি করি, কিছু

‘খিদে পেয়েছে তোমার?’ উদ্বিগ্ন শোনাল বনবনের গলা, ‘কি করি, কিছু নেই যে!’

প্রচণ্ড খিদের কথা ভুলে গিয়ে রানা হাত রাখল বনবনের মাথায়, ‘না থাকলে তুমি আর কি করবে বোকা মেয়ে।’

‘একবার সারাদিনে। অখাদ্য। সে যাই হোক, তোমার খিদের কি হবে?’

রানা বলল, ‘কে দেয়?’

গলার স্বর অসহিষ্ণু হয়ে উঠল বনবনের, ‘হারামিটা আরবী, ডবল শয়তান লোক। আমার হাত পা ধরে মিনতি করে—আদর করার জন্যে...’

বাইরে থেকে ভেসে আসা শব্দ শুনে রানা বুঝতে পারছে মরুভূমির মাঝখানে আছে ওরা। কিন্তু কোন্ মরুভূমি?

বনবনের পাশে শুয়ে পড়ল রানা। গভীর চিন্তায় ডুবে গিয়ে হঠাৎ সংবিৎ ফিরে পেতে ও দেখল বনবন ওর মাথার চুলে আঙুল বুলিয়ে দিচ্ছে।

‘তোমাকে এখানে আনল কিভাবে, বনবন?’

‘লিসিল জোর করে তোমার রুম থেকে বেরিয়ে যাবার পর...’

‘লিসিলের শেষ খবর বলেছে ওরা তোমাকে?’

‘না। কি?’

‘ওরা খুন করেছে লিসিলকে।’

বনবনের হাত স্থির হয়ে গেল রানার চুলে, ‘লিসিল! লিসিল খুন হয়েছে!’

রানা কথা বলল না। বনবন বলল, ‘কিন্তু দরজায় নক্ হতে আমি ভেবেছিলাম লিসিলই ফিরে এসেছে আবার, কিন্তু সে অন্য একটা মেয়ে—দরজা খুলে দেখতে পাই...’ বনবনের কান্নার শব্দ শুনল রানা।

একসময় কান্নার শব্দ থেমে গেল। আর কোন শব্দও নেই কোথায়! না বাইরে না ভিতরে। আরও পাঁচ মিনিট কাটতে রানা বলল, ‘তারপর?’

‘মেয়েটা আমাকে ধাক্কা মেরে মেঝেতে ফেলে দিলে মাথা ঠুকে যায় আমার দেয়ালে। তারপর মাথায় মারে সে অ্যাশট্রে দিয়ে। আর কিছু মনে নেই। জেগে উঠি আমি তারপর এই ঘরে। প্রথমে ভেবেছিলাম তুমি মরে গেছ। তোমার নিঃশ্বাস বুঝতে পারছিলাম না। বাইরে বেরুবার জন্যে ছুটোছুটি করে বেড়াই অনেকক্ষণ অন্ধকারে। কিন্তু বারবার হেঁচট খেয়েও পথ না পেয়ে চেষ্টাতে থাকি, কেঁদে ফেলি হুহু করে—গার্ডটা তারপর ঢোকে এখানে, সে আমাকে... সে আমাকে...’ ছেলমানুষের মত শব্দ শুঁজতে লাগল বনবন। শেষবেলা বলল, ‘অন্য একজন এসে পড়ে থামায় ওকে তারপর। তাই পরেরবার ঘরে ঢুকে গার্ড তোমাকে লাথি মারে মনের সাধ মিটিয়ে—আর আমি চেষ্টায়ে মরি।’

কপাল আর চিবুকের ব্যথার ব্যাখ্যা পেল রানা।

‘তোমার বাবার সাথে দেখা হয়েছে এখানে একবারও?’

‘বাবার সাথে? না।’

সময় কাটছে না। সব কথা ফুরিয়ে গেল। সব শক্তি নিঃশেষ হয়ে এল। এখন অপেক্ষা করা ছাড়া আর কোনও উপায় নেই।

ধৈর্য কিভাবে ধরতে হয় তা অজানা নয় ওর। কিন্তু একসময় ভেঙে যাবার উপক্রম করল ধৈর্যের বাঁধ। দিনটি যেন মঙ্গলগ্রহের দিনের মত। অনেকক্ষণ শুয়ে থেকে দেখল ও। তারপর অনেকক্ষণ মাটির দেয়ালে হেলান দিয়ে বসে রইল। তারপর আবার শুয়ে পড়ল। সময় বয়ে চলেছে অর্থহীনভাবে। কিন্তু ঘটছে না কিছুই।

গরমে হাপাচ্ছে মুখ হাঁ করে দু'জনে। নিশাপিশ করছে বনবন মাটিতে দেহ এলিয়ে দিয়ে। কেউ দেখতে এল না। ওদেরকে কেউ ঝাওয়াতে এল না।

বনবন একবার তার ছেঁড়া গাউনটা থেকে একফালি কাপড় ছিঁড়ে নিয়ে পানিতে ভিজিয়ে কপালে জলপটি দিতে শুরু করল। রানা তাকিয়ে তাকিয়ে দেখল। ওর কপালে জলপটি দেবার জন্যে বনবন এগিয়ে আসতে মাটিতে মাথা পেতে শুয়ে পড়ল রানা।

দরজার ফাঁক থেকে আবছা আলোটা ক্রমশ আরও ম্লান হয়ে যাচ্ছে। আবার একবার উঠে ক্ষুদ্র ফাঁকটা দিয়ে বাইরেটা দেশার চেষ্টা করল রানা। নীল টুকরো আর ব্রাউন টুকরো ছাড়া এবারও দেখা গেল না কিছু।

খিদে অসহ্য হয়ে উঠেছে রানার।

অন্ধকার ঘন হয়ে উঠেছে ঘরের ভিতর।

বনবন জিজ্ঞাসা করল অনেকক্ষণ পর, 'পালাবার সুযোগ পাব না আমরা একবারও?'

'কে চায়?'

'কে চায় মানে?'

'তোমার বাবাকে পেতে হলে ওরা যেখানে নিয়ে যেতে চায় সেখানেই যেতে হবে আমাদেরকে। পালাতে চাই না।'

'বাবার দেখা এ জীবনে পাব বলে আশা হয় না। ওঁর সাথে যে ব্যবহার আমি করেছি...'

'তোমার দোষ নেই তাতে।'

'নেই? বলো কি তুমি, যে কষ্ট দিয়েছি ওঁকে তাতে আমার মুখ দেখাবার জো নেই। একমাত্র প্রিয়জন মেয়ের কাছ থেকে অপমানিত হয়ে কোথায় যাবে কে জানে। কোথায় আর যাবার জায়গা আছে ওঁর। বাবা ওদের সাথে যদি যোগ দেন তাতেও আশ্চর্য হব না আমি।' বনবনের গলা ভেজা ভেজা হয়ে উঠল, 'তাছাড়া আর করবার আছেই বা কি ওঁর? আমিই তো ঠেলে দিয়েছি ওঁকে সেদিকে।'

কথা বলার ধৈর্যও নেই আর রানার।

ঠাণ্ডা হয়নি এখনও ঘর। কিন্তু গরম কমেছে। সূর্য ডুবেছে হয়তো এবার।

ঘরটা যে মরুভূমির মাঝখানে তাতে আর সন্দেহ রইল না রানার

কাহাকাছি থেকে মাঝেমাঝে উটের ডাক শুনে। অনেক দূর থেকে আরবদের গলা শুনে ক'জন লোক বোঝবার চেষ্টা করল ও। কিন্তু কোন সিদ্ধান্তে পৌঁছানো গেল না।

অন্ধকার জমট হয়ে বসেছে। বনবনকে দেখতে পাচ্ছে না রানা।

ধৈর্য ধরা ছাড়া কোন উপায় নেই ওদের।

কিন্তু খুব বেশিক্ষণ অপেক্ষা করতে হলো না।

ঠাণ্ডা বরফ হয়ে গেছে ঘরের মেঝে আর দেয়াল। থরথর করে কাঁপছে বনবন। দাঁতের সাথে দাঁতের বাড়ি লেগে ঠকঠক শব্দ হচ্ছে। বিড়ালের মত হাত পা গুটিয়ে মুখ গুঁজে মাটিতে পড়ে আছে সে রানার পাশে। রানা বিস্মিত হয়ে ভাবার চেষ্টা করল বনবনের দায়িত্ব ওর কাঁধে কখন থেকে চেপেছে আর কখন নামবে। তারপর কখন যেন ঘুমিয়ে পড়ল রানা।

ঘুম ভেঙে গেল অদ্ভুত এক শব্দে। জিভ আর টাকরা সহযোগে কে যেন টা টা করে আওয়াজ তুলছে। নড়ল না রানা। চোখের পাতা দুটো একটু ফাঁক করল সত্তর্পণে। মেয়েটি ঘুমুচ্ছে কুণ্ডলী পাকিয়ে।

দরজাটা খোলা। কিন্তু কেউ দোরগোড়ায় দাঁড়িয়েছে এসে। অন্ধকারের সাথে লোকটার গোটা দেহ মিলেমিশে গেছে প্রায়। খেজুরের গন্ধ আসছে ঘরের ভিতর। লোকটার দেহের রেখা দেখে বুঝতে অসুবিধে হচ্ছে না সে স্থূল চেহারার মোটাসোটা লোক। হাঁটার সময় অদ্ভুত দেখায় লোকটাকে। মাথাটা আগে বাড়িয়ে দিয়ে এগোচ্ছে সে আলগোছে পায়ে পায়ে। হঠাৎ জিভ আর টাকরা দিয়ে শব্দ করে উঠছে আপন মনে। তারপর হেসে উঠছে একটু। লোকটার হাসির মধ্যে গোলমাল লক্ষ করল রানা। ছন্দহীন হাসি। কিন্তু ক্রিমাকার আকৃতি নিয়েছে লোকটার গায়ের কব্বল। কোন অস্ত্র দেখা যাচ্ছে না।

উট ডেকে উঠল বাইরে। রানা নড়ল না। আজব প্রাণীটা ঘুমন্ত বনবনের কাছে এসে মাথা বাড়িয়ে দিয়ে দাঁড়িয়ে আছে। তারপর ঝুঁকে পড়ল সে। একটা হাত বেরিয়ে এল কব্বলের ভিতর থেকে। হাতটা এগিয়ে যাচ্ছে বনবনের তলপেটের দিকে—

আকস্মিক আতঙ্কে হঠাৎ চোঁচিয়ে উঠল বনবন।

ক্ষিপ্ৰবেগে কালো ছায়ামূর্তির দিকে জোড়া পা ছুঁড়ে মেরেই সটান দাঁড়িয়ে পড়ল বনবন। গাউটা পায়ের ধাক্কা খেয়ে একটু টলল মাত্র। কিন্তু নড়ল না নিজের জায়গা থেকে। বনবনের একটা হাত ধরে ফেলে মাথাটা নামিয়ে আনল বুকের উপর। বনবনের আতঙ্কের শব্দ আবার রানা। লোকটার দ্বিতীয় হাতটা বেরিয়ে এসেছে ইতোমধ্যে কব্বলের ভিতর থেকে। অন্ধকারেও তলোয়ারটা দৃষ্টি এড়াল না রানার। এক ঝটকায় দু'পায়ের উপর ভর দিয়ে উঠে দাঁড়াল ও। চোখের পলকে গার্ড এক হেঁচকা টানে বনবনকে নিয়ে সরে গেল খানিকটা। তলোয়ারটা বনবনের গলায় ঠেকিয়ে ধরেছে সে।

'আম্মার ইচ্ছায় এফেভ তাহলে জেগে উঠেছে?' আবার গোলমেলে

হাসির শব্দ করল লোকটা।

‘ছেড়ে দে ওকে।’ রানা গর্জে উঠল।

‘যদি না ছাড়ি?’

‘তোর মালিক কাঁচা খাবে, আমি যদি নাও খাই।’

লোকটা একদলা থুথু ছুঁড়ে ফেলল রানার দিকে, ‘তাই নাকি এফেভি? ভয় দেখাচ্ছ আমাকে?’

‘হ্যাঁ। তোর পয়গম্বর নিজের কাছে ওকে আটকে রেখেছে। ওর গায়ে আঁচড় লাগলে—’

রানার কথা শেষ হবার আগেই বনবনকে টেনে দরজার কাছে নিয়ে গেল গার্ডটা। তারপর রানার দিকে সজোরে ঠেলে দিয়ে লাফিয়ে পড়ল সে বাইরে। বুক থেকে বনবনকে সরাবার আগেই দরজা বন্ধ হয়ে যেতে দেখল রানা। বাইরে থেকে গালাগালি আসছে ঝড়ের বেগে। সময় এলে রানাকে দেখে নেবে বলে শাসাচ্ছে লোকটা।

শক্ত করে ধরে রাখল বনবনকে বুকের সাথে রানা। ঠাণ্ডা ঘামে ভিজে উঠেছে বনবনের সারা গা। রানাকে বেঁটন করে এমন ভাবে ধরে রেখেছে যেন জীবন ভর ছাড়ার ইচ্ছা নেই ওকে, ‘কি হবে, রানা? ও তো তোমাকে ছাড়বে না। খুন করার ছুতো খুজবে এরপর থেকে...’

বনবনকে বসিয়ে দিয়ে পাশেই বসে পড়ল রানা। বনবন রানার একটা হাঁটু দু’হাতে আঁকড়ে ধরে মাথা নামিয়ে কেঁদে ফেলল হঠাৎ। মাথা নিচু করে বনবনের গালে গাল ঠেকিয়ে ফিস্‌ফিস্ করে বলল রানা, ‘কেঁদে ভাসালেও কোন লাভ নেই, বনবন। আমার ওপর ডরসা রাখো। এই লোকটাই একমাত্র গার্ড?’

‘হ্যাঁ।’

‘অন্য লোকগুলো কোথায়—তারা কারা?’

‘আমি ইংরেজীতে কথা বলতে শুনেছি পরশুদিন, সম্ভবত। কখন তা মনে নেই। লোকটা কাকে যেন বলছিল ট্রান্সপোর্টে কি সব গোলমাল হয়ে গেছে। দেরি হবে। কত দেরি হবে তা বলতে গুনিনি।’ বনবন চোখের পানি মুছল রানার শাটে, ‘ও তো তোমাকে খুন করবে যেমন করে পারে, রানা। আমি জানি। ও শুধু আমাকে চায়...’

‘সব ঠিক হয়ে যাবে।’ মৃদু গলায় বলল রানা।

কিন্তু এখন তা আর মনে করে না রানা।

দুই বাহু দিয়ে রানার কোমর জড়িয়ে ধরে উরুর উপর মাথা রেখে ঘুমিয়ে পড়েছে বনবন।

মিউনিকের শিক্ষিতা গর্বিত যুবতীটির সাথে কোন সম্পর্ক নেই যেন এই বনবনের। এই বিপদে জড়িয়ে পড়ার ব্যাপারে ওর কোন দোষ নেই। দায়ী খানিকটা রানা নিজেই।

সঙ্গে কোন পুরুষ থাকলে দুশ্চিন্তা থাকে না। একসাথে কাজ করা যায়।

সঙ্গী যদি বিপদে পড়ে অ্যাসাইনমেন্টের স্বার্থে তাকে বিপদে ফেলেই এগিয়ে যাওয়া চলে। কিন্তু বনবনকে একথা বলা যায় না ব্যাখ্যা করে।

ঘরটা অসম্ভব ঠাণ্ডা। বনবন দুঃস্বপ্নের ভিতর কখনও আঁতকে উঠছে কখনও শিউরে উঠছে।

ডনফিলকে অন্য কোন রুট দিয়ে মিউনিক থেকে সরিয়ে ফেলা হয়েছে বলে অনুমান করল রানা। কোথায় যে এখন রয়েছে ওরা তাকে তা আন্দাজ করে লাভ নেই। চারদিকের মরুভূমিটার বিস্তার শত শত মাইল হওয়াও বিচিত্র নয়। রানা যদি পালাবারও চেষ্টা করে তাতেও ফলোদয়ের কোন আশা আছে কিনা বোঝা মুশকিল। উত্তপ্ত ধূ ধূ মরুভূমির উপর লক্ষ্যহীন হাঁটতে হাঁটতে ক্ষুধ-পিপাসায় ঢলে পড়ে মারা যাওয়ার কষ্টের চেয়ে এখানে আটকা পড়ে মরে যাওয়ার কষ্ট অপেক্ষাকৃত কম বলে মনে করল রানা।

সকালবেলা আর্ত চিৎকার করে ধড়মড় করে উঠে বসল বনবন রানাকে ছেড়ে দিয়ে। পিছনে সরে গেল খানিকটা সাথে সাথে। তারপর নিজের ভুল বুঝতে পেরে বলে উঠল, ‘কিছু মনে কোরো না—আমি যেন...’

‘সব ঠিক আছে, বনবন। ভয় পেয়ো না।’

সকালের আবহা আলো দরজার ফাঁক দিয়ে ঢুকছে ঘরে। বনবন মাথার চুল জড়ো করে ঝোঁপা মত করার ব্যর্থ চেষ্টা করছে। রানার দিকে তাকাল ও, ‘তুমি জানো, রানা? ওরা আমাদের কেন এনেছে এখানে বলতে পারো?’

‘তোমার বাবাকে সহযোগিতা করতে বাধ্য করতে। তোমার বিপদের ভয় দেখিয়ে।’

চিন্তা করার চেষ্টা করল বনবন, ‘তাহলে আমরা এখানে কেন? বাবার সাথে থাকবার কথা সেক্ষেত্রে আমাদের?’

‘জানি না। তুমি ওদের একজনকে বলতে শুনেছ ট্রান্সপোর্টে গোলমাল হয়েছে কিছু।’

‘হ্যাঁ, কিন্তু...’

‘তাহলে শুধু ধৈর্য ধরে থাকতে হবে আমাদের।’

করে দেখানোর চেয়ে উপদেশ দেয়া অনেক সহজ বলে মনে হলো রানার। সকাল হবার একঘণ্টা পর দরজা খুলে ভিতরে ঢুকল গার্ড সতর্ক পায়ে। হাতে দুটো অ্যালুমিনিয়ামের বাটি, খেজুর আর পানি। রানা খোলা দরজা দিয়ে বাইরেটা দেখার চেষ্টা করল। কিন্তু ঘরে অন্ধকারের পর সূর্যের আলো চোখ ঝলসে দিচ্ছে। খেজুর গাছগুলো চোখে পড়ল। ডুমুর গাছও কয়েকটা আশপাশে। মাটির দেয়ালের এদিকে গাছগুলো। ওদিকে ক্রমশ উঁচু হয়ে দিগন্তে মিলিয়ে গেছে বালি। অদূরে মাটির ঘরের দেয়াল পাশাপাশি বেশ ক’টা। ছোট এলাকাটা কাঁটাতার দিয়ে ঘেরা।

‘তোমার নাম কি, এই?’ রানা জানতে চাইল গার্ডের দিকে ফিরে।

‘আল্লার নামে নাম আমার। ষ্বেদমতগার আল্লার।’

‘শেষ পয়গম্বর কে তোদের?’ দ্বিতীয় পয়গম্বর সম্পর্কে পরিষ্কার হতে চায় রানা।

‘সবাই জানে।’ আরব গার্ড দাঁত বের করল, ‘হযরত মহম্মদের পর আর একজন পয়গম্বর দুনিয়ায় তশরিফ এনেছেন।’

‘কোথায় তোদের সেই আর একজন পয়গম্বর?’

‘খাক হয়ে যাবে, এফেভি তার সামনে দাঁড়ালে। তাঁকে দেখলে চোখ অন্ধ হয়ে যাবে তোমার। কুকুর বিড়ালের মত বেঁচে থাকবে তুমি।’ গার্ডটা হঠাৎ বিদ্যুৎবেগে মোচড় খেয়ে তলোয়ারটা কোমরের খাপ থেকে টেনে নিয়ে রানার পেটের দিকে এগিয়ে হুমকি দেয় আক্রমণ করার। অভ্যাসবশত পিছিয়ে আসে রানা। দাঁত বের করে আবার গোলমেলে হাসি হাসে লোকটা, ‘সবাই পেছাব্ব করে ফেলে ভয়ে।’ বনবনের দিকে ফিরল সে, ‘গত রাতে চুটিয়ে মজা লুটেছ তাই না, ছুঁড়ি?’ রানার দিকে ফিরল সে আবার, ‘সময় হয়ে আসছে তোমার, এফেভি।’

রানা বলে উঠল, ‘তার মানে তোরা সাখীরা চলে গেছে?’

লোকটা ঝিক ঝিক করে হাসল, ‘না না, এফেভি। হাজার হাজার সাখী আমার,—লোকটা হঠাৎ বন্ধ উম্মাদের মত তলোয়ারটা মাথার উপর উঁচিয়ে অদ্ভুত ভাবে পা ঠুকতে লাগল মেঝেতে। প্রথমে রানা বুঝতেই পারল না লোকটা নাচছে। তারপর আশ্চর্য সব শব্দ বেরুতে লাগল লোকটার গলা থেকে। গান গাইছে বলে ধরে নিল রানা। পা ঠুকতে ঠুকতে হঠাৎ বনবনের উপর ঝাঁপিয়ে পড়ল সে। উদ্ভট গান তখনও থামেনি। আরও জোরে, আরও উৎসাহে বিলম্বিত উচ্চারণে গাইতে গাইতে তলোয়ার গলায় ঠেকিয়ে বনবনকে উঠে দাঁড়াতে বাধ্য করল সে।

ব্যাপারটা ঘটল চোখের পলকে। লোকটা বনবনকে দাঁড় করিয়েই কুৎসিত একটা ভঙ্গি করল দেহ ঝাঁকিয়ে। তারপরই বনবনকে ঠেলে দিয়ে এক লাফে দরজার বাইরে গিয়ে পড়ল রানাকে উঠে দাঁড়াতে দেখে।

‘লেগেছে কোথাও?’ দরজাটা বন্ধ হয়ে যেতে জিজ্ঞেস করল রানা।

‘না-না! লোকটা...লোকটা...’

‘হ্যাশিস টেনে নেশা করেছে কুকুরটা।’

বনবন মরিয়া হয়ে উঠেছে, ‘আমরা কি পালাবার চেষ্টা করতে পারি না? রানা, এভাবে এখানে আমি মরে যাব। এবার ইচ্ছা করলে চেষ্টা করতে...’

‘তোমার বাবার কথা ভুলে গেলে বনবন? ওরা আমাদেরকে তার কাছেই নিয়ে যাবে।’

‘ওহ! এত বড় রিস্ক নেয়াটা...’

‘আমি স্বেচ্ছায় এসেছি, বনবন। এসো খেয়ে নিই।’

মাথা নাড়ল বনবন, ‘আমি খেতে পারব না। আমি মরে যাব। এখানে কি দিনের পর দিন এভাবে থাকা যায়? কোন ডিসেপ্সি নেই, কোন প্রাইভেসি নেই—খাচায় ভরা দুটো জানোয়ারের মত...’

‘জানোয়ারগুলো বাইরে, বনবন। খাও।’

উত্তাপ উত্তরোত্তর বাড়তে লাগল সূর্য মাথার উপর ওঠার সাথে সাথে।

ঘটাখানেকের মধ্যে স্বাভাবিকভাবে নিঃশ্বাস ফেলতে অসুবিধে হতে লাগল ওদের। রানা বনবনকে চিৎ করে শুইয়ে দিয়ে বেশি নড়াচড়া করতে নিষেধ করল। বেঁচে থাকতে হবে। এটাই এখন একমাত্র সংগ্রাম বুঝতে পেরেছে রানা।

ওর মনে হলো ড্যানারদের অর্গানাইজেশনে কোথাও বিপত্তি ঘটেছে। বলা যায় না কিছুই, ওরা হয়তো ইচ্ছা করেই ভুলে বসেছে মরুভূমির এই বন্দীখানার কথা। আশঙ্কাটা একসময়ে জাগল বনবনের মাথায়। উঠে দাঁড়িয়ে দরজার সামনে ক্ষুদ্র ফুটোটা দিয়ে বাইরে তাকাবার চেষ্টা করল ও। কিছু দেখতে না পেয়ে ফুটোটা কান লাগিয়ে শব্দ শোনার চেষ্টা করল। অনেকক্ষণ কান পেতে থাকার পর রানার দিকে মুখ করে প্রায় অন্ধকারে বলল, 'কেউ নেই বাইরে। কোনও শব্দ নেই। ফেলে পালিয়েছে ওরা আমাদেরকে, রানা।'

বনবনকে না নিয়ে গার্ডরা যাবে না বলে ধারণা হলো রানার। কিন্তু বনবনের দৃষ্টিভঙ্গি বাড়বে বলে কথাটা বলল না ও। দরজার কাছে বনবনের সাথে যোগ দিল ও। না, বাইরে কোন শব্দ হচ্ছে না। রানা বলল, 'লোকটা হয়তো ঘুমুচ্ছে।'

'তাহলে বেকুবের চেষ্টা করতে পারি না আমরা?' আশায় চোখ বড় বড় হয়ে উঠল বনবনের।

'জানি না পারি কিনা। চেষ্টা করাটা বড় রিস্ক হবে, বনবন। যদি ব্যর্থ হই তাহলে আমাদের খুন করার অজুহাত পেয়ে যাবে ও। আর সফল হলে তোমার বাবাকে আর কোন দিন পাব না।'

'কিন্তু এখানে এভাবে আটকা পড়ে থাকলেও বাবার দেখা পাব না আমরা।'

বনবন ঠিক বলছে বলে মেনে নেবার চেষ্টা করল রানা। চিন্তা করল ও। পালাবার উপায় একটা করা দরকার এবার। সিদ্ধান্ত নিল রানা।

দেয়ালগুলো পরীক্ষা করতে লেগে গেল আবার রানা। এক ইঞ্চি এক ইঞ্চি করে হাতড়াল ও। কোনও লোহার গজাল গাঁথা থাকলে মাটির দেয়াল ছিন্ন করার একটা চেষ্টা করা যায়। আধ ঘণ্টা অক্লান্ত চেষ্টা করেও সেরকম কিছু হাতে ঠেকল না রানার। আরও আধ ঘণ্টা পরিশ্রম করল বেলেটের বাকল দিয়ে দেয়ালের গায়ে ঘা মেরে মেরে। কিন্তু দেয়ালের এক ইঞ্চি জায়গাও পাতলা বলে মনে হলো না স্থল শব্দ শুনে।

বাইরে নিঃশ্বাস আটকে গিয়ে মরে পড়ে আছে পৃথিবী।

রাতে খুব দুর্বল মনে হলো নিজেকে রানার। খেজুর যা দিয়েছিল তাতে পাঁচ বছরের একটা বাচ্চারও পেট ভরবার কথা নয়। দু'জনে মিলে খেয়েছে তাই। পানিও হটকখানেক আছে আর। আরও দুটো দিন এভাবে কাটলে বেঁচে থাকার মত শক্তি অবশিষ্ট থাকবে কিনা সন্দেহ হলো রানার।

গভীর রাতে অসহ্য ঠাণ্ডায় ঘুম ভেঙে গেল বনবনের, 'রানা?'

‘ঘুমোবার চেষ্টা করো, বনবন। না ঘুমুলে আরও দুর্বল হয়ে পড়বে তুমি।’  
রানা ওর মাথায় হাত রাখল একটা।

‘আমরা মরব, রানা। তুমি এমন শান্ত হয়ে থাকছ কিভাবে? তোমার কি এতই সাহস মনে?’

‘তোমার মতই ভয় হচ্ছে আমার, বনবন।’

‘না, তোমার সাহস খুব বেশি। আচ্ছা, তুমি না থাকলে আমার কি হত বলা দেখি? ওহ, চেষ্টা করে চেষ্টা করে পাগল হয়ে মরে যেতাম তাহলে আমি।’  
রানার উত্তরে তুলে দিল বনবন মাথাটা, ‘তোমার মত লোক আগে কখনও দেখিনি আমি, জানো?’ ফিসফিস করে কথা বলে চলেছে ও, ‘রানা, তোমায় কেন যেন খুব নিষ্ঠুর মনে হয়। কিন্তু তুমি কেমন করে এত শান্ত হতে পারো জানি না। তোমার মনটা বড় ভাল, রানা! তুমি আমার ভুল ভেঙে দিয়েছ—আমি ভেবেই দেখিনি তোমার কথা শোনার আগে যে বাবা দোষী নাও হতে পারে... রানা! আমি বুঝতে পারছি কেন এই বিপদে পড়েছি আমি। আমার অপরাধের শাস্তি পাচ্ছি আমি...’

‘তুমি ছেলেমানুষের মত নিজেকে কষ্ট দিচ্ছ, বনবন।’

‘তাই ভাব বুঝি তুমি আমাকে? জী না, আমি এখন বড় হয়েছি...’

রানা ওকে খুশি করার জন্যে ঠাট্টা করে বলল, ‘সত্যি?’

‘প্রমাণ চাও?’ কথাটা বলেই রানার উত্তরে মুখ চেপে ধরে লজ্জায় খানিকক্ষণ চুপ করে থাকল বনবন। তারপর বলল, ‘আমি জানি মৃত্যু আসছে আমাদের। ওরা কোন সমস্যায় পড়ে আমাদের কথা ভুলে গেছে। ওদের তো কোন দৃষ্টান্ত হবার কথা নয় আমাদের কি হবে সে-কথা ভেবে। তুমি আর গরমে এখানে ধুঁকে ধুঁকে মরব আমরা। কি যে হবে...’ বনবন হঠাৎ একটু পর বলল, ‘খুব বেশি সময় নেই আমাদের, রানা।’ মুখ তুলে ধরল বনবন রানার দিকে।

চুমো খেল দু’হাত দিয়ে বনবনের ভরাট মুখটা ধরে রানা।

রানা হঠাৎ খুশি হয়ে উঠল, বাইরে যেন গলার আওয়াজ পাওয়া যাচ্ছে। একটু পরেই বোঝা গেল, ওটা মনের ভুল।

সকালে কেউ এল না ঘরে। ওদের আর পানিও নেই খাবার। নিশ্চিন্তা চিরকালের জন্যে উড়ে এসে জুড়ে বসেছে যেন।

বনবন যেন ঠিকই বলেছিল। ওদেরকে ফেলে গেছে সবাই।

দুপুরের দিকে টোকা মুশকিল হয়ে উঠল আবার অসম্ভব গরমে। বেঁচে থাকার কোন উপায় দেখতে না পেয়ে ক্রমশ নিরাশা দানা বাঁধছে রানার মনে। বিকেলের দিকে মরিয়া হয়ে উঠে দাঁড়াল ও বেলেটটা হাতে নিয়ে।

ঘণ্টা দেড়েক বেলেটের বাকল দিয়ে অক্লান্ত ভাবে খুঁচিয়ে ইঞ্চি ছয়েক গর্ত করল রানা দেয়ালে। কিন্তু দাঁড়িয়ে থাকার ক্ষমতা শেষ হয়ে গেছে রানার। বনবন চেষ্টা করল এবার ঘণ্টাখানেকের বেশি পারল না ও। দু’তিন ইঞ্চি

যোগ হলো আরও। কিন্তু পরীক্ষা করে রানা বুঝল অর্ধেকের অর্ধেকও ঝুঁড়তে পারেনি ওরা।

সময় কাটতে লাগল ওদেরকে স্পর্শ না করে। ঘুম এল না। আচ্ছন্নতার মধ্যে জেগে জেগে উঠল দু'জনেই বারবার।

তিন দিনের দিন সকালবেলাও বাইরে কোন শব্দ নেই। শরীর দুর্বল হয়ে পড়েছে। বমি বমি লাগছে বনবনের। প্রচণ্ড খিদে জন্মেছে অমন। গলা শুকিয়ে মরুভূমি হয়ে উঠেছে রানার। লালাও নেই মুখের ভিতর। কেমন যেন অস্বস্তি আর ভয় লাগল রানার বনবনের দিকে তাকাতে। আস্তে আস্তে উঠে দাঁড়াল ও দেয়াল ধরে। বেলেটের বাকল দিয়ে কাজ শুরু করে দিল ও। মনটাকে বিশ্রাম না দিলে পাগল হয়ে যাবে ও। কাজ করা দরকার।

বনবন একবার সাহায্য করতে চাইল ওকে। কিন্তু রাহি হলো না বানা। আগামী সকাল পর্যন্ত এমনিতেই ও বাঁচবে কিনা সন্দেহ হলো রানার।

দুপুরের পর ঘামে ভেজা দেহটা মেঝেতে এলিয়ে দিয়ে হাঁপাতে হাঁপাতে হঠাৎ গন্ধ পেল রানা মশলার। মাথা ঘুরিয়ে তাকাল বনবনের দিকে। চোখ বুজে মড়ার মত পড়ে আছে। উঠে বসল রানা। কান পাতল মনোযোগ একত্রিত করে। সাথে সাথে কোন শব্দ কানে ঢুকল না। কাছে কোথাও কেউ রান্না করছে। গন্ধটা চিনতে ভুল হয়নি রানার।

খানিক পরই মানুষের গলা শুনতে পাওয়া গেল। ড্রামের উপর তাল ঝুঁকছে আর আজব সুরে গান ধরছে লোকটা। লোকটা হঠাৎ বিলম্বিত সুরে গান গেয়ে ওঠে, তারপর থামে। অনেকক্ষণ আর কোন শব্দ নেই। অনেকক্ষণ পর আবার সেই সুর শোনা যায়। বাইরে কেউ যেন নাচছে আর গাইছে মনের উল্লাসে। নিঃসন্দেহ হলো রানা খানিক পরই। ফিরে এসেছে তাহলে গার্ডটা।

কিংবা লোকটা হয়তো আদৌ কোথাও যায়নি এখান থেকে।

হয়তো রানাকে নিষ্ঠুরভাবে জব্দ করার মতলবে সাড়াশব্দ না দিয়ে দুটো দিন কাটিয়েছে লোকটা।

‘বনবন?’ ফিসফিস করে ডাকল রানা।

চোখ মেলে বনবন, ‘রানা?’

‘শুনতে পাচ্ছ না? গার্ডটা বাইরে রয়েছে এখনও।’

উঠে বসল বনবন। উদ্‌গীর হয়ে কান পাতল ও। তারপর বলল, ‘আমি ভাবছিলাম স্বপ্ন দেখছি হয়তো।’

‘কোথাও যায়নি ও।’ শুকনো জিভ দিয়ে ঠোঁট ভেজাবার ব্যর্থ চেষ্টা করল রানা, ‘বুঝতে পারছ, কেন? আমাকে দুর্বল করার জন্যে। মনের আনন্দে নাচছে গাইছে ও। এরপর আসবে ও তোমার জন্যে। আমাদের এখন একটা মাত্র উপায় আছে।’

‘আমাদের বাঁচার কোনও উপায় নেই, রানা?’ কাঁদ কাঁদ গলায় বলল বনবন।

‘আছে। ভেঙে পোড়ো না, বনবন। উপায় আছে। ওকে মেরে ফেললে

উপায় হয়।’

‘পারবে তুমি?’

‘পারতেই হবে আমাকে।’

‘কিন্তু তুমি যদি ব্যর্থ হও...’ বনবন চুপ করে গেল রানার দিকে তাকিয়ে। বুঝতে পারল ও রানার চোখের দৃষ্টি। উঠে দাঁড়াল ও রানার পাশে। রানা ধরে ফেলল ওকে। রানার গায়ে হেলান দিয়ে দাঁড়িয়ে থেকে বনবন বলল, ‘কি করাতে চাও আমাকে দিয়ে তুমি?’

‘উৎসাহ দেবে তুমি ওকে, বনবন। তোমাকে নিয়ে যেন সম্পূর্ণ ব্যস্ত হয়ে ওঠে ও।’

‘কতক্ষণ...কতদূর?’

‘যতক্ষণ...দরকার।’

রানার চোখ থেকে চোখ ফিরিয়ে নিয়ে মাথা নিচু করে চুপ করে রইল বনবন। অধীর আঘাতে অপেক্ষা করছে রানা। তারপর বলল বনবন, ‘অল রাইট, রানা। আমি পারব।’

‘ডাকো ওকে।’ রানা বলল, ‘তা না হলে ক’ঘন্টা ধরে নাচবে কে জানে। বেশি সময় নেই আমাদের। এখনি ডাকো ওকে।’ অস্ত্রের কথা ভাবতে শুরু করল রানা। হাসি পেল এতকিছুর মধ্যেও। জুতো আর বেল্ট ওর অস্ত্র। বেল্টটাই বেছে নেবে ঠিক করল রানা। বাকলটার ওজন কম নয়।

দরজার সামনে গিয়ে দাঁড়িয়েছে বনবন। রানার ইঙ্গিত পেয়ে জোরে চেষ্টা করে উঠল ও। গলার স্বরে আহবানের সুর পরিষ্কার হয়ে ফুটেছে। খানিক পর ইঙ্গিত পেয়ে থামল বনবন। কান পাতল রানা। ড্রামের শব্দ ওর বিলম্বিত গানের সুর অবিরাম শোনা যাচ্ছে। লোকটার গানে দ্বিতীয় পর্য়া... র নগ্নগান আছে বুঝতে পারল রানা।

বনবন আবার চেষ্টা করে উঠে ডাকল লোকটাকে। দরজার গায়ে হেলান দিয়ে কোন রকমে দাঁড়িয়ে থাকতে পারছে ও। গান বাজনা থামবার কোনও লক্ষণ নেই।

‘আর একবার।’ রানা নিচু গলায় বলল।

বনবন আবার ডাকল, ‘শুনছ না তুমি? প্লীজ খেতে দাও আমাকে, একটু পানি দাও এখানে এসে, তা না হলে মরে যাচ্ছি আমি...তুমি যা চাও সব পাবে...’

এবার ড্রামের শব্দ শোনা গেল না। খানিক পরই একটা জানোয়ারের ফোঁস ফোঁস নিঃশ্বাসের শব্দ শুনতে পাওয়া গেল দরজার ঠিক বাইরেই। গাউটা হাঁপাচ্ছে। অকস্মাৎ আত্ননাদ করার মত করে চেষ্টা করে উঠল লোকটা বিজয় উল্লাসে ফেটে পড়ে।

বেল্টটা হাতে জড়িয়ে নিয়ে দরজার পাশেই শুয়ে পড়ল রানা উপুড় হয়ে, একটা হাত আর দুটো পা যতদূর সম্ভব মেলে দিয়ে। বেল্ট জড়ানো হাতটা ঢেকে রাখল দেহ দিয়ে ও। বনবন সরে গিয়ে বসল এককোণে। ওকে খুব অল্প

বয়স্কা আর অসহায় দেখাচ্ছে। ভারী দরজাটা কঁাচ কঁাচ করে উঠতে মাথা নেড়ে ইঙ্গিত করল ওকে রানা।

কয়েক মুহূর্ত কেটে গেল। দরজা খুলল না। নিশ্চিন্ততা আবার বাসা বাধল। তারপর শোনা গেল লোকটার নিঃশ্বাস ফেলার শব্দ।

আরও খানিক পর হঠাৎ সবগে দু'ফাঁক হয়ে গেল কবাট দুটো। সূর্যের উজ্জ্বল আলোয় চোখ ধাঁধিয়ে গেল রানার। লোকটা লাফ মেরে ভেতরে ঢুকল বুঝতে পারল ও। তলোয়ারটা ঝকমক করে উঠল রানার চারপাশে। তারপর লাফ মেরে ঘরের মাঝখানে গিয়ে ঘোরাতে লাগল লোকটা তলোয়ার। উল্লাসে দিশেহারা হয়ে পড়ে আবোল তাবোল বকে চলেছে সে।

রানার দিকে তলোয়ারের কোপ মারার ইঙ্গিত করতে করতে প্রলাপ বকছে লোকটা, 'এফেভি, খুব কি খিদে পেয়েছে? রক্তপান করবে, এফেভি? নিজের রক্ত চাটিয়ে দেখাব তোমায়, এফেভি...'

অকস্মাৎ কিছু করার আর কোনও পথ নেই। বনবনের দায়িত্ব এখন সবচেয়ে বেশি। লোকটা ক্ষমতার দর্পে লাফালাফি শুরু করে দিয়েছে রানার বিপরীত কোণের কাছে, 'আমাকে হারিয়ে ফেলেছিলে, হাবিবি?' বনবনকে নিয়ে পড়েছে লোকটা, 'খিদেয় খুব কষ্ট পেয়েছ? সব মিটিয়ে দেব... পেটের জ্বালা, যৌবন জ্বালা সব।'

বনবন বুঝতে পারল না কি করা দরকার ওর। দু'বার বলে উঠল ও দুর্বল গলায়, 'প্লীজ, প্লীজ।'

'তোমার ভাষা আমি বুঝি না, হাবিবি। কিন্তু তুমি আমার পাকা আপেল। দ্বিতীয় পয়গম্বরের কসম...'

'সেলিম আল-রশিদেদে কথ্য বলছ তুমি?' অস্পষ্ট দুর্বল গলায় জিজ্ঞেস করল রানা।

'তুমি শয়তানের দলে, তাই পয়গম্বরের নাম ধরলে বন্ধু। আমি মহান দ্বিতীয় পয়গম্বরের কথ্য বলছি। দুনিয়ায় আগুন জ্বালিয়ে দেবেন তিনি, যদি দুনিয়ার লোক তাঁকে মেনে না নেয়।' গার্ড বসে পড়ল বনবনের পাশে। খাবলা মেরে ধরল সে উর্ধ্বাংশের কাপড়।

বনবন চুপ করে বসে থাকতে পারল না, 'রানা—'

'বাধা দিয়ো না ওকে।'

খোলা রেখেছে দরজাটা গার্ড। বাইরে তাকাল রানা।

ড্যান্সারটা বেঁটে তলোয়ারটা দাঁত দিয়ে ধরল। তারপর আকর্ষণ করল বনবনকে। তার গায়ের দুর্গন্ধ ভেসে বেড়াচ্ছে ঘরের বাতাসে। গুড়িয়ে উঠল অশ্রুটে যেন বনবন। রানার নির্দেশ মত চোখ বুজে মড়ার মত পড়ে আছে ও। বেশিক্ষণ অপেক্ষা করা চলবে না বুঝতে পারছে রানা।

'ভয় লাগছে না তোঁর, কুকুর? একা এ কাজ করার মত দুঃসাহস তোঁর হচ্ছে?'

'সঙ্গী সাথী সব চলে গেছে, এফেভি। আজ রাতে এই বান্দাও চম্পট

দিচ্ছে। হাবিবি কাঁদছে কেন এমন গরমেও?’

‘ভয় লাগছে ওর। খিদে পেয়েছে।’

‘তোমার ভয় লাগছে না? খবরদার, একেভি। নড়বে না একটুও। তোমার দান পরে আসবে।’

চূপ করে গেল রানা। কিন্তু আর অপেক্ষা করার মানে হয় না। তৃষ্ণায় বৃকের ছাতি ফেটে যাবার উপক্রম করছে। বনবনের দ্বারা এর বেশি আশা করাটা পাগলামি। হাত নাড়ার ক্ষমতাও নেই ওর আর। কোন রকম চালাকি খাটানোর উপায় নেই এখন। সরাসরি যুদ্ধ ঘোষণা করে মুখোমুখি দাঁড়াতে হবে বাঁচার জন্য রানাকে।

লুকোবার চেষ্টাও করল না রানা। মন শক্ত করে নিল ও। জীবনে এই বোধ হয় প্রথম নিজের দৈহিক শক্তি সম্পর্কে অস্পষ্ট ধারণা নিয়ে নড়তে যাচ্ছে ও। বেল্টটার দুই প্রান্ত ধরে উঠে দাঁড়াল আস্তে আস্তে রানা।

রানা উঠে দাঁড়াতেই বনবনকে ছেড়ে লাফ দিয়ে উঠে দাঁড়াল লোকটা। দাঁতে ধরা তলোয়ারটা বাগিয়ে ধরে সর্বিস্বয় তাকিয়ে রইল সে একমুহূর্ত রানার দিকে। ওর উঠে দাঁড়াবার ক্ষমতা এখনও আছে দেখতে পেয়ে বিস্মিত হলো সে। তারপর হঠাৎ লাফিয়ে উঠে এক কোণ থেকে ঘরের অন্য এক কোণে চলে গেল লোকটা।

‘সইতে পারলে না বুঝি, একেভি? হাবিবি তোমার বাবার একার সম্পত্তি নাকি! তাহলে হাবিবি দেখুক তোমাকে কি দাওয়াই দিই আমি।’

‘বেশি কথা বলাটা তোর বদভ্যাস। তোর মুরোদ জানা আছে আমার।’ উত্তেজিত করতে চাইল লোকটাকে রানা, ‘সামনে আয়।’

বনবন অস্ফুট শব্দ করে উঠল। রানা তাকাল না। কয়েক সেকেন্ডের মধ্যে সব মিটে যাবে। ঘরের চারদিকে ঘুরছে লোকটা তলোয়ার ঘোষাতে ঘোষাতে। বেল্টের বাকলটা বা হাতের মুঠোয় রানার। অপর প্রান্তটা ধরে রেখেছে ডান হাতে শক্ত করে।

তলোয়ার চালাতেই গরম বাতাস এসে লাগছে মুখে রানার। ঝাঁপিয়ে পড়ার লক্ষণ নেই লোকটার মধ্যে। ভঙ্গি করছে মাঝেমধ্যে। কিন্তু রানা বুঝতে পারছে খুব বেশি রিস্ক নেবে না সে। কুড়ি পঁচিশবার হঠাৎ সামনে পা বাড়িয়ে তলোয়ার চালাবার চেষ্টা করেছে ইতোমধ্যে লোকটা রানার মুখ লক্ষ্য করে। কিন্তু রানা পিছিয়ে আসতে সামনে বাড়েনি আর। এদিকে এখনও কোনও আক্রমণের চেষ্টা করেনি রানা। লোকটার তাড়া খেয়ে পিছু হটে হটে অসংখ্যবার ঘরময় ঘুরছে শুধু ও। লোকটাকে অস্থির করে তোলা দরকার। তা না হলে রিস্ক নিয়ে ঝাঁপ দেবে না সে। বিরক্ত হয়ে নাগালের মধ্যে আসতেই হবে তাকে। রানা অপেক্ষা করার সিদ্ধান্ত নিল।

সময় বয়ে যাচ্ছে! হাঁপিয়ে উঠেছে রানা। দ্রুত ফুরিয়ে যাচ্ছে দৈহিক শক্তি। লোকটা দাঁত কিড়মিড় করে লাফ মারছে একই জায়গায়। তারপর আবার পা বাড়চ্ছে। রানা মাঝেমধ্যেই উত্তেজিত করার চেষ্টা করছে তাকে,

‘কাছে আয় ব্যাটা!’

এল লোকটা কাছে ঝাঁপিয়ে।

পিছিয়ে না গিয়ে দাঁড়িয়ে পড়ল রানা। সুযোগ চিনতে একটুও দেরি হয়নি ওর। দেহের সবটুকু শক্তি দিয়ে সবেগে মোচড় খেল ওর গোটা দেহ। বাম দিকে সরে গেল ডান হাত আর বাঁ হাত। চোখের পলকে ঘটে গেল ব্যাপারটা। বেল্টের বাকল ছেড়ে দিল রানা বাঁ হাতের মুঠো থেকে। ডান হাতে বেল্টের অপর প্রান্ত মাথার উপর তুলে সজোরে চাবুকের মত মারল রানা।

অব্যর্থ লক্ষ্য। কিন্তু সাথে সাথে বুঝতে পারল না রানা বাকলটা লোকটার চোখে লেগেছে কিনা। পর মুহূর্তে নাল টকটকে হয়ে উঠল লোকটার বাঁ চোখ। মশা মারার মত একটা হাতের থাবা নিজের রক্তাক্ত চোখে মারল সে। গুড়িয়ে উঠল অব্যক্ত যন্ত্রণায়। বেল্টটার বাকল ধরে ফেলে বিদ্যুৎ বেগে সামনে বাড়ল রানা। লোকটার গলায় বেল্ট পেঁচিয়ে দিয়ে ঠেলে দেয়ালের গায়ে নিয়ে গেল। গায়ে গরম রক্ত লাগতে শিউরে উঠল ওর দেহ। গলায় চেপে বসেছে বেল্টটা। চোখ ছেড়ে লোমশ দুটো হাত রানার গলায় এসে ঠেকল। খামচে ধরল।

দেহের সর্বশক্তি দিয়ে বেল্টের দুই প্রান্ত ধরে দুদিকে টানছে রানা। কিন্তু শেষ পর্যন্ত বোধ হয় হার হলো ওর। শ্বাস নিতে কষ্ট হচ্ছে। আত্মরক্ষার কোনও চেষ্টা করার উপায় নেই। লোকটার লোমশ দুটো হাত লোহার আঙটার মত এঁটে বসেছে গলা জুড়ে।

‘বন...’

বনবনের পুরো নামটাও উচ্চারণ করতে পারল না রানা। কিন্তু বনবন এগিয়ে এসেছে লোকটার পাশে। বেল্টের পঁচাচ টিলে হয়ে যাবে আশঙ্কা করে ছাড়ছে না রানা প্রান্ত দুটো। হঠাৎ টিলে হলো একটু লোকটার হাত দুটো। রক্তাক্ত হয়ে গেছে গোটা মুখ তার। রানার বুকও ভেসে যাচ্ছে তাজা রক্তে। পাশ থেকে লোকটার মাথার চুল টেনে ধরেছিল বনবন। কিন্তু মেঝেতে পড়া তলোয়ারটা দেখতে পেয়ে ছেড়ে দিয়েছে সে চুল।

রানা বেল্ট না ছেড়েই দেয়ালের গায়ে ঠেসে ধরে রইল গার্ডটাকে। ওর গলা থেকে শ্বাস পড়েছে হাত দুটো। নিঃসাড় ভাবে ঝুলছে দু’পাশে। লড়ার আর শক্তি নেই সম্ভবত তার। কিন্তু ভরসা করতে পারল না রানা তবু। আরও জোর দিয়ে বেল্ট টেনে ধরল ও। ঘড় ঘড় করে শব্দ করছিল খানিক আগে লোকটা, এখন তাও করছে না। বনবনকে পাশে দেখে ফিরে তাকাল। চালিয়ে দিয়েছে ততক্ষণে বনবন তলোয়ারটা লোকটার পেট বরাবর।

বনবন তলোয়ারটা বের করল একটানে। তারপর আবার সজোরে ঢুকিয়ে দিল বুক বরাবর। বের করল আবার। তারপর ফের ঢোকাল।

‘থামো, বনবন...’

বনবন আবার তলোয়ার ঢোকাল।

‘মরে গেছে, বনবন...’ রানা চৈঁচিয়ে উঠল।

কিন্তু উল্গাদিনীর মত একই কাণ্ড বারবার করে চলেছে বনবন। লোকটাকে মেঝের দিকে ঠেলে দিয়ে দু’হাত দিয়ে জড়িয়ে ধরে ফেলল রানা। চৈঁচিয়ে উঠল বনবন।

‘ছেড়ে দাও আমাকে, রানা। ওর শখ চিরদিনের জন্যে মিটিয়ে দিই আমি...’

তলোয়ারটা কেড়ে নিয়ে ফেলে দিল দূরে রানা। বনবনকে নিয়ে ধপ্প করে বসে পড়ল। দাঁড়বার চেষ্টা করল একবার। পারল না। বনবন দু’হাঁটুতে মুখ শুঁজে হাউ হাউ করে কেঁদে উঠল। খোলা দরজার দিকে তাকিয়ে মুখ হা করে হাঁপাতে লাগল রানা।

ওরা মুক্ত।

## সাত

বনবন অসুস্থ বৃত্তিতে পারল রানা। দেয়াল ধরে ধরে, কখনও বসে বসে, একটু একটু করে এগিয়ে গিয়ে পৌঁছেছে নিচু ডুমুর গাছটার নিচে। মাটির দেয়ালের ছায়া পড়েছে সেখানটায়। হাঁটুর উপর ভর দিয়ে দু’হাত তুলে লাফিয়ে লাফিয়ে ডাল ধরার চেষ্টা করছে ও। প্রচণ্ড খিদেয় মানুষ পাগল হয়ে যায় একথা আজ বিশ্বাস হলো রানার।

উঠে দাঁড়িয়ে পাথর ঘেরা কুয়াটার সামনে এসে দাঁড়াল রানা। রশিটা ডুবে গেছে নিচে। টেনে টেনে তুলল বালতিটা। আজলা ভরে পানি খেয়ে নিঃশ্বাস ফেলল ও। মরা মানুষের উপর নাকি রাগ করতে নেই। কিন্তু গার্ডটা ওদেরকে ইচ্ছে করেই দুর্গন্ধময় পুকুরের পানি খাইয়েছে জেনে গরম হয়ে উঠল মেজাজটা ওর। কুয়ার পানি ঠাণ্ডা আর মিষ্টি।

বালতিটা বনবনের সামনে নামিয়ে রেখে রানা বলল, ‘আগে পানি খাও। কম করে খেয়ো।’ দুই হাত একত্রিত করে করুণ চোখে তাকাল বনবন। বালতিটা ধরে তোলার শক্তিও নেই ওর। রানা পানি ঢেলে দিতে সশব্দে গিলে ফেলতে লাগল বনবন হাতের পানি।

বেশি পানি দিল না ওকে রানা। খালি পেটে সইবে না ওর।

জ্যাকেটে মুখ মুছে তাকাল বনবন, ‘আমি কি করেছে ওর, রানা?’

‘কিছু না। আমরা মুক্ত। ওসব কথা মাথা থেকে বের করে ফেলো।’

‘কিন্তু আমি তলোয়ার চালিয়েছে, রানা! বারবার...’

‘খামো বনবন! তোমার আগে আমিই গলায় বেল্ট পেঁচিয়ে শেষ করে ফেলেছিলাম ওকে। ওসব কথা বেশি ভাবতে শুরু করলে মাথাটা খারাপ করে ছাড়বে নিজের। সব ভুলে যাও।’ বনবনের হাতটা ধরে টানল রানা, ‘ওঠো। এবার খাবার খুঁজতে হবে।’

নিচু বাউন্ডারি ওয়ালের ভিতর ছয় সাতটা ঘর। কয়েকটা ছাদ ধসা। ঘরগুলোর পিছনে ডুমুর গাছের বাগান। পরিত্যক্ত বলেই মনে হলো রানার মরুদ্যানটাকে। গার্ডটীর ঘর খুঁজে পেতে দেরি হলো না ওদের। ঘরটার চারপাশে ক্যাকটাস আর নাম না জানা কাঁটা গাছ জন্মেছে। ভিতরে বিছানা পাতা মাটির উপর। একটা লোহার ট্রাঙ্ক। তালা খুলছে গায়ে। কাঠের একটা থাক দেয়ালে। কয়েকটা টিন সাজানো সারি সারি। সেগুলো খুলে শুকনো খাবার পাওয়া গেল বেশ কিছু। একটা হাতুড়ি দেখতে পেয়ে হাতে তুলে নিল রানা। বনবনকে বসিয়ে রেখে ট্রাঙ্কের তালাটা ভাঙল ও।

এরকম একটা জিনিস পাওয়া যাবে তা আশা করেনি রানা। ট্রাঙ্কের ভিতর একটা রাশান-মেড অটোমেটিক রাইফেল আর এক ডজন ক্লিপ ছাড়া আর কিছুই নেই।

গার্ডের ঘর থেকে বেরিয়ে সামনের দিকটা ঘুরে দেখল রানা। কোন যানবাহন থাকলে সামনের দিকেই থাকবে। কিন্তু আশা করেনি রানা কিছু পাবে বলে। পেলও না। একটা উট পর্যন্ত চোখে পড়ল না। সামনে ধূ ধূ মরুভূমির কোথাও কোনও জনপ্রাণীর চিহ্নমাত্র নেই। চিকচিক করছে উত্তপ্ত বালি দিগন্তরেখা পর্যন্ত। বাগানের পিছনে একটা ছোট্ট পুকুর দেখা গেল। রানা বলল, 'তুমি আগে যাও।'

'কাপড়?'

'সব পরেই স্নান করো। এগুলোও ধোয়া দরকার।'

বনবন পুকুরে নেনমে যেতে ফিরে এল রানা ওদের বন্দীখানা ঘরটায়।

দাঁত বের করে পড়ে আছে ড্যান্সারটা রক্তের উপর। বৈশিষ্ট্য সেদিকে তাকিয়ে না থেকে লোকটার গায়ের শার্ট খুলে নিয়ে সরে এল রানা। পকেট হাতড়ে ছোট একটা চেন পাওয়া গেল। চেনটা সোনার। মাঝখানে ভারী একটা মেডেল। সেটাও সোনার। নখ দিয়ে কিনারায় চাপ দিতেই খুলে গেল সেটা।

মেডেলটা খুলে যেতে চোখ পড়ল রানার ভিতরে। ওর স্মৃতি এক লাফে গিয়ে পৌঁছল দূর মিউনিকে। বাইজেনটাইন মোজাইকের পোস্টকার্ডের যে নকশাটা দেখেছিল ও সেই একই নকশা মেডেলের ভিতরের এক পিঠে খোদাই করা।

'রানা?'

শান্ত গলা বনবনের। কাক-স্নান করে পুকুর থেকে উঠে এসেছে ও।

পকেটে মেডেলটা ভরে বেরিয়ে এল বাইরে রানা, 'আমি স্নান করে নিই।'

'এর নাম অ্যাডভেঞ্চার। এরই নাম জীবন।' ফিস ফিস করে বলল রানা সীমাহীন শূন্যের নক্ষত্রগুলোর দিকে চোখ রেখে। কোথাও ধাক্কা খেল না ওর গলার শব্দ। বনবনের কাঁধে হাত ওর। সামনে দিগন্ত বিস্তৃত পৃথিবী। ওদের পৃথিবীতে তৃতীয় কোন মানব নেই ভাবতে ভাল লাগল রানার। চাঁদটা

মরুভূমির উপর ঠাণ্ডা আর মহাশূন্যে স্থির। দু'জন চলেছে ওরা হাত ধরাধরি করে। কথা নেই অনেকক্ষণ কারও মুখে। একটা পৌন্টলায় যা পেরেছে বেঁধে নিয়েছে রানা। বনবন নিজের পিঠে জোর করে বুলিয়ে নিয়েছে সেটা। রানার কাঁধে রাইফেলটা। চারদিকে চন্দ্রালোকিত সীমাহীন বালি।

‘কতদূর আমাদের যেতে হবে, রানা?’

‘বলতে পারছি না এখনও!’

চূপ করে গেল বনবন। তারপর আবার মুখ খুলল, ‘আমি জানি তুমি ভেবে ভয় পাচ্ছ হয়তো প্রতিটি পদক্ষেপের সাথে দূরে চলে যাচ্ছি আমরা বাবার কাছ থেকে।’

‘করার কিছু নেই, বনবন। এখন শুধু নিজেকে রক্ষা করতে হবে।’

পাথরের স্তূপ দেখা যাচ্ছে সামনে। রানার হাত ছেড়ে দিয়ে বসে পড়ল বনবন, ‘আর পারছি না, রানা।’

কথা না বলে একটা পাথরের গায়ে হেলান দিল রানা। যতদূর দৃষ্টি চলে চাঁদের আলোয়, সেই শেষ সীমা পর্যন্ত, কোথাও প্রাণের চিহ্ন নেই। কোথাও মরুদ্যানও পড়ছে না দৃষ্টি সীমায়। বেশ কিছুক্ষণ বসে রইল ওরা চূপচাপ।

‘এখানে মরবার ইচ্ছা নেই আমার। ওঠো, বনবন।’

‘কি লাভ? ইচ্ছা তো আমারও নেই এখানে মরবার। কিন্তু মরতেই হবে...’

‘স্বইচ্ছায় না মরলে মরব না। চলো, ওঠো।’

ওরা হাঁটল। বিধাম নিল। আবার হাঁটল। বনবনের পা আর চলতে চায় না। শেষবেলায় সাহায্য করতে হলো রানাকে। ওর কোমর জড়িয়ে ধরে হাঁটিয়ে নিয়ে চলল রানা। চাঁদ ঝুঁকে পড়েছে নিজস্ব কক্ষপথ ধরে পশ্চিম দিকে। আকাশের উপর মিলকি-ওয়েকে দেখাচ্ছে সিলভারের ফিতের মত।

চাঁদ যখন প্রায় ডুবু ডুবু এমন সময় কিছু যেন চোখে ধরা পড়ল পলকের জন্যে।

জিনিসটা কোন ছায়া নয় বা বালিতে চলমান কিছু নয়। মাত্র এক পলকের জন্যে ঝলক দিয়ে অদৃশ্য হয়েছে দূরের বালির টিবির ওদিকে। সত্যি দেখছে, না চোখের ভুল বুঝতে পারল না রানা। বনবনকে তাই কিছু বলল না। লক্ষ্য রেখে অপেক্ষা করতে লাগল ও।

আবার যখন দেখা গেল তখনও পরিষ্কার বুঝতে পারল না রানা ওটা মানুষ না জানোয়ার। তৃতীয় বারে প্রশ্ন দেখা দিল একটা। কোন ধাতু বা কাঁচে প্রতিফলিত হচ্ছে চাঁদের আলো। নাইট গ্লাস দিয়ে কেউ কি নজর রাখছে ওদের দিকে?

ইজিপশিয়ান মিলিটারি আর্মি পেন্টেল হতে পারে। অবশ্য দেশটা যদি মিশর হয়। তাই যদি হয় তাহলে সৌভাগ্যই বলতে হবে। কিন্তু ড্যান্সাররা ফিরে আসছে না তো? ওদেরকে দেখতে না পেলেও শুকনো বালিতে ওদের পদচিহ্ন ধরে আগামী দুপুরের মধ্যেই ধরে ফেলবে ড্যান্সাররা।

বনবনকে কিছু শোনালা না রানা। হেঁটেই চলল ওরা। মিনিট কুড়ি পর

খামল আবার বিশ্রামের জন্যে। মক্কাভূমির কোনও পরিবর্তন নেই। রাত্রির এতগুলো ঘণ্টায় ওরা কোনও জনপ্রাণী, ঘর বাড়ি, রাস্তা দেখেনি।

পরবর্তী বালির টিলায় উঠে আবার লক্ষ্য করার চেষ্টা করল রানা। কয়েক মুহূর্ত পর পরবর্তী টিলার উপর অস্পষ্ট একটা ছায়া দেখা গেল। তারপর আবার প্রতিফলিত হলো। তারপর সব মিলিয়ে গেল আগের মতই।

‘বনবন, তোমাকে এখানে রেখে যাচ্ছি আমি ক’মিনিটের জন্যে। এখান থেকে নড়বে না এক পা। শুয়ে পড়ে ঘুমিয়ে যাবার ভান করো তুমি।’ বলল রানা হঠাৎ।

‘রানা? কি হয়েছে, রানা?’ হঠাৎ অস্বাভাবিক প্রস্তাব শুনে চমকে উঠল বনবন।

‘আন্তে। আন্তে কথা বলো, বনবন। আমাদের ওপর নজর রেখেছে...’

‘কারা? ড্যাপার...?’

‘আন্তে বলো। কথা বলার সময় নেই। যা বলছি করো লক্ষ্মী মেয়ের মত।’

কাঁধ থেকে রাইফেল নামিয়ে হাতে নিতে নিতে ছুটল রানা পরবর্তী বালির টিলাটার দিকে।

‘রানা!’ অসহায় গলায় ডেকে উঠল বনবন।

দাঁড়াল না রানা। ছুটতে ছুটছে পরবর্তী টিলাটার সামনে গিয়ে দাঁড়িয়ে হাঁপাতে লাগল ও। ছেড়ে আসা টিলাটার দিকে তাকিয়ে বনবনকে দেখতে পেয়ে হাত নেড়ে আশ্বাস দিল রানা। কথামত শুয়ে পড়ছে বনবন।

টিলাটাকে ঘিরে হাঁটতে হাঁটতে একটা উঁচু জায়গা বেছে নিল রানা। রাইফেল বুকে নিয়ে ঢালু বালির উপর শুয়ে পড়ল ও।

অনেকক্ষণ পর গোটা ছায়াটা দেখা গেল। টিলার উপর থেকে নেমে আসছে দ্রুত। চোখে নাইট গ্লাস আঁটা লোকটার। তার মানে ওদেরকে দেখেনি এখনও। লোকটাকে একাই দেখল রানা সমতল বালিতে নেমে এসেছে সে। এগিয়ে আসছে রানার টিলা দিকে।

টিলাটার উপর উঠে পড়ল লোকটা। নড়ল না রানা। দাঁড়িয়ে পড়ল লোকটা। পরবর্তী টিলার উপর শায়িত বনবনের দেহ খুঁটিয়ে খুঁটিয়ে দেখল খানিকক্ষণ। কোনও নড়াচড়া নেই দেখে নামতে শুরু করল লোকটা।

হাতে একটা রাইফেল ঝুলছে। ভিজে আঙুলের মাথা থেকে পানি পড়ার মত বালি ঝরে পড়ছে নলটা থেকে। মাথায় রুমাল বাঁধা লোকটার। গায়ে ওভারকোট।

টিলা থেকে নামতে শুরু করেছে লোকটা। পাশ থেকে উঠে দাঁড়িয়ে টিলার মাথায় এসে দাঁড়াল রানা। তারপর উপর থেকে লাফ দিয়ে পড়ল লোকটার ঘাড় লক্ষ্য করে।

বালি বিশ্বাসঘাতকতা করল ওর সাথে।

লাফ দেবার সময় শুকনো বালিতে পা পিছলে গেল রানার। লোকটার হাঁটুর উপর গিয়ে ধাক্কা খেল ওর দেহটা। গড়িয়ে পড়ল দু’জনেই। গড়াতে

গড়াতে জাপটে ধরে ফেলল রানা লোকটাকে। নিচে এসে থেমে গেল দু'জনের দেহ। গলা টিপে ধরে লোকটার বুকের উপর চেপে বসল রানা।

যন্ত্রণায় অশ্রুট আওয়াজ করে উঠেই লোকটা বিচিত্র এক ধরনের শব্দ করে কিছু বলতে চাইল।

হাসছে নাকি লোকটা?

একটু ঢিলে করল হাত দুটো রানা।

‘রানা? মাসুদ রানা।’

আরও খানিক ঢিলে করল রানা হাত দুটো, ‘মাথা ঘোরাও তোমার।’

লোকটা চাঁদের দিকে মুখ করল। যন্ত্রণার মধ্যেও অতি কষ্টে হাসছে সে।

মেজর আত্‌হার হোসেনকে চিনতে পারল রানা।

## আট

নতুন গজানো খোঁচা খোঁচা দাড়ি গালে আর পুরানো হয়ে যাওয়া ময়লা পোশাক পরনে আত্‌হারের। পরিবর্তন ওর এর বেশি দেখল না রানা। মুখটা হাসছে। কিন্তু অর্থহীন হাসি। কার্যিক পরিশ্রমের ক্লান্তির শেষ সীমায় পৌঁছেছে ও।

‘তোমাকে আশা করিনি। তুমি একা?’

‘একদম একা। কিন্তু ইসরাইলের বন্ধুরা অপেক্ষা করছে।’

‘ইসরাইলের? তোমার জন্যে ডেঞ্জারাস। আমার জন্যেও।’

‘মাসুদ রানা ডেঞ্জারাসকে ডেঞ্জারাস বলে মনে করে এ কথা আমাকে দু’বার কেউ বললে আমি তার দাঁত ভেঙে দেব।’ হাসল আত্‌হার সকৌতুকে।

‘কিভাবে পেলেন আমাদের খবর?’

‘কায়রো ড্যান্সার প্যাভিলিয়নে তোমাকে কাবু করার পর খবর পাই আমি। কিন্তু লিসিলের মৃত্যুতে উন্মনা হয়ে পড়েছিলাম বলে দেরি করে ফেলি আমি। কিন্তু কৌশলে ইন্সপেক্টর জেনারেল হের বেলচাকে কাজে লাগাই আমি।’

‘জেনারেল বেলচা সাহায্য করল তোমাকে?’

‘আদায় করার অস্ত্র থাকা চাই—ইনফরমেশন। বিশ্বস্ত লোক নয় সে, কোনও সন্দেহ নেই। কিন্তু ওর বহু তথ্য আমি জানি। বাধ্য করলাম ওকে চাপ দিয়ে। খুব কাজে দিয়েছে লোকটা। একটা মালবাহী জাহাজে তোমাকে ঝুঁজে পাই আমরা। আলেকজান্দ্রিয়ার দিকে নোঙর করা শিপ। তারপর লরি করে ইসরাইল...বর্ডার অতিক্রম করো তুমি। ক’দিনের জন্যে হারিয়ে ফেলেছিলাম এরপর তোমাকে। সম্ভাব্য ড্রপ-পয়েন্টে খোঁজাঝুঁজি করি। শেষ পর্যন্ত এদিকে আসি।’

‘ইসরাইল গভর্নমেন্ট জানে এসব?’

‘না।’

‘কায়রো ড্যান্সারদের সাথে কোনও সম্পর্ক নেই ওদের?’

‘না। কায়রো ড্যান্সারদের আস্তানা ইসরাইলে নয়, ইজিপ্টে। প্রেসিডেন্ট নাসের সেলিম আল-রশিদকে ইসলামের এবং মুসলিম জাহানের শত্রু বলে ঘোষণা করেছিলেন একবার। কিন্তু ইন্টেলিজেন্স তার কোন সম্মান করতে পারেনি।’

ওদেরকে মাইলখানেক হাঁটিয়ে নিয়ে গেল আত্‌হার। ওর জীপে প্রয়োজনীয় সব জিনিসই মওজুদ দেখা গেল। বনবন কক্ষল জড়িয়ে নিল গায়ে জীপে উঠেই। রানা আকাশের দিকে তাকাতে আত্‌হার বলে উঠল, ‘সকাল হতে দেরি নেই। তেল আবিব থেকে পঁচাত্তর মাইল দূরে আমরা। আটটার মধ্যে পৌঁছুতে হবে। রাস্তার মাঝখানে আমার এক চেনা বেদুইনকে উঠিয়ে নেব একবার। কোথাও আর থামব না। অলরাইট?’

ড্রাইভিং সীটে বসল আত্‌হার।

সকালের আলো ফোটার সাথে সাথে দেখা গেল দূরে উঁচু উঁচু খেজুর গাছ আর মাটির দেয়াল। তারপর একটার পর একটা মরুদ্যান অতিক্রম করে চলল জীপ। ঘন ঘন মরুদ্যানের পর সাত-আট মাইলের মধ্যে পাওয়া গেল প্রথম গ্রামটি। নয় ছেলেমেয়ে তরকারীর খোসা নিয়ে খেলা করছে। সারা গায়ে ময়লা। যুবতী মেয়েরা গোল হয়ে লাল বালিতে সেলাইয়ের কাজে ব্যস্ত। পুরুষরাও অদূরে বসেছে দল বেঁধে। জীপটা গিয়ে থামতেই যুবতীরা কিচির মিচির শব্দ করে মাটির ঘরের ভিতর হুড়মুড় করে গিয়ে ঢুকল। ছেলেগুলো যে যার জায়গায় দাঁড়িয়ে দেখছে জীপটা। পুরুষেরা দাঁড়াল জীপটাকে ঘিরে তিনজন ছাড়া সবাই প্রস্থান করল নিজেদের জায়গায়।

‘সালাম।’ একজন লোক বলল।

তিনজনকেই ভয়ঙ্কর বলে মনে হলো রানার। অতিরিক্ত লম্বা আর শক্তিশালী লোক এরা। গায়ের রঙ প্রায় লাল। ঢোলা জোন্সা পরনে। একজনের একটা চোখ নেই। সেটার পাতা বন্ধ। একটা চোখ হাসছে তার।

পরিচয় করিয়ে দিল আত্‌হার একচোখা লোকটার সাথে রানার, ‘এই-ই হচ্ছে ইবাহিম বেন-হাকিম। ওর ছেলে আইয়ুব জেরুজালেম ইউনিভার্সিটির মেধাবী ছাত্র। বেদুইনরা লেখাপড়ার কোনও ধার ধারেনি এতদিন। ওর ছেলে সে হিসেবে একটা ব্যতিক্রম।’

বেন-হাকিমের একটা চোখ অকস্মাৎ জ্বলে উঠল। ‘মেজর আত্‌হারের কথায় জান দিতে হলেও তৈরি আমরা। মেজর যেখানে পাঠাবে সেখানেই যেতে পারি। দ্বিতীয় পর্যায়ের গর্দান কেটে আলাদা করে আনতে পারি।’

আত্‌হার বলল রানাকে, ‘মিডল ইস্টের সর্বত্র গতিবিধি বেদুইনদের। সব খবরই কম বেশি রাখে ওরা।’

বেন-হাকিম তার দলবল নিয়ে চড়ে বসল জীপের উপর। ছেড়ে দিল আত্‌হার জীপ।

রানা বলল, ‘তেল আবিবে প্রবেশ করতে...’

‘কোনও চিন্তা করবেন না। আমার লোক সব জায়গায় সব সময় আছে।  
আম্মা সহায়।’ বেন-হাকিম আশ্বাস দিল।

মাইল পনেরো এগোবার পর একটা হাসপাতালের গ্যারেজের কাছে থামল  
জীপ। নেমে পড়ল সবাই। এ্যাম্বুলেন্সে চড়ে বসল সবাই বেন-হাকিমের  
ইঙ্গিতে। মিনিট দশেক পর এ্যাম্বুলেন্সে এসে উঠল সে নিজে। ছেড়ে দিল  
এ্যাম্বুলেন্স। আতহার জানালাগুলোর শাটার নামিয়ে দিয়েছে।

তেল আবিবে পৌছে গেল ওরা নটার দিকে। এ্যাম্বুলেন্স থামল আর  
একটা হাসপাতালের পিছন দিকে। বেন-হাকিম সবাইকে অপেক্ষা করতে  
বলে নেমে গেল একা। আধ ঘণ্টা পর ফিরে এল সে। কথা বলল না। গাড়ির  
উপর বসে সিগারেটের ধোঁয়া ছাড়তে লাগল নির্ভাবনায়। আরও মিনিট কুড়ি  
পর বাইরে থেকে বেন-হাকিমকে ডাকল কেউ। বেন-হাকিম নেমে গিয়ে  
খানিকক্ষণ কথা বলল আগন্তুকের সাথে। তারপর ডাকল আতহারকে, নামার  
ইঙ্গিত করল বনবন আর রানাকে।

এ্যাম্বুলেন্স থেকে নেমে বড় একটা ক্রাইসলার গাড়িতে উঠে বসল ওরা  
সবাই। কিন্তু বেন-হাকিমের অপর দুই সঙ্গীকে এবার দেখা গেল না।  
আতহার রানাকে উদ্দেশ্য করে বলল, ‘আমাদের প্লেন সন্ধ্যার আগে উড়বে  
না। আমাদের পাসপোর্টের ব্যবস্থা হয়ে যাবে ঘণ্টা দুয়েকের মধ্যেই। বেন-  
হাকিম লোক পাঠিয়ে দিয়েছে। ট্যুরিস্ট হিসেবে উঠব আমরা হোটеле।  
সন্ধ্যার ফ্রাইটে এথেন্স গিয়ে পৌছুব। ঘুর-পথে যেতে হবে আমাদের।’

‘ফাইনালি কোথায় যাচ্ছি আমরা?’

‘অনুমান করে নির্দিষ্ট কোন জায়গার নাম বলা অসম্ভব। বেন-হাকিম সঙ্গে  
ধাকছে। তথ্য যোগাড় করে দেবার ভার ওর ওপর। পারবে বলেই সাহায্য  
নিয়েছি ওর। সেকেন্ড প্রফেটের অনুচররা মিডল ইস্টের সব বর্ডারেই ঘাঁটি  
পেতে আছে গোপনে।’

শহরটা দেখার ইচ্ছা থাকলেও দেখতে যাওয়াটা রিস্কি। জানালার পর্দা  
ফেলে দিয়েছে বেন-হাকিম। সামনের কাঁচ দিয়ে যতটা দেখা গেল তাতেই  
বুঝতে অসবিধে হলো না রানার যে তেল আবিব কসমোপলিটান সিটির আদর্শ  
বিশেষ।

‘হিয়ার উই আর।’ আতহার বলল ক্রাইসলার থেমে যেতেই।

প্রকাণ্ড একটা উঁচু বিল্ডিংয়ের সামনে নামল ওরা। হোটেল এনা। এদিক  
ওদিক না তাকিয়ে লন পেরিয়ে সোজা এলিভেটরে এসে উঠল সবাই।  
এলিভেটর ফোরটিছ ফ্লোরে উঠে এসে দাঁড়াল। বেন-হাকিমের একজন  
লোককে দেখা গেল এলিভেটর থেকে নামতেই। লোকটাকে কাজের বলেই  
মনে হলো। হোটেলের একটা বয়ের সাথে খুব দহরম মহরম চালিয়েছে  
ইতোমধ্যেই।

প্রত্যেককে নিজের নিজের রুমে পৌছে দিল বেন-হাকিমের লোক।

পাশাপাশি রুমগুলো ওদের।

শাওয়ারে কুড়ি মিনিট লাগল রানার। আত্‌হার সব ব্যবস্থা করেছে নিখুঁতভাবে। বেন-হাকিমের লোককে দিয়ে পোশাক পরিচ্ছদ কেনাতেও ভুল করেনি।

বেন-হাকিম ওদেরকে এলিভেটরে উঠিয়ে দিয়ে বিদায় নিয়েছে। আবার আসার কথা তার আধ ঘণ্টার মধ্যে।

বনবন এসে দেখল রানা চেয়ারে হেলান দিয়ে চোখ বুজে সিগারেট টানছে। সংলগ্ন রুম ওদের। দরজা খুলেই ঢুকে পড়েছে বনবন। চোখ বুজেই জিজ্ঞেস করল রানা, ‘স্নান করেছে?’

‘হঁ।’

‘সেজেছ?’

‘হঁ—’ বনবন একটা হাত রাখল রানার কাঁধে, ‘এসব আবার কি ধরনের প্রশ্ন?’

‘কথা নয়। প্রশ্নের উত্তর দিয়ে যাও। মৃত্যু ভয় দূর হয়েছে?’ চোখ বন্ধ রানার।

‘কেন, মরতে যাব কোন্‌ দুঃখে। আমি মরলে তোমার কাঁধের দায়িত্ব নেমে যায়, না?’

‘কাঁধের দায়িত্ব নামাবার জন্যে তোমার মৃত্যু কামনা করব তেমন লোক মনে হয় আমাকে?’

‘না—মাফ করো, রানা।’ ঝুঁকে পড়ে রানার কপালে চুমো খেল বনবন, ‘তুমি আমাকে দ্বিতীয়বার জন্ম দিয়েছ। সেকথা ভুলি কেমন করে।’

রানা চোখ মেলে বলল, ‘আর একবার মৃত্যু ভয়ে কাহিল হয়ে পড়ো, প্লীজ। আমার তাহলে...’

‘য’ যা, দুইট...’ মরুদ্যানের সেই বন্দীখানার অন্ধকার ঘরটার কথা মনে পড়ে গেল বনবনের। মরতে হবেই মনে করে রানাকে সঁপে দিয়েছিল ও সবকিছু।

বনবনের রুম হয়ে রানার রুমে এল আত্‌হার। বলল, ‘ব্রেকফাস্ট আনতে বলে দিয়েছি এখানে।’

ব্রেকফাস্ট সেরে আত্‌হার উঠে দাঁড়াল। রানা জিজ্ঞেস করল, ‘বেন-হাকিম ফিরবে কখন?’

‘পোর্টারকে বলে রেখেছি কেউ আমার রুমে আসতে চাইলে উপরে এনে বসাতে। এতক্ষণ বেন-হাকিম এসে গেছে বোধহয়।’

ওরা তিনজন বনবনের রুম অতিক্রম করে আত্‌হারের দরজার সামনে এসে দাঁড়াল। আত্‌হার ভেজানো দরজা খোলার জন্যে হাত বাড়াতেই রানা বাধা দিল, ‘দাঁড়াও, কেউ থাকতে পারে ভিতরে।’ কথাটা বলে বনবনকে পিছনে সরিয়ে দিয়ে এক ঝটকায় খুলে ফেলল দরজার কবাট দুটো। ভিতরে ঢুকেই একপাশে সরে গিয়ে দেয়াল ঘেঁষে দাঁড়াল ও।

প্রায় অন্ধকার রুমের ভিতর একটা ইজি চেয়ারের উপর গা এলিয়ে দিয়ে

উরুর উপর ছড়িটাকে গুইয়ে রেখে সিগারেট টানছে একজন লোক। সুইচ অন করতেই চেনা গেল।

ইস্পেক্টর জেনারেল বেলচা অপেক্ষা করছে ওদের জন্যে।

চমকটা প্রত্যাশা করেনি আত্‌হার। পকেট থেকে রিভলভার বের করে ফেলেছে ও আগেই। রানা ওর হাতটা সরিয়ে দিল। আত্‌হার অস্বাভাবিক গম্ভীর হয়ে উঠল, 'আপনি খুব ফাস্ট, হের বেলচা।' মোটা গলায় বলল ও, 'এই হোটেলে, এই রুমে আশা করিনি আপনাকে।'

'মাই ডিয়ার মেক্সর আত্‌হার, আমাদের ইনফরমেশন পাবার মাধ্যম একটা দুটো নয়। কেমন আছে ইব্রাহিম বেন-হাকিম? দেখছি না যে ওকে?'

'হোয়াট ডু ইউ ওয়ান্ট?' সরাসরি প্রশ্ন করল এবার রানা।

'মানে হয় না। কোনও মানে হয় না এ প্রশ্নের। আমরা কি ঝগড়া করব পরস্পরের সঙ্গে?' ছড়ি দুলিয়ে দুলিয়ে কথা বলছে জেনারেল বেলচা, 'আপনাদের মহান শত্রুনিধন প্রচেষ্টায় আমার ক্ষুদ্র শক্তি যোগ করার সিদ্ধিহাকে অবহেলা করবেন এমন আশা আমি করি না, হের রানা। ইলনিগালি তেল আনিবে ঢুকেছেন আপনারা। সন্দেহ নেই, ব্যাপারটা ভয়ঙ্কর।'

'সিকিউরিটি পুলিশ সেকথা জানবে না।' আত্‌হার বলল দৃঢ় কণ্ঠে।

'জোর করে বলতে পারেন?'

রেগে উঠে আত্‌হার জিজ্ঞেস করল, 'আপনি ইতিমধ্যে সতর্ক করে দিয়েছেন বুঝি ওদেরকে?'

'প্লীজ। আগেই বলেছি, আমরা শত্রু নই পরস্পরের। আমরা বন্ধু। মিউনিকে আমি কি সাহায্য করিনি আপনাদেরকে? হবার্ট ডনফিল জেল থেকে পাঙ্গিয়েছে, সেটা কি আমার দোষ?'

'দোষ বা ভুল—আপনারই।'

'মাই ডিয়ার হের মাসুদ...।'

রানা বলল, 'জাস্ট এ মোমেন্ট।'

ক্রোধ ও সন্দেহ লাফ মেরে মেরে বাড়তে যাচ্ছে দেখে রানা আত্‌হারকে ধাবার আনবার ব্যবস্থা করতে বলল জেনারেল বেলচার জন্যে। রানা রুমগুলো সার্চ করতে শুরু করে দিল।

বাথরুম সার্চ করল আগে ও। তারপর বেডরুম। একটি মাত্র ব্যালকনি সেটাও বাদ দিল না রানা। পাওয়া গেল না কোন যন্ত্র।

সিটিং রুমের চেয়ার উল্টে উল্টে দেখার সময় জেনারেল বেলচা নিম্পলক চোখে দেখতে লাগল রানাকে। কষ্টে দেয়ালের তৈলচিত্রগুলো খুলে ফেলে পরীক্ষা করল একটা একটা করে রানা। বাস ল্যাম্পের বাল্বের স্ক্রু খুলে দেখল। চেক করল পার্শিয়ান কার্পেট। Hexagonal Bombay টেবিলটার নিচে ঢুকে গিয়ে তন্ন তন্ন করে খুঁজল। কোথাও কিছু না পেয়ে ইসরাইলী সিকিউরিটি অ্যাপারেটাস সম্পর্কে শঙ্কা বেড়ে গেল রানার। ইসরাইলীরা বোকা নয়। হোটেলে তৈরির সময় লিসনিং ডিভাইস ফিট করা হয়েছে বলে

ধারণা করল ও।

আত্‌হার পাসপোর্ট নিয়ে রুমে এল রানার কাজ শেষ হয়ে যেতে। পরীক্ষা করে রানা বলল, 'কোনও খুঁত নেই।' একটু ভেবে নিয়ে জানতে চাইল ও, 'কখন রওনা হচ্ছি আমরা?'

'ডিনারের আগে নয়।'

গভীর হয়ে উঠল রানা। তারপর হঠাৎ ফিরল জেনারেল বেলচার দিকে ও, 'আই রিপোর্ট, হোয়াট ডু ইউ ওয়ান্ট?'

'মাই ডিয়ার হের মাসুদ রানা, আপনার মত লোকের সন্দেহ থাকা ভাল, কিন্তু সে-সন্দেহ আমার ওপর ফেলার কোন অর্থ হয় না। ইসরাইলের সাথে এসব ব্যাপারে আমার কোনও যোগাযোগ নেই। বিশ্বাস করুন। আপনাদেরকে সাহায্য করছি, এটাই কি প্রশ্ন নয়?'

রানা পরিষ্কার গলায় বলল, 'আপনাকে বিশ্বাস করি না, জেনারেল। আপনার কোনও সাহায্য আমরা চাই না। আপনাকে যদি এখন এখান থেকে বের হয়ে গিয়ে নিজের কাজে মাথা ঘামাতে বলি?'

'তাহলে একটি মাত্র কাজই করব আমি।'

'কি স্টেট?'' আত্‌হার কর্কশ গলায় প্রশ্ন করে তাকাল রানার দিকে। রানা শান্ত হবার ইঙ্গিত করল ওকে।

'ইসরাইলী সিকিউরিটি সারভিসে একটা মিশন করলে আপনারা আজ প্লেনে চড়তে পারবেন না।'

আত্‌হারের গলা দিয়ে অদ্ভুত শব্দ বেরিয়ে গেল একটা। খেপে গেছে ও। হাত বাড়িয়ে আত্‌হারের কাঁধটা ধরে ফেলে থামল রানা। রাগে ফুঁসছে আত্‌হার। রানা এগিয়ে এল জেনারেল বেলচার কাছে, 'জেনারেল, প্রথম থেকেই ধোঁকা দিয়ে রাখার চেষ্টা করেছেন আপনি আমাদের সবাইকে। হবার্ট ডনফিল সম্পর্কে ফাইল আছে আপনার অফিসে। ফাইলে সত্য লিপিবদ্ধ আছে। আপনি সব জানেন। বলুন হবার্ট ডনফিল নাজী অপরাধী কিনা?'

'আমি অত্যন্ত দুঃখিত, উত্তর দেয়া এখন সম্ভব নয়।'

'আত্‌হার?'' রানা ডাকল।

আত্‌হার মাথা নেড়ে সম্মতি জানিয়ে ইজিচেয়ারের অপর পাশে এগিয়ে এসে দাঁড়াল। বনবন নিজের রুমে চলে গেছে একসময়। জেনারেল বেলচা ছড়িটা মাটিতে দাঁড় করিয়ে ঝুঁকে পড়ল সামনে, লম্বা করা পা দুটো টেনে নিল কাছে।

'ঘিরে ফেলা হলো মনে হচ্ছে। কোনও হুমকিকে ভয় করি না আমি, জেন্টলমেন। আমার প্রস্তাব কিরিয়ে নিতে বাধ্য হব এরপর আমি।'

'হ্যাঁ, তাই নিন জেনারেল। আপনার সাহায্যের নমুনা দেখে ফেলেছি আমি। এখানে আসার পর থেকেই বিশ্বাসঘাতকতা শুরু করেছেন আপনি।' রানা বলল।

'বুঝতে পারলাম না আপনার কথা, হের মাসুদ...'

'আপনার ছড়িটা দিন, জেনারেল।' রানা বলল।

‘আমার ছড়ি?’

‘ন্যাকামি খাটবে না, জেনারেল। তুমি বোকা নও। গিভ মি দ্য স্টিক।’

জেনারেল বেলচা উঠে দাঁড়াতে গেল দ্রুত। কিন্তু রানা আগেই কনুই চালিয়েছে পাশ থেকে। বিজাতীয় স্বরে অদাক্ত একটা উঁক শব্দ তুলে এলিয়ে পড়ল সে ইজিচেয়ারে। ছড়িটা টান মেরে কেড়ে নিল আত্‌হার।

এক পা করে দু’জনা পিছিয়ে এল ওরা। আত্‌হার ছড়িটা তুলে দিল রানার হাতে। রানা লক্ষ্য রাখতে বলল ওকে জেনারেলের দিকে।

ছড়িটা সোনার টোপের পরানো। সেটা ধরে জোরে মোচড় দিতেই প্যাঁচ খুলতে শুরু করল। টোপেরটা খুলতে ভিতরে গর্ত দেখা গেল। টেবিলের উপর ছড়িটা ঠুকল ঠকঠক করে রানা। হঠাৎ বেরিয়ে এল ক্ষুদ্র একটা ব্রডকাস্টিং যন্ত্র। রানা বুঝতে পারল রুমে ঢোকার পর থেকেই জেনারেল বেলচা ওদের খবর পাচার করতে শুরু করেছিল। কিন্তু কার কাছে? কোথায়?

রিভলভারটা জেনারেল বেলচার বুক লক্ষ্য করে ধরেছে আত্‌হার, ‘শেষ করে ফেলি ঝামেলা, রানা।’

‘একমিনিট।’ রানা তাকাল জেনারেলের দিকে, ‘হবার্ট ডনফিলের কথা বলো, বেলচা।’

জেনারেলের মুখ শুকিয়ে কালো হয়ে গেছে। রানার দিকে খানিকক্ষণ তাকিয়ে থাকার পর মুখ খুলল সে, ‘আসলে হবার্ট ডনফিল একজন নয় মাই ডিয়ার—দু’জন। একজন পোল্যান্ডের প্রিন্স ক্যাম্পের চার্জে ছিল, সেও বৈজ্ঞানিক। দ্বিতীয়জন অপটিক আর ইলেকট্রনিকে এক্সপার্ট। দু’জনাই ব্রিলিয়ান্ট। আমরা জানি একজন মরে গেছে। আর একজন কাজ করছিল আলাবামায়। কিন্তু দু’জনার মধ্যে কে মারা গেছে এখনও সঠিক জানি না আমি।’

রানা বলল, ‘মিথ্যে বলার সময় নয় এটা, বেলচা। ইনোসেন্ট ছিল কে?’

‘কসম খেয়ে বলছি, ব্যাপারটা তালগোল পাকানো। আসল সত্য আমি নিজেই জানতে চাই।’

‘কার কাছে খবর পাঠাচ্ছিলে তুমি?’

জেনারেল চুপ করে রইল।

‘পাঁচ সেকেন্ড সময় দিলাম। এক...দুই... তিন।’ আত্‌হার গুণে চলল।

‘ওয়েট, হার স্বীকার করছি আমি। ইসরাইলে নিজস্ব লোক আছে আমার।’

‘আমরা যদি ধরা পড়ি তাহলে তুমি শেষ হবে আগে। লোকগুলো ইসরাইলী?’

‘না।’

রানা আত্‌হারের দিকে ফিরে বলল, ‘বেন-হাকিমকে লবি থেকে উপরে নিয়ে এসো, আত্‌হার। হোটেল বদলাতে হবে এখন। বেলচা আমাদের অতিথি আপাতত।’

## নয়

রাত্রি নটায় ওরা বেন-হাকিম আর তার দুই সঙ্গীর সাথে এরোড্রামে এল। বেন-হাকিম রানাকে আশ্বাস দিয়ে জানিয়েছে শহরে পুলিশের কোনও অস্বাভাবিক তৎপরতা নেই। কিন্তু EL AL জেট স্টার্ট না নেয়া অবধি স্বস্তি পেল না রানা।

প্লেনে চড়ার আগে আত্মহার অবাক হয়ে বলল, ‘আমরা ভুল করছি, মেজর। বেলচাকে শেষ করেই রওনা হওয়া উচিত ছিল আমাদের। ওকে সাথে নিয়ে...’

‘ওকে দিয়ে অনেক কাজ হবে, আত্মহার। তাছাড়া তথ্য পেতে চাই ওর কাছ থেকে।’

‘কি তথ্য দেবার আছে ওর? Negev থেকে আমরা যদি সন্ধান শুরু করি আল-রশিদের তাহলে হয়তো পেয়ে যাব। বেলচা আবার ষড়যন্ত্র পাকাবার সুযোগ পাবে আমরা ব্যস্ত হয়ে পড়লে।’

‘Negev থেকে? তুমি শিওর?’

আত্মহার বলল, ‘তোমাকে যেখানে বন্দী করে রেখেছিল সেই জায়গা থেকে সম্ভাব্য যে কোন দূরত্বে হতে পারে আল-রশিদের আস্তানা। সিনাই মরুভূমি সম্ভাব্য দূরত্বে পড়ে। ভয়ঙ্কর দুর্গম জায়গা। কিন্তু বেন-হাকিমের বংশধররা চেনে ভাল করে।’

সিনাই। জানে রানা কি রকম দুর্গম অঞ্চল সিনাই। পাহাড় আর বালি। রাস্তা নেই। সেটেলমেন্ট নেই। পানি নেই। খাবার নেই।

সামনে সংগ্রাম বুঝতে অসুবিধা হলো না রানার।

এখেন্স এয়ারপোর্টে নেমেই ফোন করল রানা ওখানকার কাউন্টার ইন্টেলিজেন্সের অপারেটর সরফরাজকে।

হোটেলের উঠল ওরা একটা দিন কাটাবার জন্যে। সরফরাজ আধঘণ্টার মধ্যে পৌঁছে গেল। ডায়ালারদের সম্পর্কে যা জানানো দরকার সব বলে গেল রানা। সরফরাজ টেপ করে নিল ওর কথা। আজকেই পৌঁছে যাবে টেপ মেজর জেনারেল রাহাত খানের কাছে। রানা ওদের পরবর্তী কর্মসূচী সম্পর্কে খোলাখুলি কিছু না বলে সামান্য আভাস দিল মাত্র।

পরদিন দুপুরে কায়রোতে ল্যান্ড করল BEA জেট।

কাউন্টার ইন্টেলিজেন্সের অপারেটর সিদ্দিকী অপেক্ষা করছিল লবিতে। রানাকে ইঙ্গিতে ফাস্ট ফ্লোরের বারে যেতে বলল সে।

বারে একটা টেবিলে বসে কনিয়াকের অর্ডার দিল রানা দু’জনের জন্যে। সিদ্দিকী এসে বসল ওর পাশে।

‘বলো।’ নিচু গলায় অনুমতি দিল রানা।

সিদ্ধিকী ফিসফিস করে শুরু করল, ‘মেসেজ পেয়েছি, স্যার। মেজর জেনারেল জানাচ্ছেন আপনার অ্যাকটিভিটি ঘাবড়ে দিয়েছে ড্যাপারদেরকে। ওরা এক্ষেত্রে ওদের প্রথম আঘাত নির্দিষ্ট সময়ের আগেই হানতে পারে বলে আশঙ্কা করছেন মেজর জেনারেল। যদি তাই করে, মেজর জেনারেল বিশ্বাস করেন, গোটা মিডল ইস্টকে উড়িয়ে দিতে পারে ওরা। ইতিমধ্যে সাবধান করে দেয়া হয়েছে কায়রোকে। আরব জাহানের আর সব দেশের গভর্নমেন্টকেও খবর পাঠিয়ে দেয়া হয়েছে। কিন্তু, মেজর জেনারেলের বিশ্বাস, এসব ব্যাপারে সেলিম আল-রশিদের কিছুই যাবে আসবে না।’

‘স্পেসিফিক কোনও অর্ডার আছে আমার জন্যে?’

‘আছে, স্যার। ইউ আর টু প্রসিড ইমিডিয়েটলি। যে কোন রিস্ক নেবার কথা বলেছেন মেজর জেনারেল। সেকেন্ড প্রফেটের আন্তানা খুঁজে বের করে ধ্বংস করার বদলে যে কোন ত্যাগ স্বীকারের নির্দেশ দিয়েছেন তিনি।’

কোনও সন্দেহ রইল না রানার। মেজর জেনারেল রাহাত খান দরকার হলে মৃত্যুবরণ করতে বলেছেন ওকে।

এয়ারপোর্টের বাইরে ট্রাক অপেক্ষা করছিল। বেন-হাকিম তথ্য সংগ্রহের জন্যে অন্যত্র রওনা হয়ে গেল। তার বংশধরদের গ্রামে ওদের সাথে মিলিত হবে সে। গ্রামে বেন-হাকিমের ছেলে আইয়ুব আছে। ট্রাকে চেপে রওনা হয়ে গেল ওরা।

একটানা তেরো ঘণ্টা ছুটল ট্রাক। থামল শুধু সরাইখানায় দু’বার। আর পেট্রল নেবার জন্যে একবার। সারাদিন একঘেয়ে যাত্রা। বনবন ঘুমিয়ে পড়ল সন্ধ্যার পর রানার কাঁধে মাথা হেলান দিয়ে। বেশির ভাগ সময়ই নির্জন মরুভূমির মাঝখান দিয়ে পাকা রাস্তা ধরে চলেছে ট্রাক। চার পাঁচবার মিলিটারি চেক পোস্টে দাঁড় করাতে হলো ট্রাককে। আত্মহারের আইডেনটিফিকেশন দেখে জেরা না করে স্যালুট ঠুকে ছেড়ে দিল সবখানেই।

রাত দশটার দিকে থামল ট্রাক। সামনে আর রাস্তা নেই।

আধঘণ্টার মত কাটল ওখানেই। বেন-হাকিমের সঙ্গী দু’জন উট আর ঘোড়া যোগাড় করে আনল গ্রাম থেকে। ট্রাক ফিরে গেল ওদেরকে নামিয়ে দিয়ে। উটের পিঠে চড়ে যাত্রা আবার।

ঘোড়া মাত্র দশটা যোগাড় করা গেছে। বেন-হাকিমের লোক পথ চেনে। তাদেরই একজন ঘোড়ায় চড়ল। ফাঁটা তিনেকের মধ্যে পৌঁছুতে পারা সম্ভব উট ছুটিয়ে দিলে। সামনের উটটায় বসিয়ে দেয়া হলো জেনারেল বেলচাকে। সারাটা রাস্তা একটা কথা বলেনি সে কারও সাথে। ওরাও কেউ জিজ্ঞেস করেনি তাকে কিছু। বনবনকে নিয়ে পিছনের উটটায় উঠল রানা। ওদের আগে আত্মহার আর বেন-হাকিমের অপর সঙ্গী।

জেনারেল বেলচার উটের রশি ধরে ঘোড়া ছুটিয়ে দিল বেন-হাকিমের সঙ্গী। প্রতিটি উটের সাথে রশির যোগাযোগ আছে। ঘোড়ার সাথে বেশ দ্রুত তালে ছুট লগ্যাল উটগুলো লাইনবন্দী হয়ে।

ঘণ্টাখানেক আগে চাঁদ উঠেছে আকাশে। বাতাস নেই তেমন। কিন্তু

ভীষণ ঠাণ্ডা লাগছিল বনবনের। কঙ্কল গায়ে জড়িয়ে স্বস্তি পাচ্ছে না ও। রানাকে পিছন থেকে জড়িয়ে ধরেও সম্ভূষ্ট হলো না। রানার পিঠে গাল রেখে ঘুমিয়ে পড়বার ইচ্ছা ওর। রানা ভয় দেখাল ওকে, 'ঘুমিয়ে পড়াটা তোমার মজি। কিন্তু পিছনে পড়ে গেলে হয়তো আমি টেরই পাব না। মরুভূমিতে পুড়ে মরবে কাল সকালে। অবশ্য খেঁকশিয়াল আর লুটেরাদের খপ্পর পেকে বেঁচে গিয়ে রাতটা যদি কাটাতে পারো।'

শিউরে উঠে রানাকে আরও জোরে আঁকড়ে ধরে বনবন বলল, 'তুমি আমাকে ফেলে যাবে বিশ্বাস করি না।'

রানা বলল, 'এর নাম সিনাই। কোন রকম দুর্বলতাকে প্রশয় দিলে খেপে যায় এই মরুভূমি। অসম সাহসী বীর-টির না হলে কেউ বেঁচে ফিরে যেতে পারে না এই সিনাই থেকে।'

'তবে আর চিন্তা কি আমার!' বনবন বলল, 'তুমিও তো অসম সাহসী বীর। আর তোমার সাথে আমার ভাগ্যকে বেঁধে নিয়েছি আমি মনে মনে। তোমার সাথে আমিও বেঁচে ফিরে যাব।'

চাঁদের আলোয় ধু ধু মরুভূমির পঁয়তাল্লিশ মাইল অতিক্রম করতে সাড়ে চার ঘণ্টা লেগে গেল।

মরুদ্যানটিকে গ্রাম বলে মনে হলো না রানার। বেন-হাকিমের পরিবারে সদস্য সংখ্যা ছেলেমেয়ে নারী পুরুষ নিয়ে দুশো আট। একটি মাত্র পরিবার। পঞ্চাশ মাইলের মধ্যে আর কোন বসতি নেই। মরুদ্যানটিতে ছোট বড় অসংখ্য তাঁবু ফেলা।

বেন-হাকিমের পৌছুনোর কথা ওদের আগেই। কিন্তু পৌছায়নি দেখে চিন্তিত হলো রানা। ঘুর পথে আসার কথা তার ঘোড়ায় চড়ে। বেদুইনের শত্রুও কম নয়। আত্মহারও চিন্তিত হয়ে পড়ল।

ওদের জন্যে আলাদা আলাদা তাঁবুর ব্যবস্থা করা হলো। বেদুইনরা চূপচাপ প্রকৃতির। রাজির এই শেষ লগ্নেও জেগে আছে সবাই। কিন্তু আশপাশে ঘুর ঘুর করতে দেখা গেল না কাউকে। তাঁবুগুলোর পাশে গিয়ে দাঁড়ালে মৃদু কণ্ঠস্বর ভেসে আসছে শোনা যায়।

মিনিট পনেরো পর বিছানা ছেড়ে বাইরে এসে দাঁড়াল রানা। আত্মহারের নাইট গ্লাসটা রয়েছে ওর হাতে। উত্তর দিকের আকাশে জেট প্লেনের শব্দ শুনতে পেয়ে বেরিয়ে এসেছে ও।

দেখতে পেল না প্লেনটাকে রানা। নিস্তব্ধ মরুভূমিতে মাঝেমধ্যে বুনো জন্তুর ডাক দূর থেকে ভেসে আসছে। বাতাস নেই খেজুর গাছগুলোর পাতায়। চাঁদ ডুবে যাচ্ছে এবার। মিনিট পাঁচেক পর আবার শোনা গেল জেটের শব্দ। অনুমান করার চেষ্টা করল রানা। ইজিপশিয়ান পেট্রল? নাকি ইসরাইলী?

সেলিম আল-রশিদের জেট প্লেন আছে কি?

মেজর জেনারেলের নির্দেশের কথা মনে পড়ল রানার। অস্বাভাবিক কোন ক্ষমতার অধিকারী আল-রশিদ। তা না হলে রাহাত খান মাথা ঘামাতেন না

এমন ভাবে।

তাঁবুতে ফিরে বাকি সময়টা ঘুমিয়ে নেবে ঠিক করল রানা।

‘রানা?’ দ্রুত টোকা পড়ল ক্যানভাসে। কে যেন ডাকছে। গভীর ঘুম চট করে ভেঙে গেল রানার। বিপদ ঘটেছে কোন বুঝতে পারল ও। আত্মহারের গলায় বিপদ সঙ্কেত।

ক্যানভাস তুলতেই আত্মহারের রাইফেলটা চোখে পড়ল রানার। সকাল হয়ে গেছে খানিক আগে।

‘বনবন? তোমার কাছে বনবন?’

‘অফকোর্স নট। কি বলতে চাও, আত্মহার?’

‘ওর তাঁবুতে নেই ও।’

‘সব জায়গা দেখেছ?’

‘নেই, রানা। আশেপাশে কোথাও নেই সে।’

‘সার্চ পার্টির ব্যবস্থা করেছে? সকাল বেলা উঠে হাঁটতে বেরোয়নি...?’

‘খুঁজতে বেরিয়েছে ওরা।’

থমকে গেছে রানা। হঠাৎ মনে পড়ল আশঙ্কটা, ‘বেলচা?’

‘ওর তাঁবুর সামনে গার্ড আছে বলে দেখিনি...মাই গড, মাথা খারাপ হয়ে গেছে আমার, রানা!’ হঠাৎ চোঁচিয়ে উঠল আত্মহার, ‘ওর খোঁজ নেয়াই আগে উচিত ছিল।’

দৌড়াল রানা কক্ষল গায়ে দিয়েই জেনারেল বেলচার তাঁবুর দিকে।

রানার পিছন পিছন জেনারেলের তাঁবুতে ঢুকে মেঝেতে বুকে ছোঁরা গাঁথা অবস্থায় শুয়ে থাকতে দেখল আত্মহার শুধু গার্ডটাকে। জেনারেল বেলচা নেই।

লাশ ছুঁয়ে রানা বলল, ‘কয়েকঘন্টা আগে মরেছে লোকটা।’

‘দু’জনেই চলে গেছে তাহলে।’

‘কিন্তু কোথায়?’ রানা বলল বিমূঢ় গলায়।

‘ড্যান্সাররা নিয়ে গেছে ওকে,—আত্মহার দাঁতে দাঁত চেপে বলল, ‘বনবনকে ওদের দরকার। ডনফিলকে কাজ করাতে হলে বনবনকে না হলে চলবে না ওদের। প্রথমবার কিডন্যাপ করেছিল ওরা ওকে তাই। দ্বিতীয়বারও...’

‘কিন্তু কে জানে আমরা এখানে আছি?’

‘সব কথা যেমন করে জানে ওরা আমাদের কথাও তেমনি করে জেনেছে। সব জায়গায় ওদের চর আছে। এই বেদুইনদের মধ্যেও আছে!’

‘বেন-হাকিমের খবর কি?’

‘ফেরেনি সে?’

বেদুইনদের তাঁবুর কাছে চলে এল রানা। খবর ছড়িয়ে পড়েছে ইতোমধ্যে।

আইয়ুব এগিয়ে এসে পরিচয় দিল নিজের। বেন-হাকিমের ছেলে সে। শিক্ষিত। ইংরেজী, হিব্রু, আরবী ও ফ্রেঞ্চ ভাষা জানে। রানাকে নিজের

তাঁবুতে নিয়ে গিয়ে বসাল। রানা কিছু বলবার আগেই আইয়ুব বলল, 'আপনাদের গার্ল ফ্রেন্ড জার্মানটার সাথে স্বইচ্ছায় গেছে, মি. রানা। আমরা কোনও শব্দ পাইনি।'

রানা বলল, 'বনবন স্বইচ্ছায় গেছে বলে মনে করি না আমি।'

'ভুল মনে করেছেন আপনি।' আইয়ুব বলে উঠল, 'যাকগে। আমরা সত্য আবিষ্কার করতে পারব। দেরি হবে না বেশি। মেজর আমাদের সাথে যাচ্ছেন। ইচ্ছা করলে যেতে পারেন আমাদের সাথে আপনিও। উত্তর দিকটা দেখব আমরা।'

রানা জিজ্ঞেস করল, 'তোমার আন্নার কাছ থেকে শুনেছ আল-রশিদের হেডকোয়ার্টার সম্পর্কে?'

'সিনাই বড় অদ্ভুত জায়গা, মি. রানা। খোদার গজব আছে এই এলাকায়। এই সিনাইয়ের বৃকে কত শত রকমের উপজাতি বাস করে তার কোন হদিস আজ পর্যন্ত করা সম্ভব হয়নি। এখনও পৌত্তলিক ধর্ম মেনে চলে অনেক উপজাতি। খোদার ওপর বিশ্বাস নেই ওদের। আশ্চর্য সব ধর্মীয় অনুষ্ঠান তাদের। নরবলি তো আকহার দেয়। সূর্যকে দেবতা মানে। অনেক উপজাতি আছে যারা মনে করে চাঁদ তাদের খবর জানাবার জন্য আকাশে ওঠে। দেবতাদের কাছে গিয়ে রিপোর্ট করে সে। চাঁদের উদ্দেশ্যে নাচে ওরা। সেই নাচ কোন সময় থামে না। ঢলে পড়ে আত্মহত্যা করে ওরা। Djebel Kif-এর নাম শুনেছেন মি. রানা?'

'না।'

'বড় দুর্গম জায়গা ওটা। ওখানে যে গেছে সে আর ফিরে আসেনি কোনদিন। এর বেশি আমি আর কিছু জানি না।'

রানা বাইরে বেরিয়ে এল। আত্মহার উট তিনটির পিঠে পানির ব্যাগ সাজানো দেখছিল।

'Djebel Kif-এর নাম জানো?'

আত্মহার বলল, 'কেন?' বিস্মিত দেখাল ওকে, 'একটা রান্সুসে পর্বত শৃঙ্গের নাম Djebel Kif, তিনশো বছর আগে একটা তথ্য পাওয়া গিয়েছিল ওখানকার অধিবাসী সম্পর্কে। ঈজিপশিয়ান বর্ডার থেকে পঞ্চাশ ঘাট মাইল দূরে। আজব এক ধরনের উপজাতি বাস করে ওখানে। যাদের কথা পরিষ্কার ভাবে কেউ জানে না কিছু। ওরা নাকি পৌরাণিকতা কাটিয়ে উঠতে পারেনি এখনও।'

'পর্বত শৃঙ্গটা দেখেছ কখনও?'

মাথা নাড়ল আত্মহার, 'প্রায় কোনও লোকই ওদিকে যায় না। বেদুইনরা পর্যন্ত মনে করে আল্লার অভিশপ্ত জায়গা ওদিকটা। চাঁদে গিয়েও আমেরিকানরা যেমন চাঁদ সম্পর্কে কিছুই জানে না, তেমনি আমরা তো দূরের কথা, সিনাইয়ে থেকেও সিনাইয়ের লোকেরা Djebel Kif সম্পর্কে কিছুই জানে না।'

'কেউ জানুক আর না জানুক, আল-রশিদের আসল ঘাঁটি যে Djebel Kif তা বুঝতে পারছি আমি।'

‘যদি তাই হয়, তাহলে পূর্ব পশ্চিম দিক থেকে সশস্ত্র আক্রমণ চালাতে হবে। যুদ্ধের প্রস্তুতি দরকার, রানা। বিশ্বাস করো ব্যাপারটা ছেলেখেলা নয়। আশেপাশের সবচেয়ে উঁচু পর্বতশৃঙ্গ ওটা। যার অর্থ : হবার্ট ডনফিলের লেসারবীম ওখান থেকে নিষ্ক্ষেপ করা হলে কয়েক শ’মাইলের সবক’টা রাজধানী স্বেচ্ছা ছাই হয়ে বাতাসে উড়ে যাবে।’

‘Djebel Kif ই আমাদের গন্তব্যস্থল।’

উটগুলো ভাল দৌড়ুতে পারে না। কিন্তু দ্রুত ছোটোও অসম্ভব। ফ্রন্টিয়ারের দিকে মুখ করে যাচ্ছে ওরা। চিহ্নিত কোন পথ নেই সামনে। লানচে নুড়ি লানচে পাথর বিছানো মাইলের পর মাইল।

আইয়ুবের একজন লোক একবার উট থেকে নেমে একটা পাথর পরীক্ষা করে দেখল। বেন-হাকিমের ছেলেকে নিজেদের ভাষায় কিছু বলল সে। আরও ঘটাখানেক পর লাল একটা পাহাড়ের পাদদেশের সামনে স্থপীকৃত বালিতে ছাপ পাওয়া গেল।

‘ওরা এই দিকে এসেছে।’ বিড় বিড় করে বলল বেন-হাকিমের ছেলে।

‘পায়ে হেটে?’ রানা জানতে চাইল।

‘হ্যাঁ,—আইয়ুব বলল, ‘এই পর্যন্ত অন্তত। জার্মান আর মেয়েটি।’

রানা বলল আত্মহারকে, ‘কিন্তু বেলচা পঞ্চাশ ঘাট মাইল হেঁটে যেতে পারবে না Djebel Kif পর্যন্ত। শয়তানটা নিশ্চয়ই ড্যান্সারদের সাথে আগে থেকে যোগাযোগ করে রেখেছিল। আমাদের সাথে আসতে চাওয়ার কারণটা বুঝতে পারছি এখন।’

‘তার মানে বেলচা সবসময় ড্যান্সারদের লোক ছিল?’

রানা বলল, ‘এগোনো যাক।’

কুড়ি মিনিট পর পূর্ব নির্ধারিত পয়েন্টে পৌঁছুল কাফেলা। আত্মহার জানাল চিহ্নহীন সিনাই ফ্রন্টিয়ার অতিক্রম করেছে ওরা।

পরবর্তী একটি পাহাড়ের কাছে অকস্মাৎ উট থেকে নেমে পড়ল আইয়ুব। একমুহূর্ত পরই বিজয়োল্লাসে চৈচিয়ে উঠল সে, ‘পেয়েছি!’

শুকনো বালির উপর জীপের চাকার আর পায়ের ছাপ পরিষ্কার ফুটেছে। জেনারেল আর বনবনের পায়ের ছাপ ছাড়াও তিনজন অতিরিক্ত লোকের ছাপ দেখল রানা। জীপের চাকা মোড় নিয়ে উত্তর দিকের পর্বত শৃঙ্গের দিকে চলে গেছে। আত্মহার বলল, ‘টায়ারগুলো চেকোশ্লোভাকিয়ার তৈরি। আর্মির কাছে কিছু এই জীপ আছে। ড্যান্সাররা চুরি করেছে তার মানে।’

সূর্যের প্রহার অসহ্য হয়ে উঠল। বেন-হাকিমের ছেলে নিজের আলখান্না দিতে চাইল রানাকে। মৃদু হেসে ধন্যবাদ জানাল রানা। নিল না আলখান্না।

এগোনো যাচ্ছে খুব কম। বারবার ভুল হয়ে যাচ্ছে পথ। পিছন ফিরে এসে দিক নির্ণয় করে নিয়ে আবার মন্থর গতিতে শুরু হচ্ছে এগোনো। জীবিত কিছুই চোখে পড়ল না রানার। সামান্য কাঁটা গাছও নেই কোথাও। শব্দ বলতে বাতাস বইলে শোনা যাচ্ছে মাঝেমাঝে। ইঠাৎ কখন বালির মেঘ উড়ে এসে ঘিরে ফেলেছে ওদেরকে। কিন্তু বেশির ভাগ সময় শুধুমাত্র পাথরের উপর দিয়ে

এগোচ্ছে উট। লাল আর ধূসর রঙের পাথর। পিছনে, সামনে, ডানে আর বাঁয়ে পাথরেরই মহাসমুদ্র। কোন্ দিকে চলেছে ওরা কিছুই বুঝে উঠতে পারল না রানা। কিন্তু বেদুইনরা জানে।

খাড়া একটা পর্বত শৃঙ্গের নিচে বসে বিশ্রাম নেবার সময় জেটের শব্দ শুনতে পেল রানা দূরে। এবারের শব্দ উচ্চকিত। হলুদ আকাশ আর পিঠের কাছের বালি কাঁপিয়ে দিল শব্দটা। ঝুর ঝুর করে পড়তে শুরু করল বালি। রানা ছোট ছোট ঢোকে গলায় পানি ঢালতে ঢালতে আকাশ সার্চ করার চেষ্টা করল। কিন্তু আকাশের দিকে তাকিয়ে থাকা অসম্ভব। সূর্যের একচ্ছত্র প্রচণ্ড দাপট গোটা আকাশ জুড়ে। কিছুই দেখতে পেল না রানা।

দুপুর গড়াবার আগেই আবার যাত্রা।

তিনটে ছোট ছোট পাহাড় অতিক্রম করার পর আবার বালির উপর জীপের চাকার দাগ দেখা গেল। মাত্র তিন মাইল এগোবার পর বেন-হাকিমের ছেলে বহদুর ব্যাপী সরু শৈলশিরা দেখাল আড়ল বাড়িয়ে, 'ওদিকে যাব আমরা। জীপ দ্রুত গেছে, কিন্তু শটকাট রাস্তা ধরব এবার আমরা। উট আট মাইল বাঁচিয়ে দেবে আমাদের।'

'কিন্তু ওদেরকে ধরা সম্ভব হবে না।'

'সেরকম কোনও আশা আগেও ছিল না এখনও নেই।' আইয়ুব ব্যাখ্যা করল, 'কিন্তু আমরা হয়তো জানতে পারব কোথায় গেছে ওরা। আর হয়তো জানতে পারব কি ঘটেছে আমার আন্নার কপালে। আমার আন্না আমার কাছে অত্যন্ত গুরুত্বপূর্ণ।'

দুইশটা অমানুষিক পরিশ্রম করে ক্রমশ উঁচু হয়ে ওঠা পাথরের স্তূপে উঠল ওরা। উটগুলোকে বেশিরভাগ সময় টেনে নিয়ে আসতে হলো রশি ধরে। এবার এই প্রথম মানুষ বাস করে এমন একটা জায়গা দেখল রানা। বেদুইনদের ক্যাম্প। ওদের কাছে জায়গাটা পরিচিত। একমাত্র কুয়াটা বিস্ফোরক দ্রব্য দিয়ে বুজিয়ে ফেলা হয়েছে। প্রচণ্ড রোদে পড়ে রয়েছে তিনটে ক্ষতবিক্ষত মৃতদেহ। দূর থেকেই দেখা গেল পোড়া তাঁবু আর কঙ্কল।

কাছাকাছি পৌঁছুতেই বিশাল ডানা মেলে আকাশে উড়ল কুৎসিত চেহারার কয়েকটা শকুন। লাশগুলো ছেড়ে নড়বার লক্ষণ নেই ওদের। উপরে চক্কর মেরে উড়তে লাগল।

নিহত লোক তিনজন বেদুইন। আইয়ুব বলল, 'এরা! এরা কিন্তু আমার আন্নার বন্ধু। কায়রোয় থাকে। আন্নার তো এদেরকে নিয়েই আসার কথা! আমার আন্না?'

আইয়ুবের কথা শেষ হতেই রাইফেল গর্জে উঠল কাছ থেকে।

আইয়ুবের একজন সঙ্গীর হাতে রাইফেল দেখল রানা। আবার লক্ষ্য স্থির করছে সে দূরে। আধমানুষ সমান উঁচু পাথরের মাঝখান দিয়ে টলতে টলতে এগিয়ে আসছে একটি ছায়ামূর্তি। চিৎকার করে উঠল আইয়ুব সঙ্গীর উদ্দেশে, 'ধামো!'

চোখ ছোট ছোট করে দূরের ছায়ামূর্তিটার দিকে তাকিয়ে থাকতে

থাকতে আইয়ুব ফিস্ ফিস্ করে উঠল, ‘আল্লা বাঁচানে-ওয়ালা।’

‘হ্যাঁ। ও বেন-হাকিম, তোমার আশ্বা।’ রানা বলল আস্তে করে।

বেন-হাকিম ছাড়া সবাইকে মেরে রেখে গেছে।

কোনও রকমে প্রাণ বাঁচিয়ে পালিয়ে যেতে পেরেছিল বেন-হাকিম। গোড়ালির উপর বুলেটের আঘাতে ছড়ে গেছে তার। আত্‌হার ব্যাগ খুলে জখমের পরিচর্যায় হাত দিল।

‘আল্লা সব দেখছেন। নকল পয়গম্বর জ্বলেপুড়ে থাক হয়ে যাবে। দেখবেন আপনারা।’

‘ওরা নকল পয়গম্বরের লোক? আপনি ঠিক জানেন?’

‘চোরের মত লুকিয়ে ছিল ওরা।’ রানার প্রশ্নের উত্তরে হ্যাঁ-সূচক মাথা নেড়ে বলল বেন-হাকিম, ‘সাবধানই ছিলাম আমরা। কিন্তু এলাকাটা হচ্ছে ওদের। আমরা দ্রুত এসেছিলাম তাই ক্রান্তিতে ঘুমিয়ে পড়েছিলাম বেঘোর হয়ে। কিন্তু আল্লা মরা লোকগুলোকে বেহেশতে নাজেল করবেন।’

‘Djebel Kif চেনেন আপনি?’ রানা কথা পাড়ল।

‘কাজের লোক আপনি,’—হাসল বেন-হাকিম, ‘আমাকে ছাড়াই শয়তানের বাড়ির নাম জেনে ফেলেছেন।’

‘গেছেন কখনও?’

‘হ্যাঁ—কাছাকাছি গেছি। কিন্তু কোনও উপায় নেই। কোন মানুষের পক্ষে ওপরে যাওয়া অসাধ্য।’

‘অসাধ্য কিছুই নয়।’ আত্‌হার বলে উঠল।

‘তাহলে চলুন আমার সাথে। দেখবেন নিজেদের চোখে আমার কথা সত্যি কি না। ওখানকার কেউ না চাইলে ওখানে যাওয়া যে কোন মানুষের পক্ষেই সম্পূর্ণ অসম্ভব। আমরা বেদুইন। অসম্ভব বলে মনে করি না আমরা কোন কিছুকেই। Djebel Kif-এ যাওয়া একদম অসম্ভব।’

রানা বলল, ‘হয়তো তাই, কিন্তু উপায় একটা আছে। কারণ আমাকে সেলিম আল-রশিদ চায়। আমি যাচ্ছি ওখানে।’

## দশ

শয়তানের বাড়ির মতই খুলে থাকতে দেখল রানা হলুদ রঙা আকাশের গায়ে Djebel Kif-কে।

বেন-হাকিমের বন্ধুদেরকে কবরস্থ করে বেরিয়ে পড়েছিল ওরা। চল্লিশ ঘণ্টার পথ পেরিয়ে পৌঁছেছে ওরা। বেন-হাকিম অনেকটা সুস্থ হয়ে উঠেছে আহার আর চিকিৎসা পেয়ে। আসার পথে কেউ ওদেরকে অনুসরণ করেনি বলে জানিয়েছে আইয়ুব আর তার স্কাউট দল।

ক্রমশ নেমে গেছে ঢালু হয়ে পাথরের সিঁড়ি। সিঁড়ির ছায়ায় দাঁড়িয়ে সামনে

দৃষ্টি মেলে দিল ওরা। Djebel Kif-এর শক্ত পাথরের কালো পিলার দেখা যাচ্ছে। আকাশে লটকে আছে যেন উঁচু পর্বত শৃঙ্গটি। প্রতিটি চূড়ায় প্রাচীনকালের দেবতাদের প্রকাণ্ড প্রকাণ্ড মূর্তির মত পাথরের মূর্তির অস্পষ্ট আভাস পাওয়া যায়। প্রায় ধসে পড়া একটা গম্বুজ আর কামান দাগার ফোকরওয়ালা লম্বা দেয়াল কয়েকটা খালি চোখে দেখা গেল। নড়াচড়া লক্ষ করা গেল। মরুর উত্তপ্ত বাতাস ওদের কাপড় দুলিয়ে বয়ে যাচ্ছে। বেন-হাকিম বিড়বিড় করে উঠল :

‘লাভ নেই। দেখাচ্ছে নির্জন, কিন্তু মানুষ আর মেশিনে ঠাসা ওর ভিতরটা। ক’জন বেদুইন পাখির খোঁজে কাছাকাছি গিয়েছিল স্ত্রীলোকদেরকে নিরাপদে রেখে। মাত্র একমাস আগের কথা বলছি। কেউ আর তারা ফিরে আসেনি।’

‘ডাকাররা যাতায়াত করে কোন্ পথে?’

‘উত্তর দিকে রাস্তা তৈরি করেছে ওরা। আউট অভ সাইট। একমাত্র পথ ওটা ক্রিফে পৌঁছুবার। গার্ড দেয়।’ বেন-হাকিম ঢোক গিলে বলল, ‘কাছাকাছি কোথাও ল্যান্ডিং প্লেস আছে। প্লেসে করে জিনিসপত্র আনে ওরা। তারপর হেলিকপ্টারে করে চূড়ায় পৌঁছায়।’

আত্‌হার বলল, ‘শৃঙ্গ থেকে খালি চোখেই দশ মাইল দেখতে পায় ওরা। লুকিয়ে পৌঁছুতে পারব না আমরা। কিন্তু মিশরীয় আর্মির সাহায্য নিয়ে অকস্মাৎ আক্রমণ চালালে...’

‘অত সময় নেই। বেলচা আর বনবন রয়েছে ওখানে।’ রানা বলে উঠল, ‘ভয়ঙ্কর কিছু ঘটতে যাচ্ছে আল-রশিদ তাই তাড়াহুড়ো করেছে সব কিছুতে। যেতে হবে আমাকে।’

‘কিন্তু তোমাকে আমি একা যেতে দিতে পারি না।’

হেসে ফেলল রানা, ‘আর কোনও উপায় নেই।’

‘এর নাম আত্মহত্যা।’ বেন-হাকিম বলে উঠল।

তৈরি হতে আরম্ভ করল রানা। ওদের কথায় কান দিল না।

একঘণ্টা পর নামতে শুরু করল ও। উৎরাইয়ে পৌঁনে একঘণ্টা লাগল। সমতল বালির উপর দিয়ে হেঁটে চলেছে রানা। বড় অভূত লাগছে ওর। মাইল দুয়েক পিছনে আত্‌হার আর বেদুইনরা লুকিয়ে পড়েছে। মানুষ বলে কোনও প্রাণী আগে-পিছে ডানে-বাঁয়ে দেখতে পাচ্ছে না ও। গায়ে ফোসকা পড়ে যাবার মত গরম রোদ লাগছে। পশ্চিম আকাশে ঢলে পড়েছে প্রকাণ্ড লাল মার্তণ্ড। উত্তপ্ত মরুবায়ু চোখের পাপড়িতে আর নাকের ভিতর বালি উড়িয়ে আনছে।

শৈলশিরায় কোন পদার্থের নড়াচড়া নেই, খাঁ খাঁ মরুভূমি ডানে বামে। পশু-পাখি, জন্তু জানোয়ার নেই। এক কণা পোড়া ঘাসের চিহ্নও নেই। বুটের নিচে বালি আর কুচি কুচি পাথর গুঁড়ো।

এমন নিঃসঙ্গ জীবনে আর কখনও বোধ করেনি ও।

পর্বত শৃঙ্গের দিকে চোখ তুলে আরও দ্রুত পা চালান রানা। কি অপেক্ষা

করছে ওখানে ওর জন্যে? সেলিম আল-রশিদের বিশাল দেহটা চোখের সামনে ফুটে উঠল। খলিফাদের আমলের মণিমুক্তা খচিত বেশভূষায় সত্যি মানায় লোকটাকে। সিঁথে হাঁটতে হাঁটতে কি ভেবে উত্তর দিক ঘেঁষে হাঁটতে শুরু করল রানা। এখনও ঘন্টাখানেক লাগবে বলে আন্দাজ করল রানা পাদদেশে পৌঁছুতে। উত্তর দিক দিয়ে প্রবেশ করার চেষ্টা করবে ও।

দক্ষিণ দিক থেকে পাহাড়টাকে যেমন দেখা গিয়েছিল উত্তর দিক থেকে ঠিক তার উল্টো মনে হলো। রাস্তাটা নজরে পড়েছে রানার। ছাগল ভেড়া যাতায়াতের পথের সরু দাগ মাত্র লালচে শক্ত বালিতে। পাহাড়ের গায়ের ওপর দিয়ে উপর দিকে উঠে গেছে ক্রমশ উঁচু সিঁড়ির ধাপের কাছে।

দিনের আলো থাকতে থাকতেই পাদদেশে পৌঁছুল রানা।

হঠাৎ একটা বুলেট ছিন্নভিন্ন করে দিতে পারে ওর হাড় মাংস। আল-রশিদ শত্রুকে বাঁচিয়ে রাখাটা বোকামি বলে মনে করলেই সব শেষ হয়ে যাবে। আত্মবিশ্বাস ওঁড়ো হয়ে যেতে লাগল রানার। পাহাড়ের গায়ে জীবনের চিহ্ন নেই। চ্যালেঞ্জ নেই। কোনও আক্রমণের লক্ষণ নেই। বেন-হাকিম ভুল করল নাকি? Djebel Kif ড্যান্সারদের আস্তানা যদি না হয়...

আরও উপরে উঠতে লাগল রানা।

এবার দেখা গেল পরিষ্কার পশ্চিম আকাশের শেষ লম্বের উজ্জ্বল লাল রৌদ্রকিরণে ধসে যাওয়া গম্বুজটা। সামনের আকাশে সরু রঙ মাখা। বাতাসের তোড় বেশি এখানে। উপরে বাইজেন্টাইন প্রকাণ্ড প্রস্তর মূর্তি ধূসর রঙা আকাশের গায়ে মাখা উঁচু করে রয়েছে। একটা টাওয়ারের খানিকটা অংশ দেখা যাচ্ছে। ভিতর দিয়ে রাস্তা আছে বলে অনুমান করল রানা। খিলানগুলোর প্রবেশ পথ হাঁ করে গিলে খেতে চাইছে যেন ওকে।

শেষ একশো গজ সবচেয়ে জঘন্য। সশস্ত্র ড্যান্সাররা ওকে ঘিরে ফেলেছে বলে আশঙ্কা হলো রানার। মাথা থেকে সব চিন্তা বের করে দেবার চেষ্টা করে উঠতেই থাকল ও ধীরে ধীরে।

সবশেষে খিলান আর ধসে যাওয়া দেয়ালের সামনে দাঁড়াল রানা। প্রবেশ পথের ভিতর অন্ধকার যেন শত শত বছর ধরে জমাট বেঁধে আছে। এগিয়ে গেলেই গ্রাস করবে ওকে।

একটা কণ্ঠস্বর শুনতে পেল রানা।

‘ওয়েলকাম, মি. রানা। ওয়েলকাম, ইনডিড।’

মুখের ভাব বদলাল না রানা সেলিম আল-রশিদের দিকে এগোতে এগোতে। ম্যাগনেটিক পাওয়ার আছে আল-রশিদের চেহারায়ে। প্রাচীন যুগের খলিফাদের পোশাকেই দেখল তাকে রানা। সোনা দিয়ে এমব্রয়ডারী করা। হীরক খণ্ড বসানো পরিচ্ছদের সবখানেই। ময়ূরের মত রূপ সব মিলিয়ে। কিন্তু ডেকোরেশনের কোনও বাহুল্য দরকার করে না আল-রশিদের। চারকোনা দেহের উপর চারকোনা মুখটা এক পলক দেখলে বুঝতে বাকি থাকে না এ পুরুষ মানবিক ও দৈহিক দিক দিয়ে সব পুরুষের ঈর্ষার পাত্র।

‘আমরা Djebel Kif-এ আশা করছিলাম তোমাকে, মি. রানা। বুঝতেই

পারছ, আভার এস্টিমেট করিনি তোমাকে।’

দুটো ছায়া অস্থির হয়ে উঠেছে প্রকাণ্ড আল-রশিদের পিছনে। কিলার হাউভস। বডি গার্ড ওরা, মিউনিকে দেখেছিল রানা। হারাকিম আর মাহমুদ। রানাকে ভুলতে পারেনি ওরা।

‘অনেক ঝড় ঝাপটা সয়ে তোমার কৌতূহল মেটাতে এসেছ, মি. রানা।’ আল-রশিদ বলল।

‘কৌতূহল মেটাতে আসিনি শুধু আমি,’ —বলল রানা, ‘হবার্ট ডনফিল আর বনবনকে চাই।’

‘ইনডিড? দাবি করছ? একা, এই অবস্থায়?’

‘বনবন এখানে আছে?’

‘আছে। আর আমার সহচর, হের বেলচা। মোটাসোটা কিন্তু ভারি চালাক। আমাদের জাজমেট স্থগিত থাক বর্তমানে। তোমার পাগলামিও চাপা দিয়ে রাখো, কবরের ব্যবস্থা পরে হবে।’

হাউভ দুটো রানার দৃষ্টিতে এসে জায়গা নিল। ছোয়ার সুযোগ না দিয়ে রানা পা বাড়িয়ে দিল। খিলানের ভিতর দিয়ে একটা পাথর বাঁধানো পথ। দেয়ালের ভিতর এসে দেখা গেল Djebel Kif-এর উপরটা সমতল। বিরাট একটা জায়গা নিয়ে হেলিকপ্টার ল্যান্ডিং গ্রাউন্ড। শেডের নিচে একটা টু-সীটার দাঁড়িয়ে আছে। পথের পাশেই একটা শান বাঁধানো ঘাট। পুকুরের পানি কাঁচের মত স্বচ্ছ। পুকুরের পাশে বাগান।

ড্যান্সার দু’জনার মাঝখানে থেকে স্টোন গ্যালারীর পাশ দিয়ে এগিয়ে চলেছে ও। কাঠের একটা মাচার নিচে এসে পড়ল ওরা। সূর্য অস্ত গেছে। সামনে প্রায় অন্ধকার। কাঠের বড় দরজাটা দেখতে পাওয়া যাচ্ছে আবছাভাবে। নরম গলায় হেসে উঠল আল-রশিদ।

‘এখানে সবাইকে আমি ওঠাই না। বিস্ময়কর মনে হচ্ছে জায়গাটাকে তোমার?’

‘তোমার অমর হবার স্বপ্নের চেয়ে বেশি না।’

‘কিন্তু অন্য যে কোন জায়গার চেয়ে বিস্ময়কর, স্বীকার করতে হবে তোমাকে। আমরা এখানে স্নায়ুসম্পূর্ণ। আমাদেরকে ধ্বংস করে এমন শক্তি সত্যি নেই। এটা প্রাকৃতিক দুর্গ। আমরা এর উন্নতি সাধন করে স্বরকম অনুপ্রবেশের পথ বন্ধ করে দিয়েছি। গ্লীজ গো ইন।’

হাউভ দু’জনের একজন কাঠের দরজাটা খুলে ধরল। ভিতরে ঢুকল রানা। বিস্ময়কর, তাতে কোনও সন্দেহ রইল না রানার। সিঁদাবাদের জমানার কোনও প্রাসাদের অভ্যন্তরে ঢুকে পড়েছে রানা। আরব্য উপন্যাসের কিংবদন্তী জাতব সত্য হয়ে দেখা দিয়েছে চোখের সামনে।

পাহাড়ের এবড়োখেবড়ো শৃঙ্গের নিচে মাকড়সার জালের সুতোর মত অগুনতি প্যাসেজ। নরম আলো আর ঠাণ্ডা আবহাওয়া ভিতরে। আল-রশিদ শান্তভাবে উচ্চারণ করল ‘এ্যাটমিক রিয়াক্টর’ শব্দটি। জার্মান আর ইঞ্জিনিয়ারিং টেকনিশিয়ানদের তৈরি। জমাট পাথর ভেঙে মর্জি মত মসৃণ

আকার দেয়া হয়েছে প্রকাণ্ড মাঠের মত হলঘরটাকে। দেয়ালে ব্লু আর পিঙ্ক কালারের নকশা করা শ্বেত পাথর আঁটা। নরম পারশিয়ান কার্পেটে বুট জোড়া ডুবু ডুবু হয়ে যাচ্ছে হাঁটার সময় রানার। হলের এক কোণায় একটি এলিভেটর। রানা এতটুকু নড়াচড়া করল না গার্ড দু'জন ওকে সার্চ করার সময়। জুতো জোড়ার কথা মনে পড়ল না ওদের।

এলিভেটরটাকে একমাত্র মাধ্যম মনে হলো শয়তানের বাসাবাড়ির উপর নিচে যাতায়াতের। এলিভেটর থেকে নামতেই আর এক নতুন দুনিয়ায় এসে পড়ল বলে মনে হলো রানার।

করিডর দিয়ে এগোবার পথে পাশের রুমগুলোয় কয়েকজনকে গবেষণায় মগ্ন দেখল রানা। অ্যাপ্রন পরে কাজ করছে বয়োবৃদ্ধ লোকেরা রহস্যময় ল্যাবরেটরিতে। কস্টিউম পরা ড্যান্সাররা কোমরে তলোয়ার ঝুলিয়ে সব জায়গায় চড়ে বেড়াচ্ছে দেখল রানা। তারপর হঠাৎ দাঁড়িয়ে পড়ল ও। মুখোমুখি দাঁড়িয়েছে এসে মাদামোয়াজেল জুজু। রানা কথা বলে উঠল, 'এই যে?'

চেহারার পরিবর্তন হয়েছে অনেক। কিন্তু জুজুকে চিনতে অসুবিধে হলো না রানার। অক্টোবরফেস্টে নিডল চুকিয়েছিল এই মেয়েই। নীল ঘাগরা পরেছে জুজু। অবাক হলো রানা ওর গালে ক্ষতের দাগ দেখে। নীল চোখ জোড়া জুলে উঠেই মিইয়ে যেতে দেখল রানা। বলল, 'লজ্জা পাচ্ছ নাকি আমাকে চিনতে?'

বিস্মিত হয়ে তাকাল যেন জুজু। ঠোট ভিজিয়ে নিল। মাথা নামিয়ে অভিবাদন করল বলে মনে হলো রানার। তারপর দ্রুত পাশ কাটিয়ে চলে গেল পিছন দিকে। আল-রশিদ বলে উঠল সামনে থেকে, 'আলিভা, যাকে তুমি জুজু বলে জানো, আইন ভেঙেছে বলে সামান্য সাজা ভোগ করছে এখন। কারও সাথে কথা বলা বারণ ওর।'

মুদু ধাক্কা খেয়ে পা বাড়িয়ে একটা মুদু আলোকিত চেহারাে ঢুকল রানা। সবচেয়ে আগে চোখে পড়ল সোনার সিংহাসনটা। ঝলমল করছে সিংহাসনের হাতল আর পিঠের কিনারার হীরকখণ্ডগুলো। নকশাগুলো চিনতে একটু দেরি হলো রানার। পরিত্র কোরান শরীফের বাণী খোদাই করা সিংহাসনের গায়ে।

চাকরবাকরেরা শশব্যস্ত হয়ে এগিয়ে এল আল-রশিদের আগমন ঘোষিত হবার সাথে সাথে। রানাকে সে বলল, 'বিশ্রাম?'

'সম্ভাব্য সব দেখার জন্যে এসেছি আমি।' মুদু হেসে বলল রানা।

'কিন্তু অনেক পথ অনেক কষ্ট করে পেরিয়ে এসেছ তুমি, মি. রানা। তোমার বন্ধুরাও—নিশ্চয়ই, ওদের কথাও ভুলিনি আমরা। তবে ওরা আমাদের জন্য হার্মলেস। বাড়াবাড়ি না করলে ওদেরকে নিয়ে ঝামেলা করব না। প্রিজনার হিসেবে তুমি কিন্তু বড় ভুগেছ। চাইনি আমরা। কিন্তু ড্যান্সাররা বেহেশতের উত্তরাধিকারী হলেও ভুল করে বসে মাঝেমধ্যে। পরবর্তী জীবনে ওরা নির্ভুলভাবে কাজ করতে শিখবে। সেজন্যে ভালের শাস্তি মতাদগু দেয়া

হয়েছে ওদের কাউকে কাউকে। মৃত্যুটাকে আমরা কোনও মূল্য দিই না মৃত্যুর পরই সুন্দর, আরামদায়ক নির্ভুল জীবন লাভ করবে সবাই। হাসতে হাসতে বরণ করেছে সবাই দণ্ড...

‘স্বইচ্ছায় মৃত্যুবরণ করেছে ওরা?’

‘অফকোর্স।’ অস্পষ্ট, নির্ভুর হাসি দেখা দিল আল-রশিদের ঠোটে, ‘যেমন স্বইচ্ছায় বিজ্ঞানীরা কাজ করছে। আমি যে পৃথিবী শাসন করব সেই পৃথিবীকে বশ্যতা স্বীকার করাবার জন্যে যা কিছু দরকার সব পাব আমি ওদের কাজ থেকে।’

‘নির্ভয়ে কাজ করছে বিজ্ঞানীরা? নাকি তোমার ওষুধের কেরামতি...’

‘কেউ কেউ ভয়ে কেউ ওষুধের প্রভাবে—স্বীকার করছি আর সামান্য সার্জারিতেও কাজ পাচ্ছি। এসো, নিজের চোখে দেখো।’

পরবর্তী একটি ঘণ্টা ঘুরিয়ে ঘুরিয়ে দেখানো হলো ওকে কিছু ছোট বড় চেম্বার আর ল্যাবরেটরি। সবখানেই প্রচণ্ড ব্যস্ততা লক্ষ্য করল রানা। একটা রুমে পলোনারডনোচিকে চিনতে পারল রানা। আর এক জায়গায় দেখা পেল ও প্রফেসর এ্যান্টন নোডোনিক আর আলভারেজ সিনরোর। বিভিন্ন ল্যাবরেটরিতে সবাই নিজের নিজের কাজে নিবিষ্ট চিন্তে মগ্ন। ডক্টর সাদেকের নাম ধরে ডাকল রানা। ফিরেও তাকাল না সে ওর দিকে।

‘তুমি এগোচ্ছ কোন একটা উদ্দেশ্যে।’ রানা বলল আল-রশিদকে।

মাথা উঁচু লোকটা উত্তরে বলল, ‘আমরা তৈরি।’

‘ফর দ্যা এন্ড?’

‘পশ্চিমীরা যাকে বলে দি এন্ড অড দ্যা ওয়ার্ল্ড। এসো, আমাদের আলটিমেট উইপন দেখাই এবার, ইন মিনিয়োচার। ডক্টর হবার্ট ডনফিল প্রমাণ করেছে তার যোগ্যতা।’

‘তোমাকে সাহায্য করেছে সে?’

‘মেয়েটাকে আমাদের হাতে দেখে ওর আর কোনও উপায় নেই। সেন্টিমেন্টাল লোক, কিন্তু ব্রিলিয়ান্ট লেসার টেকনিকসে। লেসারকে তুলনাহীন অস্ত্রে রূপান্তর করে প্রতিভার পরিচয় দিয়েছে। ফ্লেক্স অপটিক্যাল ম্যান ডক্টর ওকিরা মায়াশী আর লী বি রয়েছে আমাদের সাথে। কিন্তু যে লোবোটমি আমরা তৈরি করেছি তাতে সার্জারিতে পারফেক্ট রেজাল্ট পাওয়া যাচ্ছে না। লী বি কে মরতে হবে। বেলচা সার্জেশন দিয়েছিল সার্জারির।’

‘বেলচা,’ রানা বলল, ‘প্রথম থেকেই সে তোমার পার্টনার?’

‘নানা কাজের পার্টনার।’

সময় খরচ হয়ে যাচ্ছে নিজস্ব খাতে। কিছু একটা দ্রুত ঘটনার প্রস্তুতি চলেছে। সুযোগ আছে? বিবেচনা করছে রানা। হাউভ দু’জন প্রতিটি সেকেন্ড লক্ষ্য করছে ওকে। অস্বাভাবিক কোনও সুযোগ পাবার কোনও আশা করতে পারে না ও। বনবনের সাথে দেখা করার অনুমতি দেবে না ওকে। একার চেষ্টায় যা করার করতে হবে। একটা পোকার মত উড়ে এসে জড়িয়ে পড়েছে যেন ও মাকড়সার জালে।

প্যাসেজে ওদেরকে অনেকগুলো মেয়ে পাশ কাটিয়ে গেল। কেউ কেউ চাকরানী। ম্লান মুখ প্রত্যেকের। সেলাই করা ঠোঁট। নিষ্প্রাণ চোখের দৃষ্টি। সবই ওষুধের প্রভাবে বলে মনে করল রানা। একমাত্র জুজুরই মগজে বুদ্ধি শুদ্ধি আছে বলে মনে হলো রানার।

ভাল ঘুমুতে পারল না রানা। ব্রোকেড বিছানো নরম ডিভানে গড়াগড়ি দিয়ে কাটিয়ে দিল রাতটা। আল-রশিদের গর্বিত বক্তৃতার কথা মনে পড়ল বারবার। অপারেশন রুমে ক্ষুদ্র একটা লেসার যন্ত্র ব্যবহার হতে দেখেছে রানা। একজন বন্দীর মাথায় খুলি লাগাল কয়েকজন মাস্ক পরা সার্জেন। ব্লেন অপারেশন হয়ে গিয়েছিল রানাকে ওখানে নিয়ে যাবার আগেই। তারপর Djebel Kif-এর উন্মুক্ত সম্মুখভাগে আরও একটা লেসারগান ফিট করা দেখল রানা। গানটাকে ঘিরে কাজ করছে অনেক টেকনিশিয়ান।

‘কাজ করে এটা?’ জিজ্ঞেস করে রানা।

‘আল্লার তরবারির মত অদৃশ্যভাবে কাজ করে। দেখা যায় না এর শিখা। কিন্তু সব অদৃশ্য করে দেবে এক পলকে। এই ধরো, দশ মিলিয়ন লোক এত দ্রুত ছাই হয়ে যাবে যে নিজেরা বুঝতে পারারও সময় পাবে না। সংখ্যা শুনে বিস্মিত হচ্ছ? কিন্তু মানুষের দাম সত্যি খুব কম। ছোট একটা পৃথিবী আমাদের, লোকসংখ্যা বড় বেশি। এই যুগের সবচেয়ে বিকট সমস্যা এটা। সেজন্যেই মানুষের মূল্য কমে গেছে। সরবরাহ বেশি হলে চাহিদা কমে যায়—অর্থনীতিতে আছে না? এখানেও তাই হয়েছে। আমি কম করে ফেলব মানুষের সংখ্যা।’

‘ছোট একটা এ্যাটমিক বম্ব Djebel Kif-এ পড়লে কি দশা হবে?’ রানা বলল, ‘একটা SAS বম্বার বা রকেটই যথেষ্ট।’

‘সত্যিই তাই ভাব নাকি তুমি? কিন্তু রাষ্ট্রীয় ফরমালিটি, জাতিসংঘের অধিবেশন, এমবাসীর মেসেজ যাওয়া এবং ফেরত আসা, এসব হতে হতে সত্যিকার সিদ্ধান্ত নিয়ে কাজে হাত দিতে কত সময় লাগতে পারে বলে অনুমান করো তুমি?’

চুপ করে গেল রানা। লোকটার কথার পিছনে অকাট্য যুক্তি আছে। এ ধরনের ব্যাপারে চরম কোন সিদ্ধান্ত নেবার আগে সরেজমিনে তদন্ত অনুষ্ঠিত হতে হবে জাতিসংঘের তত্ত্বাবধানে। তারপর ওয়ার্ল্ড ওপিনিয়ন, আরওমেন্ট, চার্জ, কাউন্টার চার্জ—অনেক নাটক হবে একের পর এক।

কিন্তু রানা তা ঘটতে দিতে পারে না।

উঠে বসার খানিক পর মৃদু টোকা পড়ল দরজায়। ভিতরে আসতে বলল রানা। আলিডা—বা জুজু ব্রেকফাস্ট ট্রে নিয়ে ভিতরে পা রাখল।

রূপোর নকশা কাটা ট্রে। চিনামাটির কফি পট। পোচ আর সেক্স করা ডিম, টাটকা মাখন, জেলী, পাউরুটি, আপেল আর আঙুর সাজানো ট্রেতে। জুতো জোড়ার জন্যে নিচে তাকাতে নরম মরক্কান স্লিপার দেখতে পেল রানা। জুতো জোড়া সরিয়ে ফেলা হয়েছে দেখে দমে গেল মনটা। কিন্তু বাইরে কিছু প্রকাশ করল না রানা।

‘ওড মর্নিং, জুজু। নাকি এখানে তোমাকে আলিডা বলে ডাকতে হবে?’  
 ‘আলিডা আমার আসল নাম।’ যন্ত্রের মত উত্তর দিল সে, ‘আলিডা জোনান সেন। কিন্তু তোমার সাথে কথা বলার অনুমতি নেই আমার।’  
 ‘তুমিই দেখছি একমাত্র মেয়ে যার গতিবিধি সর্বত্র। কারণ কি?’  
 ‘প্রফেট আনন্দ পান এতে। এবার আমি যাই।’  
 ‘প্রফেট সত্যি সত্যি অমর, একথা তুমি বিশ্বাস করো?’  
 ‘উনি একটা মানুষ,’ হঠাৎ বলে ফেলল আলিডা, ‘আমার উপর দৈহিক অত্যাচার করে প্রমাণ করেছেন।’

রানা অন্য কথা পাড়ল, ‘এদের জালে জড়িয়ে পড়লে কিভাবে তুমি?’  
 ‘আর সব মেয়েদের মতই। বিজ্ঞাপন দেখে নাচের চাকরি নিতে গিয়েছিলাম। নাচার প্রস্তাব ছিল পৃথিবীর বিভিন্ন দেশে। চাকরি পেয়ে নাচলামও। তারপর দিনে দিনে ড্যান্সারদের একজন হয়ে উঠলাম।’

‘এদের হাত থেকে পালাবার চেষ্টা করোনি কখনও?’  
 ‘একবার...। তুমাকে অজ্ঞান করার পর হঠাৎ চেজ হয়ে যায় আমার মন। কাগজে জেনারেল বেলচার নাম দেখতাম প্রায়ই। পালিয়ে তার অফিসে যাই ড্যান্সারদের সব কথা বলার জন্যে। কিন্তু আমার কপাল খারাপ, বেলচা এদেরই নিজের লোক। সে ফেরত আনে আবার। তারপর...আমার শত্রুকে যেন অমন অত্যাচার কখনও সইতে না হয়...পালাবার কথা এ জীবনে আমি আর ভাবতে চাই না। এবার আমি যাই।’

‘আর এক মিনিট...’  
 ‘না। ওরা সব কথা গুনতে পায়।’ আলিডা নিচু গলায় বলল, ‘টেপেরেকর্ড টেলিভিশন—সব আছে।’

‘আমার জন্যে কি ব্যবস্থা নেয়া হবে তা তুমি জানো না বোধহয়?’  
 ‘তোমাকে অমানুষ বানানো হবে—বোন ওয়াশ করিয়ে—সব লোকের মত। তুমি—বদলে যাবে। ওদের কাজ করবে—মেনে চলবে। প্রফেট তোমার কাছ থেকে আরও তথ্য চায়।’

‘আজ?’  
 ‘কিংবা আগামীকাল। আজ ওরা খুব ব্যস্ত।’  
 হারাকিম আর মাহমুদ এল কুড়ি মিনিট পর।  
 এলিভেটরের গোন্তেন বার্ডকেজে চড়ে Djebel Kif-এর টপ লেবেলে এসে নামল রানা। করিডরের পর একটি স্টীলের গেট। ভিতরে ডনফিলের ওয়ার্কশপ।

সাদাসিধে দেখতে জায়গাটা। কালো সাধারণ বাস্ত্রে লম্বা ডার্ক টিউব লাগানো। পাহাড়ের গায়ের উপর ফোকর করা। খোলা ফোকরের দিকে মুখ করা সবগুলো টিউব। কামানের মত দেখতে ওগুলো। কিন্তু অস্বাভাবিক মোটা মোটা কেবল ফিট করা মেকানিজমে। নিচের এ্যাটমিক প্ল্যান্ট থেকে পাওয়ার আসছে বলে ধারণা করল রানা।

ডনফিল নিবিষ্ট মনে কাজ করছে। খেয়াল নেই তার কোন দিকে। পাগল

বলে মনে হলো রানার লোকটাকে। মাথার চুল, দাড়ি এলোমেলো।

‘মি. ডনফিল?’

ডনফিল চমকে উঠে মুখ তুলল। ম্যাগনিফাইং গ্লাসের ভিতর দিয়ে ভুরু কুঁচকে একমুহূর্ত দেখল সে রানাকে।

তারপর চোখ থেকে সেটা খুলতে খুলতে অস্থিরভাবে একবার মাথা ঝাঁকিয়ে বলে উঠল, ‘তুমি? এখানে...’

‘একগুঁয়ে লোক আমি। আপনাকে অনুসরণ করে পৌঁছে গেছি।’

‘তবে আর কি, বড় বীরত্বের পরিচয় দিয়েছ।’ মুখ ভেংচে উঠল বৃদ্ধ বিজ্ঞানী, ‘চলে যাও। দেখতে পাচ্ছ না আমি এখন ব্যস্ত?’

‘কিন্তু ওরা চায় আপনার সাথে খানিক আলাপ করি আমি...’ রানা থামতে বাধ্য হলো। ডনফিলের দু’জন সহকারী ব্যস্তসমস্ত ভাবে ছুটে এল হঠাৎ। হড়বড় করে জার্মান ভাষায় কি যেন বলল ওরা। একজনকে ইটালিয়ান মনে হলো রানার। অন্যজন ইজিপশিয়ান। ডনফিল নিজের কাজে মন দিয়ে হঠাৎ মনে পড়ে যেতে ফিরে তাকাল রানার দিকে, ‘এখনও দাঁড়িয়ে আছ তুমি! কিন্তু রাত নামার আগে প্রিজম ব্যালেন্স কমপ্লিট করার হুকুম দিয়েছে আমাকে! করতেই হবে।’

নিরীহভাবে জানতে চাইল রানা, ‘গোলমাল হয়েছে বুঝি কোথাও?’

‘সর্বশেষে ইডিয়ট ছিল আগে এখানে। কিছু জানে না। কিছু না। আর এদিকে মাত্র সামান্য সময়...’

‘ট্রিগার কখন টেপা হবে?’ রানা কথার পিঠে কথা পেড়ে জিজ্ঞেস করল।

‘রাত নামার সাথে সাথে, বললাম না একবার! আর কি জানতে চাও তুমি?’

‘প্রথমে টার্গেট কি...’

‘ওখানে দেখো।’ আঙুল বাড়িয়ে পাহাড়ের গায়ের পোর্টহোলটা দেখিয়ে দিয়ে নিজের কাজে মন দিল ডনফিল। লম্বা লেসার টিউবের দিকে এগিয়ে গেল রানা বাইরের জগৎ দেখবার সুযোগ পেয়ে। অন্যমনস্কভাবে টিউবটার গায়ে চাপড় মারল রানা। কত ভোল্ট বহন করতে পারে এই টিউব? এক মিলিয়ন? দশ মিলিয়ন? অ্যাটমিক জেনারেটরের সাইজটা জানা থাকলে আন্দাজ করতে পারত রানা। ‘এই ডেথ রে’-এর উন্নতি সাধনে প্রধান প্রতিবন্ধক হচ্ছে পাওয়ার।

পোর্টহোল দিয়ে রানা দেখল কয়েক শ’ফুট নিচে মরুভূমি। গুরু হয়েছে অনেক দূর থেকে। তার মানে হোলের ওপার্শেই পাহাড়ের শেষ না। চোখে সহ্য হয় না সূর্যের প্রখর কিরণ। ধূ ধূ মরুভূমিতে কেউ নেই কোথাও। নর্থ-ইস্ট অ্যাক্সলে ফিট করা লেসারগান। তার মানে ইসরাইলের দিকে টার্গেট করা হয়েছে। কোন্ শহরকে? তেল আবিব? জেরুজালেম? পোর্টসিটি হাইফা নয়তো? কিংবা কায়রোও হতে পারে ওদের টার্গেট।

ডনফিলের দিকে ফিরল ও। বলল, ‘এদের হাতে পুতুল তাহলে আপনি,

মি. ডনফিল্ড?’

ডনফিল্ড আবার মুখ তুলল। আবার মাথা নাড়ল অস্থির ভাবে। বলল, ‘নো ক্রিটিসিজম, হের রানা। আমার বোকামিতে গুরু হয়েছিল এটা, শেষও হবে সেভাবে। করার আর কি ছিল? ওদের কথা মত কাজ না করলে ভূত হয়ে যেতাম এতদিন। মেয়েটাও, আমিও।’

‘আপনাদের দু’জনের জীবন কি লক্ষ লক্ষ জীবনের চেয়ে বেশি মূল্যবান?’

খেপে উঠল ডনফিল্ড, ‘ওসব কথা ভাবতে চাই না আমি। বেঁচে থাকতে চাওয়াটা কি স্বার্থপরতা?’ ভিজ্জে গেছে ডনফিল্ডের মুখ ঘামে, ‘চলে যাও। আই মাস্ট ফিনিশ মাই ওয়ার্ক।’ হঠাৎ মিনিতি ঝরে পড়ল ডনফিল্ডের গলা দিয়ে, ‘আমাকে বাঁচতে দাও! আমার মেয়েকে বাঁচতে দাও—কাজ শেষ করতে দাও আমাকে।’

‘মেয়েকে বাঁচাতে পারবেন না,’ তিক্ত গলায় বলল রানা, ‘আমরা সবাই মরব।’

কিন্তু ওর কথা ডনফিল্ডের কানে পৌঁছল বলে মনে হলো না। মেশিনের উপর নুয়ে পড়েছে সে।

লেসারের টেকনিক্যাল সিস্টেম সম্পর্কে কোন জ্ঞান নেই রানার। মনে হলো ও যদি ভেঙেচুরে দিতে পারে ইন্সট্রুমেন্টগুলো, দুনিয়া তাহলে আবার স্বস্তির নিঃশ্বাস ফেলে বাঁচবে। কিন্তু সে-চেষ্টা করতে যাওয়া মানে নিশ্চিত মৃত্যু। লেসার টিউবের দিকে পা বাড়ালেই হারাকিম আর মাহমুদ পিছন থেকে ধরাল তলোয়ার পিঠে গৌঁথে দেবে। প্রতিটি সেকেন্ড লক্ষ্য রাখছে ওর উপর দেয়ালের গায়ে পিঠ দিয়ে...

দেয়াল!

দেয়ালের ওপাশে পাহাড়। দেয়াল ছাড়িয়ে পনেরো বিশ ফিট উঁচু মাত্র। দেয়াল টপকাতে পারলে পালানো সম্ভব?

দেয়ালের গায়ে ভারী একটা দরজা। হাতে পেটা লোহার পাত দরজাটার। কাঠের কপাট দুটোয় জুড়ে দিয়ে আঁটা। তাল ঝুলছে প্রকাণ্ড একটা। যুগ যুগ ধরে খোলা হয়নি তালটা অনুমান করল রানা।

হাতের কাজ শেষ করতে হবে বৃদ্ধকে রাতের আগে। তার মানে আর আট ঘণ্টা মাত্র সময়। এখানে আবার আসার সুযোগ পাবে না রানা। কিছু একটা ঘটতে হবে।

যা করার করতে হবে এখনই। যে কোন উপায়ে। যে কোন মূল্যে।

বেল বাজার গুঞ্জনধ্বনি শোনা গেল। তৈরি হয়ে গিয়েছিল রানা। কিন্তু সামলে নিল নিজেকে ও।

হারাকিম আর মাহমুদ ফিসফিস করে বুক টান করে দাঁড়াল। জার্মান আর ইটালিয়ান টেকনিশিয়ান দু’জন তাকাল পরস্পরের দিকে। পাণ্ডুর হয়ে গেছে দু’জনার মুখ। পরমুহূর্তে ঝাঁপিয়ে পড়ল নিজের কাজে।

আল-রশিদ দরজা দিয়ে ঢুকল। পিছনে বিরাট বশু নিয়ে বেলচা।

ক্ষাপা নর্তক

হাতের নতুন ছড়িটা রানার দিকে তুলে ঝিক ঝিক করে হাসল বেলচা।  
কৈপে কৈপে উঠল তার বিকট ভুঁড়ি। হলুদ চোখ জোড়ায় কৌতুক। বলল,  
'হের রানা, কৌতুহল মিটেছে তো? শিখেছ অনেক কিছু?'

রানা বলল, 'আমাকে শিক্ষা দান করার জন্যে এত স্বাধীনতা দেয়া হয়েছে  
নাকি?'

'হ্যাঁ,' আল-রশিদ হালকাভাবে বলল, 'কিন্তু স্বাধীনতা তোমাকে অনেক  
দেৱিতে দেয়া হয়েছে। হের বেলচা সব তথ্য দিয়েছেন, যা কিনা তোমার কাছ  
থেকে আমি আশা করছিলাম।'

'তাহলে?' জিজ্ঞেস করল রানা।

কিন্তু উত্তরটা জেনে ফেলেছে রানা। ওদের চোখ মুখেই লেখা দেখতে  
পেল উত্তর রানা। আল-রশিদ ইশারা করল হারাকিম আর মাহমুদকে।  
তারপর শান্তভাবে নির্দেশ দিল, 'ফেড়ে ফেলো ওকে।'

## এগারো

কিছুই হয়তো না। হয়তো ওর প্রতিক্রিয়া লক্ষ করে মজা করার ইচ্ছে হয়েছে  
আল-রশিদের।

কিন্তু অপেক্ষা করে শেষ মুহূর্তটি দেখার সুযোগ নিতে পারে না রানা।  
একটা মাত্র উপায় দেখল ও। নিতম্ব দিয়ে লাইট গানের 'মাজলে' সজোরে  
ধাক্কা মারতে আধা চক্রর খেয়ে ধাক্কা মারল সেটা হারাকিমকে। পড়ে গেল  
সে। মাহমুদ ছিল ডান দিকে। রানা আন্দাজে ঘুরে দাঁড়িয়ে পা চালান  
সবেগে।

জুতো নেই রানার পায়ে। কিন্তু মাহমুদের তলপেটে লাখিটা গিয়ে  
লাগল। কুঁজো হয়ে পেট চেপে ধরে দু'পা এগিয়ে এল সে যন্ত্রণায় গড়াতে  
গড়াতে। লাফ মেরে সরে গেল রানা। হারাকিম উঠে দাঁড়ান মাথার উপর  
তলোয়ার উচিয়ে রানার দিকে মুখ করে। হাত লম্বা করে সামনের দিকে  
তলোয়ার চালান সে।

সে-সময় মাথা উঁচু করে সিধে হয়ে রানার আর হারাকিমের মাঝখানে  
দাঁড়ান মাহমুদ। থাপ্ করে বিচ্ছিরি একটা শব্দ শুনল রানা গলার চামড়া,  
মাংস, হাড় ভেদ করে ক্ষুরের মত ধারাল তলোয়ার বেরিয়ে আসার সাথে  
সাথে। রক্ত ঝর্ণার পানির মত হহ করে উঠে এল উপর পানে, কাটা গলা  
থেকে মাথাটা মেঝেতে ঠকাস করে পড়তেই। ধপাস করে পড়ল তারপর  
ধড়টা। মুণ্ডটা পড়েই গড়িয়ে গেল খানিকটা। ঠিকরে বেরিয়ে আসছে চোখ  
দুটো। আল-রশিদের দিকে মুখ করে থামল সেটা।

মেঘের ডাক শোনা গেল হারাকিমের গলা থেকে। নিজের হাতে  
মাহমুদের এই দশা করেছে তা যেন অস্বীকার করে চোঁচিয়ে উঠল সে।

উন্মাদের মত দ্বিখণ্ডিত মুণ্ডটার দিকে পা বাড়াল হারাকিম। দেয়ালের কাছে মুণ্ডটা।

চিন্তা করার সময় নেই রানার। শুনতে পাচ্ছে ও আল-রশিদের চিৎকার। এক লাফে হারাকিমের পিছনে চলে এল ও। হারাকিমের দুই পা ডান হাতের বেড় দিয়ে নিয়ে উঁচু করে ধরল। বাঁ হাতটা লোকটার বৃকের কাছে রাখল রানা। শূন্য সমান্তরাল ভাবে তুলে পোর্টহোলে গলিয়ে দিল মাথাটা। তারপর জোরে একটা ধাক্কা দিয়ে ফেলে দিল বাইরের দিকে।

পতনশীল হারাকিমের আর্তচিৎকার দ্রুত মিলিয়ে গেল।

এতগুলো কাণ্ড ঘটতে সময় লাগে দশ সেকেন্ডের কম।

কিন্তু আল-রশিদ বিদ্যুৎবেগে পৌঁছে গেছে দেয়ালের সুইচ বোর্ডের কাছে। আতকে উঠে চেষ্টা করে উঠল রানা, ‘ডোন্ট!’

আল-রশিদ চমকে উঠল রানার বাজখাই কণ্ঠস্বর শুনে এক মুহূর্তের জন্যে।

আল-রশিদ বুঝতে না পারলেও রানার ভুল বোঝার সুযোগটা বেলচা নিল সাথে সাথে। দেয়ালের একটা সুইচে হাত দিয়ে সে বলে উঠল, ‘লেসারগানের সুইচ, টিপছি আমি।’

অবাক হলো রানা। লোকটার কি মাথা খারাপ?

লেসারগানটার মুখ ঘুরিয়ে দিয়েছে রানা বেলচার দিকে। বীম লাগলে বেলচার গায়েই আগে লাগবে। কিন্তু সেদিকে খেয়াল নেই বেলচার। রানাকে হমকি দিচ্ছে সে সুইচ টেপার।

দ্রুত চিন্তা স্রোত বইছে রানার মাথায়। কোথাও কোন ভুল বোঝাবুঝি চলছে।

হঠাৎ রহস্যটা পরিষ্কার হয়ে গেল। টিউবটার দিকে চোখ পড়তেই ট্রিগারটার দিকে চোখ গেল ওর।

আস্তে করে ডাকল রানা, ‘মি. ডনফিল?’

‘ই-ইয়েস...?’

‘কাজ করে এটা?’

‘ই-ইয়েস, হের রানা, বাট...’

রানা পেয়ে গেছে আসল চাবি। টিউবটার মুখ প্রাচীন দরজাটার দিকে করল ও। তারপর চাপ দিল...

কিছুই ঘটল না।

কোন শব্দ নেই, কোনও চোখ ঝলসানো আলো নেই, কোন বিস্ফোরণ নেই...

অকস্মাৎ লোহার পাতসহ ভারী দরজাটা শুধু চোখের পলকে অদৃশ্য হয়ে যেতে দেখল রানা।

উত্তাপের অদৃশ্য স্পর্শ অনুভব করা গেল শুধু। মৃদু গুঞ্জনধ্বনি কানে ঢুকল। তারপর অবিরাম শব্দ পাথর খসে পড়ার। ধুলোয় ভরে গেল জায়গাটা। আল-রশিদের বাদশাহী পোশাকে আগুন ধরে গেছে দেখল রানা। বেলচা আর

সে আগুন নেভাতে ব্যস্ত। যেখানে দরজাটা ছিল সেখানে এখন গোল সুড়ঙ্গ একটা। পাথরের টুকরো পড়ছে এখনও সুড়ঙ্গের ভিতর। অন্ধকার ওত পেতে আছে ভিতরে। তা সত্ত্বেও বহুদূরে, সুড়ঙ্গের শেষ মাথায় আলোর আভাস। লেসারবীম পাথর ভেদ করে বেরিয়ে গেছে Djebel Kif-এর বাইরে।

‘মি. ডনফিল?’ রানা ডাকল।

‘পাগল...! কি করেছ তুমি...?’

আগুন নেভাতে হিমশিম খাচ্ছে ওরা। ওয়ার্নিং বেল বাজছে অদূরেই। ছুটে আসছে ড্যান্সাররা। হত্যা করার কোনও শখ জাগল না রানার মনে। লেসারগান ব্যবহার করতে যাওয়াটা ওর পক্ষে বোকামি। ট্রিগার ছেড়ে দিয়ে ডনফিলের একটা বাহু ধরে সুড়ঙ্গের দিকে দৌড়ল রানা।

অন্ধকার সুড়ঙ্গ। উপর পানে বহু দূরে দেখা যাচ্ছে গোল আলোর আভাস। ক্রমশ উঁচু হয়ে গেছে সুড়ঙ্গটা। রানার মনে পড়ল টিউবের লক্ষ্য স্থির করেছিল সামান্য একটু মুখ উঁচু করে।

অপর প্রান্তে পৌঁছুতে এখনও অর্ধেক পথ বাকি। বেলচার কণ্ঠস্বর পিছন থেকে ভেসে আসছে। কোথায় যাওয়া যায়? উপর দিকে গিয়ে লাভ হবে না কোন। পাহাড়ের গায়ে সুড়ঙ্গ মুখ। নিচে নামার কোনও পথ পাবার সম্ভাবনা খুব কম। সুড়ঙ্গ থেকে বের হবার জন্যে চঞ্চল হয়ে উঠল রানা।

ড্যান্সাররা দেখে ফেলেছে ওদেরকে। ওদের উল্লসিত চিৎকার কানে আসছে রানার। হাঁকাহাঁকি ডাকাডাকি চলছে এখনও।

আরও খানিকটা এগোবার পর ডান দিকে সিঁড়ি পাওয়া গেল। বাঁয়ের সিঁড়িগুলো নেমে গেছে নিচের দিকে। ওয়ার্নিং বেলের শব্দ উঠে আসছে নিচ থেকে। লেসারবীম সিঁড়ির মাঝখান দিয়ে চলে গেছে। উপর দিকে ওঠার জন্যে ডান দিকের সিঁড়ি বেছে নিল রানা। সিঁড়ির ধাপে পা রাখতেই পিছন থেকে টর্চের আলো এসে লাগল গায়ে। স্টেনগানের আওয়াজ শুনে বিড়বিড় করে কি যেন বলল ডনফিল।

উপরে উঠে টানেলের মত একটা করিডরের উপর দিয়ে ছুটল রানা। বাঁ দিকে চলে গেছে করিডরটা। তারপর ডানে মোড় নিল ওরা। দু’পাশে বন্ধ সেল। সামনে মৃদু আলো দেখা যাচ্ছে। সেদিকে পা বাড়াতে গিয়েও থমকে গেল রানা। ড্যান্সাররা বোধহয় দু’দিক দিয়েই ছুটে আসছে।

তার মানে ফাঁদে পড়ে গেছে ওরা। ধরা পড়তে হলে একটা কাজ ওকে করতেই হবে। ডনফিলের দিকে তাকাল ও। মরতে হবে বুড়োকে।

ধরা পড়ার আগেই কাজটা করতে হবে রানার। চোখ ফিরিয়ে নিল রানা। কিন্তু ডনফিল হয়তো বুঝে ফেলেছে রানার মনের কথা। অশ্রুটে কথা বলে উঠল ডনফিল, ‘আমি সাহায্য করতে পারি। এই কর্নারে কোনও বেরুবার রাস্তা নেই। সামনে খানিকটা গেলে একটা দরজা আছে। রুমগুলোর ওপাশে একটা বর্ণী পাওয়া যাবে। পরশদিন দেখলাম আমি।’

রুমের দরজা বন্ধ দেখল রানা। খানিকটা পিছিয়ে গিয়ে কাঁধ দিয়ে ধাক্কা মারল ছুটে গিয়ে। তারপর চার-পাঁচবার চেষ্টা করার পর ভেঙে পড়ল কবাত

দুটো।

রুম একটা নয়। একটার পর একটা পাথরের রুম পেরিয়ে পৌঁছুল ওরা একটা করিডরে।

করিডরের শেষ প্রান্তে অমসৃণ পাথর। রানা দেখল একটা দশ হাতি লম্বা ঝর্ণা থেকে হুহ করে পানি গড়িয়ে পাথরের উপর দিয়ে নিচে নেমে যাচ্ছে। খানিকটা দূরেই অনেক পানি।

‘সাতার জানেন?’

‘চে-চেপ্টা করব।’

ডনফিলকে তুলে নিয়ে আস্তে আস্তে পানিতে নামিয়ে দিল রানা। তারপর নিজে নামল।

সামনের দিকটা ক্রমশ অন্ধকার হয়ে আসছে। পাহাড়ের প্রকাণ্ড একটা গহবরের ভিতর এই ঝর্ণা। কোথায় যাচ্ছে কোনও ধারণা নেই রানার। হঠাৎ পানির সাথে ভাসতে ভাসতে পাঁচশো বা হাজার ফুট নিচের খাদে পড়বে না তো দু’জন?

ছ্যাৎ করে উঠল বৃকের ভিতর।

প্রচণ্ড হাঁ করে গিলতে আসছে যেন পাহাড়ের সুড়ঙ্গটা। তিনমানুষ উঁচু দু’মানুষ লম্বা হবে মুখটা। ঝর্ণার পানি কুল কুল শব্দে সেটার ভিতর ঢুকছে। ভিতরে গাঢ় অন্ধকার। ডনফিলকে ধরে ফেলে একটা পাথরের দিকে সাতরে গেল রানা।

‘এই গর্তের ভিতর দিয়ে পানি কোনদিকে গেছে জানেন?’

‘না। এদিকে কখনও...’ গুলির শব্দ শুনে চুপ মেয়ে গেল ডনফিল।

‘বাঁচতে হলে রিস্ক নিতে হবে। আমার পিছন পিছন আসবেন আপনি। সতর্ক থাকবেন।’

এই ধরনের গহবর সম্পর্কে ধারণা আছে রানার। হয়তো কয়েক মাইল পর্যন্ত মোড় নিয়ে চলে গেছে কোন সাগর বা সমুদ্রের দিকে। কিংবা হঠাৎ শেষ হয়ে গেছে পাহাড়ের গায়ে কোথাও। কয়েকশো ফুট নিয়ে পানি পড়ছে পাহাড়ের খাড়া গা বেয়ে।

অন্ধকারে দৃষ্টি চলে না। ডনফিলের শব্দ পাচ্ছে রানা পিছনে। খানিক দূর গিয়ে হাত ঠেকাল পাহাড়ের গায়ে। সামনে পথ নেই। পানির স্রোত অনুভব করল রানা। মোড় নিল বাঁ দিকে। ডনফিলকে বলল, ‘বাঁয়ে আছি আমি।’

বিপদের গুরুত্ব বুঝতে পারল রানা। নিজেই হাঁপিয়ে যাচ্ছে এবার সে। পনেরো মিনিটের মত কেটে গেছে। ডনফিল আর পারছে না। কোন রকমে মাথাটা উচিয়ে রেখেছে শুধু।

আবার মোড় সামনে। ডনফিলকে ছেড়ে সাতরে এগিয়ে গেল রানা। প্রখর সূর্যের আলোয় প্রথমে কিছুই দেখতে পেল না রানা।

শেষ পর্যন্ত চিনতে পারল। Djebel Kif -এক পুকুর আগেও দেখেছে ও।

ডনফিলকে নিয়ে সাতার কেটে তীরে এসে উঠতেই বাগান থেকে একটি মূর্তিকে ছুটে আসতে দেখল রানা। লাল ঘাগরা দেখে মেয়ে বলে ধরে নিল

রানা। উপড় হয়ে হাঁ করে হাঁপাচ্ছে ডনফিল। মেয়েটির দিকে আবার তাকাল রানা। চেনা যাচ্ছে এবার। হাত নাড়ছে মাদামোয়াজেল জুজু রানার উদ্দেশে।

ফর্সা মুখে বিষয় আর ভীতি ফুটে উঠল জুজু ওরফে আলিডার।

রানা বলল, 'মি. ডনফিলকে ধরো।'

'কিন্তু... কিন্তু কোথায়?' পিছিয়ে গেল আলিডা এক পা, এদিক ওদিকে তাকাল ঠোট ফাঁক করে, ওঁকে নিয়ে এসেছ কেন, রানা? ওঁকে...খুন করবে তুমি?'

রানা যা ভেবেছিল তার চেয়ে বুদ্ধিমতী আলিডা। রানা বলল, 'আমি কথ্য বলো।'

'সত্যি তাহলে?'

'ধরা পড়বার মুখে তাই করব আমি। আর ধরা না পড়াটা তোমার উপর নির্ভর করে।'

'আমি সাহায্য করতে পারি না। ওরা তোমাকে হন্যে হয়ে খুঁজছে উপরে।'...ভয়ে বিকৃত দেখাচ্ছে আলিডার সুন্দর মুখ, 'জলদি, এদিকে এসো।' ও ডনফিলকে ধরার জন্যে এগিয়ে এল।

দু'জন মিলে দাঁড় করাল ডনফিলকে। ডনফিল বিড় বিড় করে বলল, 'ছেড়ে দাও। আমি হাঁটতে পারব।'

দ্রুত নিঃশব্দ পায়ে হেলিকপ্টার ল্যান্ডিংয়ের কাছে এসে দাঁড়াল রানা। বন্য জন্তুর মত চারদিকে তাকাচ্ছে আলিডা।

'রানা, পালাতে তোমরা পারবে না, বিশ্বাস করো...'

'তোমার ইচ্ছা হচ্ছে না পালাতে?'

'একটা মাত্র পথ আছে বেরুবার। মেশিনগান নিয়ে পাহারা দিচ্ছে গার্ডরা চব্বিশ ঘন্টা।'

'আর কোনও পথ নেই?'

'না।' সবচেয়ে মাথা নাড়ল আলিডা, 'কিভাবে তোমরা ঝর্ণার পানি থেকে পুকুরে এলে জানি না। ঝর্ণার কাছে রাতদিন গার্ড থাকে। হয় ওরা উপরে চলে গেছে তোমাকে খোঁজার জন্যে, নয়তো...' হঠাৎ কি মনে পড়ে যেতে চুপ করে গেল আলিডা। তারপর বলল, 'রানা। একটা উপায় আছে—কিন্তু! না, অসম্ভব। ঝাড়া পাহাড়ের গা বেয়ে নামা কোনও মানুষের পক্ষে সম্ভব না।'

'আমি যাব না।' ডনফিল কথা বলে উঠল, 'আমার বনবন মরলে আমিও মরতে ভয় পাই না...'

রানা কিছু বলার আগেই আলিডা বলে উঠল, 'তাহাড়া Djebel Kif থেকে আজ পর্যন্ত কেউ পালাতে পারেনি, রানা। আশা ছেড়ে দাও তুমি...'

রানা ওকে কথা শেষ করতে না দিয়ে বলে উঠল, 'বনবনকে কোথায় রেখেছে জানো তুমি?'

'হ্যাঁ...হ্যাঁ, জানি।'

‘আনতে পারবে ওকে?’

ইতস্তত করল আলিডা, ‘ঠিক জানি না। চেষ্টা করতে পারি।’

‘তবে যাও, আলিডা। আমরা করিডরের আড়ালে অপেক্ষা করব তোমার জন্যে। দড়ি এনো, পারলে।’

‘না না। কোনও কথা দিতে পারছি না আমি। যদি না ফিরতে পারি? তোমরা বরং করিডরের শেষ মাথায় গিয়ে পাঁচিল উপকে নিচে নেমে যাও এখন। নিচে নেমেই পাহাড়ের খাদ দেখতে পাবে। ওখান থেকে নামা অসম্ভব। যদি পারো তাহলে পাহাড়ের নিচে পৌঁছে যাবে,’—চলে গেল আলিডা দ্রুত পদক্ষেপে।

করিডর দিয়ে দ্রুত পায়ে পাঁচিলের সামনে এল ডনফিলকে নিয়ে রানা। দেড় মানুষ সমান উঁচু পাঁচিল। লাফ মেরে দেয়ালের মাথা ধরে ফেলল রানা। তারপর উঠে পড়ল উপরে। ডনফিল কাঁপা কাঁপা দুটো হাত উঠিয়ে দিল উপর দিকে।

পদশব্দ শোনা যাচ্ছে অদূরেই। হেঁচকা টানে তুলে ফেলল ডনফিলকে রানা পাঁচিলের উপর। নামিয়ে দেবার সময়ও তাই করল। নিচের পাথর থেকে খানিকটা দূরে থাকতেই ছেড়ে দিল ডনফিলের হাত। ব্যথায় কাতরে উঠল সে। পাশে নামল রানা। ডনফিলের দিকে খেয়াল নেই ওর। পদশব্দ থেমে গেছে অদূরে।

গার্ড হঠাৎ এদিকে এল কেন? আলিডা কি ধরা পড়েছে? কিংবা ঠকিয়েছে রানাকে?

আবার পদশব্দ পাওয়া গেল। ফিরে যাচ্ছে বলে মনে হলো ওর। দ্রুত চিন্তা করছিল রানা। পাঁচিল উপকাতে হবে ওকে আবার। বনবনকে যদি আলিডা নিয়ে আসতে পারে তাহলে পাঁচিলে ওঠাবে কে? টু-সীটার ‘কন্টারটা’ দেখে আসা দরকার।

ডনফিল পালাতে পারবে না এখান থেকে। নির্ধাত মরবে সে চেষ্টা করলে। দশ হাত দূরেই খাড়া নেমে গেছে পাহাড়ের গা। দু’পাশে পাহাড়ের উঁচু নিচু ফাঁদ।

‘আপনি চূপ করে শুয়ে থাকুন এখানে। নড়াচড়া করবেন না। আমি বনবনকে নিয়ে ফিরব।’

কথাটা বলে উত্তরের অপেক্ষা না করেই পাঁচিলে উঠে বসল রানা। করিডরে কাউকে দেখা যাচ্ছে না। নিঃশব্দে নামল রানা। খালি পায়ে দৌড়াচ্ছে বলে কোন শব্দও উঠল না। হেলিকপ্টার ল্যান্ডিংয়ের কাছে এসে একটা পিলারের গায়ে গা ঢাকা দিয়ে একমিনিট দাঁড়িয়ে রইল রানা। কেউ নেই চারপাশে। বহুদূরের হৈ-হম্মার শব্দ অস্পষ্টভাবে কানে বাজছে। টু-সীটারটা নেট দিয়ে ঘেরা দেখল রানা। এগিয়ে গেল ও।

করিডর থেকে ‘কন্টারটা’ শ’খানেক গজ দূরে। আধাআধি পৌছুবার পর দাঁড়িয়ে পড়ল রানা। করিডরের মোড় ঘুরে একজন গার্ড আসছে এদিকে লেফট রাইট করে পা ফেলে। লোকটার হাতে খোলা তলোয়ার রয়েছে বলে

অনুমান করল রানা। নিঃশব্দ পায়ে ফাঁকা জায়গাটা থেকে ফেরত এল ও করিডরের পিলারের আড়ালে। ওকে দেখতে পায়নি। রুমগুলোর বন্ধ দরজার দিকে মুখ করে পিছু হেঁটে ক্রমশ এগিয়ে আসছে সে রানার দিকে।

হেসে ফেলল রানা নিঃশব্দে। লোকটা অতিরিক্ত সতর্ক।

হঠাৎ ঘুরে দাঁড়িয়ে পড়ল লোকটা। চট করে পিলারের আড়ালে মাথাটা সরিয়ে নিল রানা। দেখে ফেলছে কিনা বুঝতে পারল না ও। জুতোর শব্দ শোনা যাচ্ছে, কিন্তু খুব আস্তে। বোধহয় লক্ষ করেনি ওকে। একপা একপা করেই আসছে।

পিলারের গা ঘেষে করিডরের শেষ প্রান্তের দিকে চলে গেল লোকটা।

এখন যদি আলিডা আর বনবন এদিকে এসে পড়ে?

কথাটা মনে হতে করিডরের মোড়ের দিকে মাথা বের করে তাকাতেই রশি হাতে আলিডাকে দেখতে পেল রানা। বনবনকে তাহলে আনতে পারেনি? কিন্তু তারপরই আলিডার পিছনে বনবনকে দেখল রানা। চতুর মেয়ে আলিডা। গার্ডটাকে দেখতে পেয়েই একটা পিলারের আড়ালে লুকিয়ে পড়েছে ও। কিন্তু বনবন লুকোবার আগেই ধরা পড়ে গেল গার্ডের চোখে।

বিস্ময়ে প্রথমে দাঁড়িয়েই রইল গার্ডটা। বনবনকে সে একা মনে করেছে। চৈচিয়ে উঠতে গিয়েও নিজেকে সামলে নিল সে। সাহায্যের দরকার নেই তার। বনবনকে ধরার কৃতিত্ব একা পেতে চায় সে।

রানা ওত পেতেই ছিল। গার্ডটা ওকে ছাড়িয়ে দু'পা এগোতেই পিলারের আড়াল থেকে বেরিয়ে লাফ মারল ও। কারাতের কোপটা ঘাড়েই পড়ল গার্ডের। টু-শব্দ করার অবকাশও পেল না। হাঁটু ভেঙে করিডরের উপর এলিয়ে পড়ল। অচেতন দেহটাকে পিলারের আড়ালে রাখল রানা। তারপর ডাকল আস্তে করে, 'আলিডা।'

পাঁচিলের উপর আগে রানা উঠল।

আলিডার হাত থেকে রশি নিয়ে নিচের দিকে ঝুলিয়ে দিল ও।

'এক মিনিট,'—আলিডা বলল, 'রানা, শেষবার ভাল করে ভেবে দেখো। আমরা নিচে নামতে পারব কিনা জানি না। কেউ কোনদিন নামতে পারেনি। যদি পারি তাতেও বিশেষ লাভ নেই। মাইলের পর মাইল মরুভূমিতে কোথায় যাব আমরা?'

'আগের সমস্যা আগে সমাধান করি,'—রানা বলল, 'তারপর পরেরগুলো ভাবব।'

ওরা ডনফিলকে আগে পাঠাল। রানা তার হাতে রশি ধরিয়ে দিয়ে বলল, 'বাঁচার প্রতিজ্ঞা করুন, ডক্টর, নিচের দিকে ভুলেও তাকাবেন না। মনে করবেন দশ-পনেরো ফিট মাত্র নামতে হবে আপনাকে।'

রশি ধরে ঝুলে পড়তে না পড়তে পনেরো বিশ ফিট নেমে গেল ডনফিল পিছলে। তারপর মুঠোর ভিতর শক্ত করে ধরল সে রশি। প্রায় খাড়া নেমে গেছে পাহাড়ের গা। পাথরের উপর গা ঠেকিয়ে শক্ত করে রশি চেপে ধরে উপর পানে মুখ তুলে তাকাল ডনফিল। অসহায় আর্তি ফুটে বেরুচ্ছে চোখ

থেকে ।

নিঃশ্বাস বন্ধ করে অপেক্ষা করে রইল রানা । কোথাও কোন শব্দ হচ্ছে না । বনবন ওর বাবার কাছে পৌঁছুবার আগেই আলিডাকে ইঙ্গিত করল রানা নামতে ।

আলিডা সাবলীল ভাবে নেমে যেতে শুরু করল । রশির ফাঁসটা ভারী পাথরের গায়ে পরিয়ে দিল রানা । আকাশের দিকে তাকাল ও । হলুদ হয়ে উঠেছে আকাশ । একটা শকুন নিঃসঙ্গভাবে ঘুরছে উপরে । ঝুলে পড়ল রানা রশি ধরে ।

ফুলে ওঠা পাহাড়ের গা বেয়ে পঞ্চাশ-পঞ্চাশ ফুট নামার পর শুরু হলো আসল দৃশ্যঙ্গ ।

বনবন প্রত্নতাত্ত্বিক গবেষণার কাজে মিডল ইস্টের পাহাড়ে পাহাড়ে অনেকদিন কাটিয়েছে । আলিডার জন্মই পাহাড়ের দেশে । ডনফিল একেবারেই অনভ্যস্ত এ ধরনের সংগ্রামে । প্রতিটি ইঞ্চি গড়ানে পাহাড়ের গা অতিক্রম করেছে সে পূর্ব প্রস্তুতি নিয়ে । হাত থেকে রশি পিছলে যাবার আশঙ্কায় জর্জরিত হচ্ছে সে প্রতিটি সেকেন্ড । ফুলে ওঠা গা বেয়ে খানিকটা নেমেই ডনফিল দেখল খাড়া নেমে গেছে পাহাড় চল্লিশ ফুটের মত । উপর পানে ছলছল চোখে তাকাল সে, 'আর পারা গেল না ।' গাল বেয়ে পানি গড়িয়ে পড়ছে তার, 'আমার বনবনকে নিয়ে যাও, হের-রানা । আমি ভয় পাচ্ছি না...'

'পারতে হবে আপনাকে ।' রানা জোরে বলল, 'অপেক্ষা করুন । আমি আসছি ।'

আলিডার পায়ের পাশ দিয়ে নামার চেষ্টা করল রানা । রশিটা ঢুকে গেছে আলিডার শরীরের আর পাহাড়ের গায়ে মাঝখানে । হাতড়ে হাতড়ে সেটা বের করল রানা । এক ইঞ্চি এক ইঞ্চি করে নেমে এল ও আলিডার নিচে । তারপর একই ভাবে বনবনকে পাশ কাটাল ও । ডনফিলের মুখোমুখি দাঁড়িয়ে রানা বলল, 'আপনি চোখ বন্ধ করে আস্তে আস্তে হাত ঢিলে করুন । আপনার অ্যাপ্রন ধরে আছি আমি একহাতে ।'

কিন্তু রানার কথা শেষ হবার সাথে সাথে অনেক বেশি মুঠো ঢিলে করায় সবেগে নেমে যেতে শুরু করল ডনফিল । আঁতকে উঠে চৌচিয়ে উঠল বনবন । রানাও প্রাণপণ প্রয়াসে ব্যালেন্স রক্ষা করার সাথে সাথে নেমে যাচ্ছে ডনফিলের সাথে ।

চল্লিশ ফুট নামতে কয়েক সেকেন্ড মাত্র লাগল । সামনে ঢালু গা পাহাড়ের । ডনফিলকে ছেড়ে দিয়ে উপর পানে তাকাল রানা । টপ করে এক ফোঁটা পানি পড়ল রানার নাকে । বনবন আস্তিনে চোখ মুছে নেমে আসতে শুরু করল ।

পাহাড়ের গা ঢালু হয়ে চলে গেছে অনেক দূর । কিনারায় পৌঁছে আবার উপর পানে তাকাল ডনফিল । রানা এবার ডনফিলকে ছাড়িয়ে খানিকটা নেমে গেল । রশি বেয়ে উপরে উঠল ও আবার একটু ।

ডনফিল পায়ে খোঁচা খেয়ে নিচের দিকে তাকাল। রানা নিচু গলায় বলল, 'কোন শব্দ যেন না হয়। আট দশ হাত নিচে পাহাড়ের গা ঘেষে একটা রাস্তা আছে। ওখানে নামতে পারলে একটা উপায় হবে বলে মনে করি। আস্তে আস্তে নেমে আসুন।'

রানা সকলের আগে নামল নিচে। পাহাড়ের গা ভেঙে পথটা তৈরি করা হচ্ছিল। কিন্তু এখানেই থেমে গিয়েছিল পাথর ভাঙার কাজ। পথটা বাঁ দিক দিয়ে এসেছে। কিন্তু আর এগোয়নি। পাহাড় মাথা উঁচু করে দাঁড়িয়ে আছে বিপরীত দিকে। বেশ চওড়া পথ। ঢাকার মওয়াবপুর রোডের চেয়ে কম নয় চওড়ায়। ওপাশে মরুভূমি।

Djebel Kif-এর আধাআধি উঁচুতে এখনও ওরা। ছাগল-ভেড়া চলাচলের সরু পথটা চিনতে পারল রানা। খাঁ খাঁ করছে সুদূর বিস্তৃত মরুভূমি। হলুদ হয়ে উঠেছে আকাশ। মেঘের চিহ্ন নেই। সেই শকুনটাকে আবারও দেখতে পেল রানা।

পা পুড়ে যাচ্ছে গরম পাথরে। উঠে দাঁড়াল বনবন, আলিডা। পথের উপর বসে পড়েছিল ওরা পাহাড়ের গায়ে হেলান দিয়ে। রানা কি যেন বলতে গিয়ে চূপ করে গেল গুলির শব্দ শুনে।

হাঁটতে পারবে না ডনফিল। বনবন আর রানা ধরল দু'পাশ থেকে তাকে। রানা আলিডাকে জিজ্ঞেস করল সোজা পথটার দিকে চোখ রেখে, 'কোথায় গেছে এই রাস্তা?'

উত্তর দিল না আলিডা। কান পেতে কিছুক্ষণ শুনল ও।

বিপদ বুঝতে পারল রানা। ড্যান্সাররা টেঁচাচ্ছে। ডনফিল গায়ের ভার সবটুকু চাপিয়ে দিয়েছে রানার কাঁধে। হৈ-হল্লার শব্দ আস্তে আস্তে এগিয়ে আসছে। দূরে মেশিনগান ঠা ঠা করে উঠল। প্রতিধ্বনি উঠল পাহাড়ের গহ্বরে গহ্বরে। তারপরই আড়াল থেকে দেখতে পেল রানা লাফিয়ে লাফিয়ে এগিয়ে আসছে পঁচিশ তিরিশ জন মূর্তিমান শয়তান খোলা সলোয়ার হাতে।

পাশে পাহাড়ের বাধা। আর একপাশে শত শত ফিট খাদ। পিছনে পাহাড়ের গা। সামনে মৃত্যু।

পাথরের মত দাঁড়িয়ে রইল রানা একমুহূর্ত।

বনবনের দিকে না তাকিয়ে ঠেলে দিল ডনফিলকে রানা। উম্মাদের মত হয়ে উঠেছে চোখ দুটো ওর। রোদ-মাখা একটা পাথর তুলে নিয়ে পথের মাঝখানে চলে এল ও। বুক টান করে দাঁড়াল মাঝখানে।

বনবন, ডনফিল আর আলিডা পাহাড়ের গায়ে স্টেটে গিয়ে দাঁড়িয়ে আছে একটু পিছনে। তাকাল না রানা। আল-রশিদ সবচেয়ে আগে। বিশ পঁচিশ গজ পিছনে ড্যান্সাররা। দেখতে পায়নি ওদের। ডানা উড়িয়ে যেন ছুটে আসছে প্রকাণ্ড দেহটা সেলিম আল-রশিদের। হাতে তলোয়ার। রানার প্রতিটি নার্ভ আর পেশী চরম একটা বিপর্যয়ের জন্যে সতর্ক হয়ে উঠেছে। আল-রশিদের এগিয়ে আসা লক্ষ করা ছাড়া সব ভুলে গেছে রানা। লোকটার মুখ এখন পরিষ্কার দেখা যাচ্ছে। গালের একটা দিক পুড়ে গেছে ভয়াবহভাবে। কৎসিত

দেখাচ্ছে।

এক পা সামনে বাড়ল রানা। হাতের খাবার গরম পাথরটা ধরে রাখতে কষ্ট হচ্ছে ওর।

এগিয়ে আসছে আল-রশিদ। দুই সেকেন্ডের ব্যাপার আর।

পাথর ধরা হাতটা উপরে তুলল রানা। বিদ্যুৎবেগে পাথরটা ছুঁড়ে দিল ও।

সংঘর্ষটা হলো চরম একটা পরিস্থিতির পূর্বাভাস দিয়ে। দু'জনেই মৃত্যুর দোরগোড়ায় পৌঁছে গেছে। সর্বশক্তি দিয়ে পাথরটা মাত্র দু'হাত দূর থেকে আল-রশিদের কপালে ছুঁড়ে মেরেছে রানা। ব্যর্থ হবার কোন প্রশ্ন ওঠে না। এক পলকের জন্যে দেখেছে ও পাথরটা গিয়ে কপালে লাগল। তারপরই ধাক্কাটা খেল রানা।

কোথায় লাগল, কি লাগল বোঝার আগেই উপর পানে মুখ তুলে পিছন দিকে বাঁকা হয়ে গেল ওর মাথা। মনে হলো কাছাকাছি থেকে একটা চিৎকার করল কেউ। পরমুহূর্তে অনুভব করল একই সঙ্গে জিতেছে আর হেরে গেছে ও।

শেষ মুহূর্তটি মনে থাকল রানার। পড়ে যাচ্ছে বুঝতে পারল ও। পাথরের উপর নিজের পতনের শব্দ শোনার আগে একটি মাত্র কথা ভাবতে পারল ও।

নকল পয়গম্বর মরেছে।

অন্ধকার হয়ে গেল সব।

## বারো

এমন জরাগ্রস্ত আর কুৎসিত মুখ কোন মানুষের হতে পারে তা যেন বিশ্বাস করতে পারল না ও। মুখটা ওর উপর ঝুঁকে পড়েছে। নরম গলায় বিড় বিড় করে ঠোট নাড়ছে। মুখটার চিবুকে দাড়ি, দাঁত নেই একটাও। ওর পেটের ভিতর কি সব যেন দৌড়াদৌড়ি করছে, ওর গলায় ঠেকে রয়েছে কত যুগ ধরে যেন। মুখ সরিয়ে নিতেই অন্ধকার সব আবার।

আবার যখন জাগল ও তখন জরাগ্রস্ত কুৎসিত মুখটা ওর উপর ঝুঁকে নেই। হলুদ হলুদ বাতি দেখল ও। কিন্তু আলোর নাম নিশানা নেই কোথাও। অন্য কেউ ঝুঁকে পড়ল ওর উপর।

‘রানা? রানা?’

মেয়েমানুষ। সেন্টের গন্ধ পেল ও।

‘রানা?’

স্বর্গ হতে পারে না এটা। নরক যে নয় তাও বুঝতে পারল ও। কপালে যে হাতটা রয়েছে সেটা নরম, ঠাণ্ডা, শান্ত। গলাটা মৃদু আর দরদমাখা, ‘তুমি ঠিক হয়ে যাবে, রানা। জানো, আমরা ফিরে চলেছি।’

‘কোথায়?’

‘বর্ডারের কাছে আমরা, রানা। আমি বনবন। চিনতে পারছ না আমাকে, রানা? রানা?’

মেয়েটির মুখ নেমে এল। ওর গালে গাল ঘষছে সে। নরম ভরাট গাল।

‘ড্যান্সাররা?’ ও অশ্রুটে জিজ্ঞেস করল।

‘আত্‌হার সব বলবে তোমাকে। সব মিটে গেছে।’

‘আত্‌হার এখানে? ওর সাথে কথা বলব আমি।’

‘পরে, রানা। তোমার জখম মারাত্মক।’

‘ডাকো।’ রানা বলল।

ক’মিনিট পর আত্‌হার এল। রানার পাশে বসে কপালে ভারী হাত রাখল সে। বলল, ‘স্বাগতম, রানা।’ কেঁপে উঠল আবেগে ওর গালের মাংস, ‘তুমি ফিরে এসেছ আবার দুনিয়ায়। ওয়েলকাম ব্যাক, রানা।’

আত্‌হারের মুখে উত্তর খুঁজল রানা, ‘এখানে এলাম কি করে আমি? কি ঘটেছে বলো আমাকে।’

আত্‌হার বলল, ‘কিছু খেয়েছ তুমি?’

‘পরে। স্টার্ট টকিং।’ রানা ভুরু কঁচকাল, ‘Djebel Kif আর আল-রশিদ...’

‘Djebel Kif মানচিত্র থেকে মুছে গেছে।’

‘মুছে গেছে...’

‘আমরা ধসিয়ে দিয়েছি চূড়াটাকে। ড্যান্সাররা সেলিম আল-রশিদকে মৃত দেখে দ্বন্দ্ব মুষড়ে পড়েছিল। সবাই মৃতদেহ ঘিরে অপেক্ষা করতে থাকে। ওরা আশা করছিল পুনর্জীবিত হবে ওদের সেকেন্ড প্রফেট। তুমি পাথর ছুঁড়ে মেরেছ আল-রশিদকে। আল-রশিদের তলোয়ার তোমাকে ছুঁয়েছিল একই সময়ে। এক ইঞ্চি আগে বেড়ে যদি সে কোপটা মারত তাহলে মগজে গিয়ে ঢুকত তলোয়ার। বেঁচে গেছ ভাগ্যগুণে, রানা।’

‘Djebel Kif?’

‘ড্যান্সাররা আল-রশিদের মৃতদেহ ঘিরে অনুরোধ করছিল পুনরুত্থানের জন্যে। ইতিমধ্যে আমরা হতমাদেবকে নিচের একটা গুহায় নিয়ে যাই। ফেরার পথে এ্যাটমিক রিয়াকটর চেম্বারটা দেখতে পাই। স্পীড বাড়িয়ে দিয়ে বেরিয়ে আসি আমরা সব ক’জন বৈজ্ঞানিককে নিয়ে। খানিক পরেই বিস্ফোরিত হয় Djebel Kif. সবটা ধসেনি কিন্তু চেহারা আর তার নেই। কায়রোয় খবর পাঠিয়েছিলাম আমাদের অধারেটরের কাছে। সে আমেরিকান এমবাসীতে খবর পাঠায়। অ্যামবাসাডর হুবার্ট ডনফিল্ড আর বনবনকে নিয়ে গেছে। আলিডাও চলে গেছে একই প্লেনে। অন্যান্য সমস্ত বৈজ্ঞানিক চলে গেছে কায়রো পিক-আপে করে। আমি কেবল আছি তোমার সঙ্গে। কায়রোয় তোমার জন্যে সব ব্যবস্থা করা আছে। সিদ্ধিকী ‘কন্সটার নিয়ে আসছে। তম্ভাতাড়ি হাসপাতালে নেয়ার দরকার তোমাকে।’

‘বেলচা?’

ম্মান দেখাল আত্হারের মুখ, 'ওই লোকটাকেই কিছু করতে পারিনি,  
রানা । কপ্টার করে ভেগেছে সে ।'

'ডক্টর সাদেক?'

'সম্পূর্ণ সুস্থ । ধন্যবাদ জানিয়েছে তোমাকে ।'

ফিরোজার হাসি মাথা মুখটা ফুটে উঠল রানার মানসপটে ।

ঘুমিয়ে পড়ল রানা ।